

栢府霜臺暑欲流花驄繡斧柰東游持書合識古人意  
攬轡知懷天下憂此去蓬萊觀蜃市應思負嶠訪鰲丘  
平生壯迹縻塵鞅送汝長歌惜白頭

送閻贊善先生赴南大司成

坊院東西俯玉河古槐深蔭綠雲柯異時辱薦雄文似  
幾歲因窺馬賦多鳳幄侍筵辭禁直龍樓問寢想僊珂  
此行饒對白門柳興在蓬池煙雨波

送張石里少卿赴南光祿

炎風朔野變新秋錦席南移亦帝州曲省儀曹辭奉  
引陪都勲寺愜清修煙中晉苑朱薨影樹裏秦淮碧水

流此去定傳庾信賦鶯花回首白門樓

郊寺餞別鎮山再次槐野太史二首

傍郭塵昏曉日微出郊路靜過人稀客停簇騎穿蘿逕  
僧迂禪堂啓竹扉含濕柳煙浮席動颺空花雨入簾飛  
江南秋至尊鱸美美爾揚帆今獨歸

野外芳筵散鬱蒸花邊短劍說延陵應知白濟霜前過  
不厭黃樓月下登念別微吟成感激憂時危坐忽騫騰  
十年碧水丹山夢欲往從君興未乘

柳亭爲葉中書賦

舊業新安復武林青山住愛柳叢深一辭露葉牽春夢

幾惜煙條感醉吟翠擁鳩樓西掖暮碧藏龍舸北湖陰  
十年供奉長楊館底事頻抽白玉簪

送劉唐巖太守赴任嘉興

水岸春風動綵旄煙郊柳色映朱袍股肱暫借淮陽出  
刀犢懸知渤海勞列戍軍屯憂戰餉三吳民力困征漕  
時艱合展平生許肯使煙塵暗呂刀

送胡劍西太史使楚藩用閔學士韻

冰河凍柳變條初玉節遙將赤駟車湘北暖歸花競發  
衡陽春過鴈應踈封唐史佚策堪載歷國延陵聘孰如  
朱杜菁茆千葉祚周家大訓在丹書

正元前三日習儀朝天宮值雪

校儀陳羽衛閑驚看晨雪滿玄關光含綵仗翻披外  
度朱衣拜舞間競入璇臺交御氣真成玉殿引僊班  
祈壇報積千田素定豫天威咫尺顏

送沈鳳岡中丞撫治鄖陽

冠簪昨並趨丹極斧鉞今看下赤霄卿月預懸鄖十國  
法星先映漢臣軺諸藩賓佐多豪俊列郡風威又動搖  
此去褰帷饒述作題封莫惜寄瓊瑤

和午塘翰長春日游方氏園

春意誰同郭外尋郊園聊坐偃芳心鳴鳩乳燕紛相趁

細栢繁槐密自陰舊國娛情虛水石他鄉隨地漫雲林  
因吟秀句思芳草伐木先知懷好音

送李石麓太史省覲南歸

漢殿詞臣海上歸宮袍計日拜重闈江樓煙雨迎僊棹  
驛路風光動綵衣芳草淮南憐昔賦停雲燕北悵今違  
清朝載筆思才傑佇聽朱絃應玉徽

夜宿昌平李泉宗伯集叙用韻贈一首

齒髮空思乍壯年長纓赤驥頓誰牽門同陸相知虛忝  
榜藉蘇公得並傳慕道喜多關內士息機欲問漢陰田  
簷花細雨深盃夜燥濕音中識昨絃

用前韻簡司馬雙江先生

夏勝初辭漢繫年馮唐那復宦情牽青霄事業遺經在  
白首功名治郡傳洛下久聞司馬社山中漫憶介推田  
雅音寂寞饒新譜清廟憐公朱瑟絃

送許元復秀才還吳中

童穉論交已二毛相思吳楚隔風濤空憐明月懸珠珮  
未向黃塵拭寶刀仲蔚蓬蒿貧豈厭元龍湖海氣偏豪  
此歸且理裘羊逕莫學揚雄辨字勞

奉次許少華中丞九月二日居庸佛閣同仇將軍登

宴一首

出塞嫖姚紫幕開中丞玉節此追陪香林合駐名賢履  
寶積堪標上將臺谷蠶帳依高闕動桑乾水破大荒來  
淹留漫聽軍中樂矯首狼胥意獨迴

送太史全九山兄奉使得省毋致壽

玉節朱旄海曲歸金鈿白髮倚春暉人間日月開僊輓  
天上風雲動綵衣甬水春波魚入饌燕河夜雨鴈于飛  
文華榜士今無幾莫使鶴行歎久違

送王佐之行人使徽府因便省覲

玉節西馳指孟津桃花柳葉炫深春嵩雲併引朱旄麗  
洛日遙輝綵服新茅輦縮庭將漢典桐圭建國感周親

應知蔡仲光前德不負 天王大訓練

送四溟謝山人

禁柳踈陰澹曉暉青春其柰送將歸烟塵近訪黃龍塞  
雲海仍思白鳥磯壯迹詩篇聊自紀豪情盃酒向誰揮  
也知天地傷多事肯信扁舟易息機

送都諫姜韋軒赴廣東叅政

十年舊直侍 龍光萬里新麾動烏章南海元開秦尉  
宅曲江舊繞相君堂青山覽古迹堪問碧草懷賢思不  
忘遙想旬宣停赤駟應傳麗句遍遐荒

送吳都閩赴浙鎮

將軍才氣振江東虎竹新分向越中組練乍明湖岸月  
旌旗先掣海門風舊都自識儀文盛大鎮今看節制雄  
見說鯨鯢猶跋海湏君一建伏波功

送西吳張太史使江藩

京國論交幾過從郊筵惜別柰殘冬衝寒裘馬今朝發  
獻歲鶯花若處逢桐葉剪圭周建爵菁茅分社漢傳封  
歸將錦節停鄉邑玉筍高開紫霧重

楊安人壽詞

華髮金鈿相映清僊闈綵服拜長生蜀中自昔稱堯叟  
洛下于今識彥明向日萱花能媚晚經冬桂樹獨含榮  
霜叢滿院吟慈竹併作緜笙引鳳聲

壽徐東園錦衣七十

異姓王孫今代聞風期千古信陵君神僊第宅元霄漢  
賓從笙歌自水雲種竹鳳臺留客看買山燕渚與僧分  
斲輪歲月從今數赤篆長開藥錄文

自大茅峯入上下二宮緬然有憶仙之感書似句樊令及文學胡子

大茅西下華陽路石磴幽花好自開令尹青牛何處覓  
僊人白鶴幾時來星文半夜垂銀闕雲氣中天捧玉臺  
千古騎龍謔獨憶欲從滄海問蓬萊

謁荆川唐太史陳橋庄二首

一入陳橋棹即迷深源何異武陵谿支離未厭壺丘病  
寂寞仍耽潁水西舊劍牀頭長縱蒯新書案側欲噓藜  
微言更及玄筌理不記參橫晚日西

幾歲風塵海甸昏如公那得獨衡門焚魚學士迹空秘  
衣白山人禮自尊桂樹攀援聊賦隱桃花開落竟忘言  
英雄出處元無定不見南陽與渭村

辱荆川枉答用韻再贈二首

十年學道與方迷退守真慙老氏谿下士誰抽青笈秘  
高賢久作碧山栖三江采秀常舟楫五岳尋僊獨杖藜

強託著書能暫許五千文字定傳西

妖魘吹浪海沙昏蜃浦搖氛暗國門白面書生誰解武  
綠林羣盜故稱尊握竒自識才元辨抱灌終知寂不言  
豺虎縱橫紛在目可容間卧碧雲村

淮南九日有懷寄寶應廖明府

九日淮南繫客舟無邊雲霧蔽滄洲萬方多難孤尊對  
千里辭家一劍留木葉漫驚公子思菊花聊慰旅人愁  
長吟忽憶神僊令目極飛鳧天際頭

送大司馬雙江先生辭政南歸用少師相公韻

抱甕從來惡說機握韜今換釣綸歸功成不歎身難退

道在寧論事屢違天上心閒雲鳥陣山中夢近薜蘿衣  
誰憐華省孤吟客獨倚西樓看少微公以宅界予宅西有樓

送費仰湖符卿奉使荆藩

十年符省侍 君王幾曳銀緋到舊鄉玉節近承丹鳳  
詔金函更拜紫鸞章三湘夏過黃梅雨七澤秋迎碧莢  
霜莫待梁園飛雪度好馳星駟報明光

送李文麓太史奉使衡藩便省

省元昨占西江盛館職今分東觀榮獨捧金函辭禁籞  
遙將玉節下僊城幃褰海岱晴雲度旆指徐淮暑雨清  
深不可極莫吟黃葉滯秋程

八月二十七夜同年宴集內射所酒闌步東臺觀月  
慨談往昔愀然興感大洲兄屬倡句不揣敬呈鄙句  
二十年前舊月明長安盃酒此同傾星河影動高秋興  
絃管音傳少日情四海聲華前輩老幾人功業後時名  
酒闌忽感英雄事却憶終生曾借纓

少師相公一品六考詩

御墨親題紫鳳牋師臣再歷九功年汾陽績盛中書考  
潞國名尊比使傳磻水風雲迴大野傳巖星斗動高天  
古來佐命須黃髮麟閣今看畫獨先詔有再歷九功之云  
自彭城入沛書感錄似張元敬水部并寄周允文提

學

雙帆北指沛公鄉，矯首彭城在夕陽。  
擊筑久無秦子弟，歌風今有漢篇章。  
千年事往河山改，萬里秋歸草木蒼。  
井邑蕭條徒極目，可堪赤甸比遐荒。

楊南郭太史自金陵將之句容，詩以送之。

二十年前舊館僚，風塵鸞鶴見高標。  
脩然句曲山中往，徑赴華陽洞裏招。  
謝客三江忻獨泛，尚生五岳詎辭勞。  
應逢此地飡霞侶，共和騎龍白日謠。

有懷大茅道室，因南郭往謁寓訊。

憶昔南游訪道羣，幾疑玄界拜元君。  
鼎窺未煖丹鉛藥，

筍閱無名蚪斗文。服氣青芝長不厭，禮星玄鶴每先聞。  
茅龍欲借難成許，空望華陽一片雲。

用韻答湛一方生

海內吾當愚者兄，玄潭一笑得平生。  
六經誰作片言了，萬古汝留雙眼明。  
此去風塵彈趙鋏，須傾江漢洗吳兵。  
干時學道隨能事，我信安期不世情。

世言安期干時不遇乃學道故云

己未元日

舊京冠珮集僊扉，曙色先流簇伏輝。  
四紀昇平看舞羽，九重端拱坐垂衣。  
椒花頌獻宮門遠，酒葉尊傳禁省違。  
敢以周南留滯惜，但歌宵雅祝皇闈。



少東錦衣燈會病不及赴次季泉宗伯韻

信陵公子夜開堂宴客張燈水檻傍自放梅風入綺戶  
仍邀竹月下銀塘花邊錦炬參差影樹裏星球點綴光  
却笑病愁難料理卧憐簫鼓競更長

病後徐錦衣重招燈宴再用前韻

醉吟北斗掛虛堂起視明河絳闕傍點座銀花輝別館  
鈎簾火樹炫回塘屏間霧隱三山色檻外星浮一水光  
擬共昇平傳樂事笙歌齊慶帝年長

鳳臺懷古用李太白韻和季泉二首

把酒高臺詠昔游千年事往水空流青山故閱秦粧蘇

碧草今傷晉苑丘市柳禪絲迷舊磧川霞飛綺映荒洲  
浮雲白日終難蔽寄語前人暫破愁

鳳鳥不來人自游古臺高俯白雲流銅駝詎卧三吳陌  
石馬寧嘶六代丘岸幘他鄉憐短髮拂衣吾興欲滄洲  
從誰共倒長江水爲洗英雄舊日愁

吳山人長吟閣用韻二首

恐使詩情渾放閒故移吟眺入孤攀春光澹蕩煙中寺  
暮色依微雨外山柳換舊條當戶碧竹垂新籜滿林斑  
也知市巷同三徑定有求羊數往還

塵土誰能便息閒羨君林卧足幽攀長吟未厭聊題閣

大隱元知不在山春至小園花有暈人稀深巷蘚成斑  
祇應賸買逋僊鶴水曲城陰自放還

送少司馬石公赴鎮沅臺

十年戎馬驅馳靜萬里山川節制遙蕃漢車書通月竈  
西南君長望星軺松門關絕元封使銅柱功成建武朝  
幕府今陳司馬法征輸無用到三苗

魏公西園賞牡丹次礪峯少宗伯二首

冶城西畔魏公園僊客同開上日尊花繞複亭深隔市  
柳藏幽徑曲成村簾櫳晝啓春陰靜睥睨晴通野氣昏  
向夕不須仍秉燭繽紛蘿月映階繁

未說昔時金谷園且傾今日看花尊風流合並洛中社  
勝絕元稱白下村展席醉延池月吐開軒吟對水煙昏  
百年嘉集應難數莫厭歸燈擁路繁

太常後解牡丹盛開少卿王稚川招飲有作次答二  
首

誰種名花滿曲臺天香應自浴中來却憐宴笑人非故  
漫對穠芳首重廻十日繁開霞作障一欄紅艷錦成堆  
清平詞調傳今古妙思多君綺句裁

二百年間有此臺僊僚幾共看花來若爲獨對吟堪惜  
更着多情夢與迴香珮應遺華月浦玉姿定化彩雲堆

嬌葩秀詠憐相競知是天孫麗錦裁

趙太僕公修醉翁亭成招游有賦

醉翁亭倚碧山幽麗構新成此共游一代文章傳述作  
千秋祠館寄風流水寒石窟魚龍聚客散林坳鳥未休  
欲訪琅琊更深處野風吹暝下前丘

庚申元日彭城

南天旭景動千扉北極祥光轉禁闈岸雪颭風將臘換  
城雲裊樹帶春歸呼嵩漫拭常朝履祝華逢開舊  
賜衣二十餘年金馬闈江湖何地報 恩輝

送湯練川納言赴貳北太僕

勞歌載詠魯駟篇諫牘曾宣 帝甌前憶誦凌雲慙狗

監幾占貫斗識龍泉

公試南宮余謬校閱得讀其文

三千駮牝看槽檻

百萬攻駒待牧邊盛世奇猷君合展吾衰但贈繞朝鞭  
送葉廷尉少巖赴 召北上

三年省牘鏡中開幾閱玄湖堤上槐卿月忽懸鳩鵲觀  
法星猶照鳳凰臺歲殘鴻鴈平沙集春轉龍蛇大澤迴  
莫笑公車無結襪釋之今召漢庭來

辛酉元日

素髮詞垣老侍臣周南留滯六年身幸逢四紀休明會  
遙慶三元正始辰緹瑄律傳僊黍應青陽景轉 帝莫

新蓬萊御氣通璇極稽首祥雲是 北辰

西湖次韻

四月過新雨西湖羅綺春荷花嬌綠水妬殺采蓮人

月照梧桐樹一首和翁山人

月照梧桐樹玲瓏度清影不能墮君懷一葉下秋井

送人歸臨安二首

苑柳初垂御陌寒金裝白馬出長安煙花三月吳船夢

應繞中天承露盤

憶昔觀潮浙水樓尚思濤勢簸層洲君行試觀黃河漲

何似錢塘八月秋

孤鴈二首

北去南來侶盡分孤飛長自惜離羣已憐邊塞飄寒影

况入江天萬里雲

底事迢迢獨趁秋隨陽應急稻梁謀也知是處成羈旅

更覺孤飛得自由

文山起義張履翁以家殉之族人祠焉少宰龍湖先

生作二絕句因次其韻

丞相孤忠天漢垂白旗揚義憶當時傷心若論睢陽事

合有南雲配烈祠

桃花谿水轉千峯少宰詩題綵霧重借問先朝忠里在

金鰲古月照長松

西湖采蓮曲二首

二八吳娃學戲船  
米綃輕袿動如煙  
含情棹入荷花裏  
笑問橫塘若個邊

湖市羅裙映玉缸  
蘇隄楊柳拂船窓  
采蓮誤觸鴛鴦起  
飛向花間還自雙

送李星叟南歸和季泉宗伯韻二首

老矣著叢守白雲  
歸歟橘樹傲封君  
長安賈宋儕應少  
季主休藏卜肆羣

十八年前花柳春  
重來強半白頭新  
咸陽蔡澤問唐舉

卿相何曾換昨身


送湖西朱少尹赴順昌二首

七臺靈氣散繽紛  
玉作芙蓉幻綵雲  
我欲因風訊赤篆  
題書遙寄幔亭君

縣古虛廳自少塵  
松除流水更粼粼  
長吟花下閒無事  
好憶藍田記裏人

尹洞山集終

國家圖書館, NATIONAL CENTRAL LIBRARY, TAIWAN, R.O.C.



盛明百家詩 温大谷集

大谷名新字伯明洛陽人予同舉進士嘗爲行人爲主事望者而卒登第時卽有詩名然未見其集也甲子歲令子函野侍御來按吳貽予二温詩集始得略而刻之二温者其弟中谷二守與大谷同聲齊名者也隆慶改元長夏錫山俞憲識

雨

大雨來何暮愁顏忽一開簷喧叢溜下風急亂雲催時已逢甘澍田應破草萊滂沱看未歇翻恐逼樓臺

雪後和中谷舍弟

愚谷荒村夜隆冬此索居枕衾孤劍外米雪萬山餘病  
豈因消渴文應媿子虛豐年消息好欲上太平書

送李季勉令尹

積雨驅殘熱微風送早秋使君行色動對酒不能留檄  
捧憐毛義絃揮見子游丈夫方許國不上仲宣樓

村居九日寄左舜齊

郊館重陽日黃花爛熳開可堪新熟酒無語獨銜杯細  
雨妨人意低雲暗野臺梁園各有興安得好音來

病中得陳維鉉大尹書有感

故舊三年別音書千里來好懷憐我久愁思爲君開夢

許杯相把詩緣病苦裁汝南何處是悵望寸心摧

送馬大尹入覲

良令今能幾明公復妙年此行鳴玉地前度看花天宵  
宴聽宮漏春袍惹御烟明朝衢路上驄馬萬人看

恩榮即事

北闕春頒宴南宮午盍簪席隨三殿客樂聽九霄音文  
物崇昭代風雲感壯心歸來趁明月滿袖杏花陰

左順門接旨

掖垣清窈窕宛轉入金扉閣日暉暉上宮雲冉冉飛中  
官分帝命多士仰天威晝漏催亭午涼風滿路歸



懷朱工部嵩野李大行汲泉

萬里橫霄翼同飛憶往年分襟飄雪日翹首落花天氣  
節朱雲擅詞章李白先近來匡救力應有治安篇

懷春溪李子

客舍幽燕並鄉關楚洛分歸懷真遂我別恨却綠君花  
老啼鶯樹山迷過鴈雲臨觴與對局南望幾銷魂

宿靈寶

松院桃林館山城木葉秋我行聊駐馬訪古憶歸牛風  
浪黃河近塵沙白日愁鄰家好明月今夕自高樓

華州蚤發

客意窺關塞星言出華州柳墻循細徑月店數高樓燭  
引溪橋近風呼鴈鶩稍逢人問前郡聊得慰離憂

左少臣季臣張子東子舜子茂五子見過

雪罷山城風色寒夜深官閣酒杯寬漫勞賓客來兼味  
豈有文章共二難簫鼓喧闐文會洽關河搖落歲華殘  
扳留繾綣湏沉醉星斗微茫夜欲闌

真定夜吳朱周郭諸年兄小集

萬里雲霄散驥群北來忽漫此逢君盍簪不待音書報  
對酒還憐去住分海內文章吾敢並天涯兄弟爾何勤  
相看明日重相憶夜雨瀟瀟不忍聞

定州

北極行看近中山此日來樓城雄百雉煙霧引三台孤  
裊雲中塔叢芳雨後苔游絲院宇靜繫馬獨徘徊  
白溝河先世武功所在感而賦焉

朝行清苑市暮渡白溝河此地煙沙渺先人戰伐多野  
猶存大樹世已罷橫戈流水思鴻烈臨風發慨歌

送商少峰僉憲廣東

爲客丹青並論交十載前離觴今更把諫草昔常傳馬  
度冠裳國猿啼水木天銷魂萬里去驄旆幾時旋

送萬岑南富順令

月館杯重把花天馬並遊如何竟遠邁惜別幾遲留風  
雨孤帆夜關河萬里愁相思有魚素悵望錦江秋

和李春溪廢寺韻

野寺寥寥草色衰綠楊猶舞暮煙絲空憐掛衲叅禪處  
不復焚香入定時寶地珠林餘水月花雲佛雨罷臺池  
無端興廢增長慨立馬徬徨欲問誰

朔風篇送王復軒推廣平府

朔風吹寒宇寥落天雲黃之子駕言征明發車煌煌四  
牡擁雙旌道路飛新霜觀者嘆赫奕我心祗彷徨彷徨  
伊何爲去住成參商嗟余寡昧徒邂逅青雲傍談交意

氣投吐膽形骸忘花晨並遊珂月夕揮吟觴譬彼連理  
枝交結多扶匡感此綢繆情白首期同行胡爲雲中鴻  
遽爾東南翔迢迢武安城渺渺邯鄲鄉憑高望洛河欲  
度川無梁君去日以遠我懷日以長願言策崇勲携手  
登明光行矣不可戀泪下空淋浪

歲晏行送羅仲山

歲云晏矣霜雪晴長安道邊車馬鳴揚鑣擁旂瞻行色  
燕山秦樹空含情君去咸陽更南向劍門直出青天上  
懸雲石閣鎖丹崖捲峽江濤喧白浪白浪丹崖川路渺  
朱樓紫殿王門曉登堂展祀禮何勤客子聲名傳四表

蜀道風烟多峻絕君才况是關中傑停驂朝吐浣花吟  
尋幽暮駐青城節興來舉眼恣吟眺郾筒醉把聽猿嘯  
月明迴首鳳凰樓相思却整旋歸棹君不見周家遣餞  
賦皇華漢使窮源萬里槎今日送君重感慨明朝我亦  
天之涯

送陳平原覲旋

漢令平原異君才賈傅同雙鳧纔覲北四牡更言東驛  
柳絲絲綠城花樹樹紅幾時重會合驄旆九霄中

送游讓溪使南海

南海千山峻東風萬里遙 帝歸學士覲君駕使臣輶

鼓吹魚龍避樓船日月飄絲綸真有托不愧 聖明朝  
習池

昔聞少陵詠今過習家池下馬穿幽徑新楊蒲地垂青  
荷元自蓋碧水暗通溪謾有山翁興何由醉似泥

途中即事

客路傍江流江行是處幽雲過宋玉宅月眺仲宣樓旅  
食停山館穿林度野舟前驅休鼓吹堤上有眠鷗

野菊

重陽不見鄉園菊野逕折來更可憐爲客正當嶺海外  
逢花偏憶酒杯前荒英斷葉愁相把落日飛雲恨轉添

兩歲佳辰俱自負幾回欲賦不成篇

哭舍弟二首

花萼爾同輝如何中道違風霜來旅觀松栢鎖泉扉泪  
下幾時斷魂招不可歸鶴鴿原上月昏曉獨飛飛  
生別猶含愴其如永訣何草堂春自老朋好爲誰過影  
即雙鴻斷名存五馬多庭前有芳樹坐見拂雲柯

送張郭庄赴金陵

金陵宮殿倚天開燕市離筵此日催爲客休辭從北去  
上書偏許自南來雲間紫閣晨鳴珮月裏青山夜放杯  
並馬數年今夕散雙魚千里幾時迴

送李嵩少赴霍丘令

嵩少山人太白才十年宦跡混風埃如今更向霍丘去  
前路爭傳漢令來六翮雲霄終一展二毛於我共相催  
臨行對酒休辭醉明日江天猿嘯哀

三秋雜興

南海歸來鬢髮凋西風起處旅魂銷病憐漂泊依京國  
老覺身名愧 聖朝秋色暗催白露下故山常共碧天  
遙暮雲涼夜生愁思短榻踈燈坐寂寥

送劉嵩陽冊楚藩

雪日飛旌出 帝州玉壺載酒送行騶丹霄雲擁天

去青瑣人傳諫草留楚甸鄉山應駐馬洞庭春浪好移  
舟知君最切匡時念細采民風上 冕旒

候朝即事二首

繁星粲春宇煙景流晴光華燭藹繽紛綺陌相輝煌君  
子駕言朝環珮何琅琅至止固云夙其好夜未央天門  
尚氤氳霧露霑衣裳假寐候晨鐘飛雲覆苑墻 皇情  
雖罔測勵精諒靡康定知頻問夜無用鷄鳴章

象闕扃金鑰瞻光湛瑤空星河漸熒微袍袂來寒風庭  
燎旣以燁觀祈亦以同彷彿聽鳴鞘遽爾歸洪鐘旗采  
散羽林鷺序輟層墉豈不願瞻對無乃勞 聖躬臣職

苟無懈 帝鑒諒有庸再整詰朝珮更待曙光融  
梁館賦懷

此地今何夕梁園四月天館開初繫馬葉密欲鳴蟬明  
滅星河色逶迤棟宇連夜深清不寐花影上嬋娟

秋日同張寒泉送別鄭一山謫澄城令

積雨涼颼夜客堂清讌開我隨張仲至君似賈生來苑  
外青驄馬燈前白玉杯相留須盡醉明發各風埃

送兒子如璋赴試

行矣厲雙鬪層霄合遠飛秋風吹寶劔白日吐寒輝舊  
業須吾念新聲願爾依歸來隨使節直上紫雲扉

藥城陳遜齋過訪

悵別驚殘歲過逢共此堂陳蕃能解榻李白故揮觴寒  
爲留人減情因問訊長不堪重把袂門外已斜陽

送陳虛峯冊使

御苑青陽近王門紫殿遙天書催曉發雲旆引征輶驛  
閣梨花月江城楊柳橋到時燈火夜羅綺醉元宵

入京

京國重來日綸音一度旋卜居辭遠市官閣易朝天寒  
榻連衣卧踈燈徹夜燃夙興問更漏心切玉墀前  
望淮亭

畫棟雲中起清淮天外來不緣高宴會何以共徘徊掛  
席飛蘭漿鳴簫引玉杯憑虛覽形勝日暮不能迴

送馬元岡南歸

送君歸白下覽眺一悲歌楚罍賓朋散吳宮花草多賞  
心時對景吊古更行哦回首能相憶秋風鴈早過

溫大谷集終

盛明百家詩 續王僉憲集

仲山兄詩篇刻成集者四年餘矣四年後所積稿又  
盈帙予得而請益焉乃刻續王僉憲集集中諸體畧  
備曰七古稿一曰五律稿一曰七律稿二皆其所自  
定也隆慶己巳春年家俞憲汝成父再識

寶界山居王崑崙惠詩用韻走筆酬之

翛然拂袖歸五湖青霄萬里一片江雲孤鼓棹東流唱  
漁父持鏡斲雪隨樵夫青霞館裡申雙足冉冉晴暉下  
西麓老病方瘳亦感時斧薪爲煮桃花粥有時醉飽微  
吟懶着巾彊起書裙不滿幅片帆湖上吹長風勞君訪

續古今集 卷全  
我於雲松鶴竚叩門春尚早東園杏花殷復紅把君煙霞袂覲君江海容下山投我短長句恍若高山流水絃枯桐憐君自是求羊客豈謂花間偶相識肺腑中藏萬斛冰清寒浸却磯頭石藉君述作遊蒼山秋風擬醉茱萸集珠履下堂呼不來把臂貧交久相得君不見雕盤厭飫紅虬脯籬根雨突烹葵苦西風白楊愁殺人總是北邙山下一坯土又不見西狩崎嶇蜀坂泥故宮淒斷咸陽雨論心未已君解携渡口相看日當午

釣歌春日臺上作

世人取魚皆曲釣我獨信釣不脩餌臺前雨過携長竿

閒掛江雲漾溪水輕風習習吹人面溪上露桃初爛  
葉底流鶯盡日啼轉眼芳菲又消散君不見昔日華林  
園銅龍對吐香泉溫玉輅臨池蕩荷慙香羅紫帶如雲  
屯此地幾番經戰伐祇今唯有孤兔落日悲高原我昔  
驅車出東魯曉遂征夫問前路丹閣朱樓天際頭銀橋  
上下迷花霧歸來東水津恬澹願我神軒冕豈不貴棄  
之若埃塵藜藿豈足飽守此甘賤貧天地之間卑高以  
陳並生並育孰非周親茲晨光景相鮮新萬物與我皆  
同春寧隨齷齪臨淵者曲物取魚傷至仁  
壽是堂年兄六十



春風昔日花滿川與君同醉曲江邊滄洲一卧幾華晚  
君猶少我逾十年回看風塵俱皓首麟閣勲名付何有  
嗟我世事多遺忘羨君著書堪不朽綠蘿煙煖鶯聲和  
三園巖岫連薜蘿向平之願蚤已畢還期百歲常相遇  
東郭夕泛

霜林如綴錦寒水清若空蓮舟颺落日迢迢順歸風卷  
帷過戲蝶流目送飛鴻自下長川去招尋桑苧翁

九日訪同石上人于東郭白社二首

沙際一僧立秋風艤棹初相邀入白社塵想坐成虛饑  
雀下庭石藤陰落綺疏藏經更無地終爲結精廬

西風吹白笠散步出城陰並作悲秋賦方知對節心繞  
門江黍熟入座海雲深願托裴居士時來聽梵音

點易臺有感

點易人何在林端空有臺雲泉久已闕寧有露珠來竹  
色傷心碧山風拂袖迴乾坤不盡意千古更誰開

用石南韻詠春雪紅梅

可憐梅格在曉發霜林端避雪自羞素含春初吐丹馳  
輝江石麗流艷綺牕寒不知頭白盡猶作去年看

積翠臺賦得二首贈石南

臺上結陰霞倚梧落翠華人披高士傳境是列仙家坐

久翻珠斗吟成吐玉花月臨星渚近擬欲泛浮槎  
梧老碧叅天秋風多暮蟬臺端溽暑盡人意自悠然君  
至喜一晤心空澄萬緣月來欣賞遍不在酒池邊

春日與同石過禪悅院

春風忽云暮出郭試羅衣江草綠應遍林花開漸稀偶  
爾逢僧話澹然忘世機晚過圓覺院見佛更堪依

麗藻閣懷華補菴二首

久淹虛閣坐花氣襲人衣更欲偕心賞無由見德輝院  
深林影暗晝靜鳥聲稀言念耆英事風前悵獨歸

一上菰川圃潸然淚蒲衣水亭猶返照花砌有殘輝木

楊豈復下蘭言終自稀向風題短些惆悵暮方歸

過洞陽溪莊

霽日登樓望山風灑薜衣尚留川上詠想見使君輝花  
落重門掩苔深過客稀自從傷日暮那復送春歸

送楊三徑往茅山宿華陽洞水石山房

老至始好道三峰禮白雲更尋金洞主重勘斗樞文首  
夏草逾碧仙壇路不分莫隨星駕去溪上正思君

又寄同石

釋子棲禪地松門午未開法雲常不去花雨忽飛來自  
得無生悟虛疑幻劫催欲依龍樹戒半偈爲君裁

春日往山居作贈石南用韻

結廬在水隩仍倚西峰高  
緬懷滄洲吏邂逅元龍豪  
同泛湖中棹蒲葦花下醪  
正逢春雨後舉網得銀刀

送鄭石南還包山舊廬

寒水抱江城沙頭人送行  
落日乘潮去孤帆一葦輕  
浮天鑑濶淡淡島雲平  
蓬門對風嶺度盡長松聲

貽月田上人

爲切皈依願結廬東水津  
盡融諸藏法應是梵王身  
雪月龕中夜鷺花界上春  
莫言今幻住千聖本同真

登釣臺懷同石

水檻落平川江雲清遠天  
幾來舒晚眺終是惜殘年  
幻動迷真性齋居結靜緣  
思君西嶺下且暮自依禪

偕法空同石上了堂懷舊

隨意到僧房一庭寒日光  
憶曾宣了義常自愧行藏  
徑草經霜短巖松帶雪蒼  
無由訪圓寂歲暮更倉皇

病中苦唵鑑兒諫止之後有是作

不禁垂老病玄漠守無爲  
何事耽詩興空齋勞寤思  
憂來寒雨夕溪靜遠鐘時  
三復楞伽呪幻心終遠離

雪夜伯兄一嘯樓燕集以詩招予不至故贈

江天雨雪時城漏正遲遲  
嘯閣自多興幽人空爾思  
飲

停看剪蠟柱冷罷彈絲今夜懷中醉唯君有党姬

苦雪

積雪擁山扉寒深過客稀朝雲將避日夕霞又侵衣露  
井冰花粲薰爐火力微雲安何處有一爲解愁圍

奉和是堂年兄元旦即事一首

獻歲梁溪上欣知氛祲微東風應節至吹入薜蘿衣人  
事有遷化閒情無是非梅柳元相傍江湖舊有磯仍將  
待臘意翻得弄春輝旭日臨芳甸晴雲團竹扉幾年歸  
栗里老去更忘機

贈三徑嶧隱居

草絺衫袂疊紗巾眼底唯君出世人半榻閒雲松嶺夕  
一畦芳草石田春露冷豈知蘿是屋道高常與虎爲隣  
嗟予自比山園子願得相隨一問真

嘉靖乙丑夏五望後石南外史至自洞庭攜訪綠蘿  
菴野橋同石諸君皆從詠訶竟日別去

暇日持竿上釣磯磯頭細雨如絲飛風吹野岸花空落  
水漲平川鱖正肥玩世襟懷常自得狎鷗心性久忘機  
故人天外勞相訊寂寞深江獨掩扉

疊韻述懷

純純弱柳隱漁磯苑外芹香紫燕飛雨浣桃谿紅早溜

氣蒸江墅綠初肥已無白壁干時好自有高齋息世機  
玉塵玄言談未了西峯暮色下雙扉

別石南再疊前韻

水漲平湖盤石磯波光千頃一帆飛滿園朱實秋風早  
繞舍青畦夜雨肥裘客棄金休問姓丈人抱甕已無機  
玄經未草揚雄老長日嶺雲團竹扉

再疊韻

茆屋數椽依石機秋來時見一螢飛殘紅泛水芙蓉老  
寒碧映波菰米肥曾於至道窺玄默錯把靈根認殺機  
草得絕交書已就邇來三月掩荆扉

贈同石

爲卜雲菴傍釣磯暮春時見柳花飛枝頭謾轉流鶯細  
沙上閒眠乳鴨肥獨把玄珠藏世界幾聽仙梵發清機  
支公出定閒如此只放許詢來叩扉

贈別石南

白首相携上釣磯閒心長伴渚雲飛清風半席暮潮急  
新雨一川春水肥憶自別來添遠夢益從老去厭塵機  
蔣生有徑延裘仲願得常常叩板扉

出東郭觀稼

江雲帶雨拂漁磯野菜滿畦黃蝶飛新水護田春餉急

青煙入樹午陰肥九阿垂穎看秋色三寸靈苗轉化機  
幾處謳歌滿歸路輝輝殘日上林扉

雨牕同野橋萊山訪同石

一川新水拍漁磯城上江雲猶自飛斗酒偶從諸婦得  
鱸魚豈羨松江肥喜同嘉會逢今雨那復風塵說世機  
况復慧師新換骨不妨終日閉禪扉

贈野橋居士

憶從仙史到星磯歸去仍隨北鴈飛古華山中雙檜老  
梁溪渡上綠茵肥閒尋野宿依空界坐對老禪談道機  
白比顏貧居陋巷一間茆屋板爲扉

磯頭自嘲

自傷垂白坐苔磯壯志如灰濕不飛祗爲氣衰疑入瘵  
幾因義勝轉稱肥欲探岐伯靈樞秘終礙壺生杜德機  
猶復分宵著書卷一燈寒照碧山扉

同年是堂臬長與西巖潛坤三徑諸逸老結社慧麓  
以詩招予予病不能入也奉韻爲詩謝之

使君結社山之陽林壑光昭牙繡裳良辰嘉會不再得  
酒債詩逋常自償結思儘追唐正雅考辭終是漢文章  
病懷減却陶潛興徑裏黃花徒自香

贈姚山人七十疊是堂兄丈北園之韻

皇山老樵七十餘窓下草根秋不除手抄素書架萬卷  
靜夜寒聲落蠹魚浮雲滿眼心如石出門看天天爲碧  
每將法語戒時人一寸心田有竒植我初識君俱少年  
狂歌結伴溪山前老來更作驚人句茶夢閣中常獨眠

盛明百家詩 茅副使集

茅允鹿門名坤字順甫浙之歸安人予同年進士官  
止大名兵備副使平生喜詩篇與潯陽董宗伯齊名  
爲丹徒時屢遣吏人持策請題來簡云不知者謂我  
得隴望蜀其知者謂我好文如貪也兵備時又簡云  
得兄高篇當爲南還第一品矣其酷嗜類此蔡白石  
乃云鹿門兄文勝于詩今止錄其嘗贈予者數篇虛  
木以俟他日隆慶改元夏是堂山人俞憲識

同是堂兄渡淮忽復相失賦淮南鴈一首

淮南一行鴈遽爾各翻飛落日長鳴侶清秋何處歸雲

山空迤邐江海復分違安得邀天路聯翩入帝畿

贈聊城陳醫

齊南賣藥肆問姓即韓康海上仙人草壺中玉女漿身  
常跨白鹿手自注青囊吾亦折肱客從君乞異方

贈王東華年丈

終軍數請纓諫署早知名未雪匈奴耻先投嶺海行棄  
官勿復道逃影欲何營倘過燕齊上應訪安期生

寄侯二谷

中林臥已久曾訪赤城無未擬形嘲影還將爾喪吾口  
普遍百草手法只陰符蒲告未須出應憐三徑蕪

讀萬鹿園赭山戰後之作次韻酬寄

將軍解印東山臥翻着儒衣強勒戎門下齋僧爭舞稍  
園中斲卒亦擐弓共看海島妖氛滅不數樓船膽氣雄  
猶道婿君曾戰沒暴尸馬革未論功

秋日江上寄何吉陽光祿

幾年同作悲秋客今日獨尋芳草堤門下談經憐舊侶  
省中供奉憶新題愁當白露江流滿望入晴原野戍迷  
爲報平津衆賓客董生今已相膠西

朱射陂再補南刑部賦詩寄之兼呈潘太史

聞道仙郎耽寂寞分曹再向鳳凰臺初憐太史周南滯



又見玄暉江左來  
樹裏碧湖春並騎  
省中芳草夜銜杯  
亦知霄漢携遊處  
不讓當年鄴下才

南山行四首爲梅林司馬賦

行行入南山  
靡蕪日以深  
不見津亭吏  
但聞鼙鼙音  
夕陽猶在樹  
谷風起中林  
下有種苴歌  
歛歛傷我心  
我心空自摧  
太息今與古  
上山多饑禽  
下山多猛虎  
道路寂無人  
日暮楚三戶  
停車一以悲  
深林有巢父  
巢父無名子  
相對語瓜田  
夜聞李都尉  
醉獵南山前  
射殺白額虎  
飛鳥落青天  
歸來感往事  
叱咤黃金鞭  
金鞭勿復揮  
古來事如此  
仲連破聊城  
辭爵歸田里  
子

房定大漢言從赤松子  
何如酌金壘酒酣猶熱耳

叢山關曉發

山色秀可掇  
况復游子襟  
涼雲寫曲澗  
白日耀高林  
竹間露猶泫  
巖阿風乍沉  
人烟互葱蒨  
樵路仍嶮嶮  
安得携良朋  
於此援鳴琴  
拂衣一鼓調  
山水揚清音

與徐汝寧對奕

涼颼振輕裾  
言訪二千石  
相悲復相歡  
邀我南軒奕  
一着鴈行飛  
再着蛇盤立  
賓主共連翩  
楚漢起呼吸  
白眼互雄雌  
多筭競曲直  
勢若奔濤來  
狙似流星擊  
質子欲分功  
劫地復償失  
勝負倏忽間  
日已漸西昃  
輟局俯流

光自憐還自適持以對樗蒲天地聊一擲

贈廣德趙刺史

予本澹宕人夙昔寡諧世久矣簪紱緇願將丘壑閉豈  
謂尋山屐翻從候郵吏賢哉二千石侗儻特好士握手  
許石交傾蓋締蘭契佩我寶錯刀邀我青絲騎信陵轡  
愈恭陳遵轄仍繫白駒風已遐斯人迥何似璫玖無以  
申白首勿忘誼

寧國道中有感

羈旅總蕭瑟况復晨雨飛荆棘夾路濕盈盈霑我衣谷  
阻樵採絕林暝人烟稀馬蹄澁山橋郵傳滯征驂游子

望故鄉渺渺情何依薄言愬天風淒愴歌式微

盛明百家詩 二莫詩集

雲間故有二陸子齊年中江莫子良氏橋梓輝映可  
稱雙璧予爲刻二莫集集出是龍雲卿手蓋善承子  
良意者子良名如忠戊戌舉進士官禮部以提學憲  
副謝病家居歲久復起今爲浙江左轄雲卿號少江  
今爲諸生隆慶戊辰春仲錫山俞憲汝成甫識

海虞觀吳公子游祠 以下中江集

乾坤秉靈運文學在鄒魯褒然二三子含英萃中土爰  
自勾吳來餘風沿左語卓彼間氣豪宏朗邁千古負笈  
遠行遊依歸得尼父斷斷洙泗間吾道若大路昭回耿

雲漢經緯彌寰宇伊誰導斯文流波日南注遂令江介  
區禮樂紛馳騫余本希賢徒未展平生慕桑梓歷遺墟  
俎豆觀章甫載拜景令儀徘徊不能去

望廬山謠

我浮沅湘道沔鄂夜宿潯陽江上郭郭外澄泓月浸波  
繁陰一片橫江落乍疑天山雪半披還似燭龍銜火光  
芒下照崑崙西我驚起視仰攝息試向居人訪竒跡  
從城上望城南云是匡廬今始識匡廬山高高入雲千  
盤萬疊羅錦紋瀑布空濛相映帶香爐烟靄相氤氳  
賢已羽化矯矯離人群黃鶴去不返青猿啼或聞行人

不道滄桑變却指名山來鄉縣彭蠡東南缺地維巨鰲  
合湧靈峰獻入楚山川自此多荆衡南下向牂牁攀危  
陟險路不極我將何處巢雲阿山靈爲我言畏途君莫  
前只今陶謝風流地期爾歸來問白蓮

賦得澗口落花

野館花如霰芳菲夾路通餘春猶解惜浮向綠波中乍  
擬洄沿態俄驚歷亂紅色隨香不住形逐影無窮骨存  
牽爲蒂沾枝聚作叢洞門潛復出澗處見還空濺濕長  
疑雨乘流易颭風禊亭觴共汎游女珮堪克采折何嗟  
及榮華詎復同獨將幽怨意零落御溝東

明月引

寶鏡中天瀉金波大地浮濯輝仙掌露拂影絳河流古  
木烏號夜遙空鴈度秋關山聞笛處誰不起離愁

贈董子元移居城南二首

選地初成柵移家學避名何言在城市翻喜叩柴荆就  
竹宜開徑臨流可濯纓園蕪應不掃知有下帷情

一畝城南卜悠然水竹居貧何嫌委巷靜喜傍精廬鳥  
下翻經後風踈展簟餘倘容陶處士終日過籃輿

泊舟西城

經甃城西陌幽尋偶重過閒門荒草合廢壘夕陽多對

循溪攀翠巘振步躡蒼苔孤島凌波出飛泉觸樹來石  
衣蒙葛藟僧供摘楊梅太息雄圖盡千秋掩夜臺

村行

墟里入林塘源花斷續香雲深縈鳥道沙圻隱漁梁比  
屋桑麻業居人薜荔裳別成淳朴處疑入養鷄鄉

園居三首

初服返衡門聊因避世誼誅茅爲棟宇負郭擬山樊頗  
狎禽魚樂彌親農圃言下惟妨懶性不廢日窺園  
端居寡營慮瀟灑出塵氛生事觀秋水遙心送嶺雲澤  
行蘭入佩林卧鹿爲群即此堪長往寧論蹈海濱

結廬何必遠屋後亦桑麻瀑水分林注叢篁引徑斜  
經畊綠野留客釀黃花日入荆扉偃何如五柳家

送富恒貞落第南還因從師毘陵一首

不第無嗟屈青雲未後時且傾南市酒莫詠北門詩  
鴈聯歸舫秋花滿故籬握瑜應自愛豈合數常奇

賦徐奉化村居

藝植成新圃栖遲即舊山文隨身共隱心對鳥堪閒  
采巾車出行歌拾穗還東郊惟素業不用掩柴關

淮陰城懷古

荒原仍穴兔釣渚自飛鷗感嘆千年跡蕭條一古丘

帆淮浦月飄葉海門秋莫問封侯事君看逝水流

聊城

濟北爭雄地遺墟尚可疑秋風鳴劒戟野哭想瘡痍  
一矢論功日孤城委命時獨憐天下士憤世意何爲

人日

歲序迎韶月欣欣動物華霧中初辨柳勝裏忽驚花攬  
鏡蒼顏入當歌白日斜人將年代謝太息此生涯

聞呂沃洲在告

海上瞻霜節天邊隔禁扉相懷如夢寐遙夜擬音徽  
玉笈長生秘玄言杜德機聞君有幽意早晚拂朝衣

馮同年兄弟招集禪房同一二山人夜話

蓮社依三徑蘭襟挹二方共言多實地還是聚星堂叩  
寂塵逾迥論心夜未央一爲招隱曲丘壑意難忘

遊寺

香界追攀十載曾薜蘿深處翠微扃齊梁古跡譚雙樹  
水月玄心鏡一燈山鳥弄晴春冉冉閣雲凝碧晝冥冥  
投簪莫訝歸無侶猶有逢迎白社僧

題三江別意卷贈龍掌教擢留都國子助教

憐君五載周南滯此日孤帆白下程官秩稍遷秦博士  
春風悵別魯諸生臨雍禮覩環橋盛清廟絃稀太古聲

聞道卜居將有意誅茅須遣近柴門

謁莊定山先生祠

漢家夫子漫儒名濮下卮言祇叛經世降幾人聞大道  
山高何處仰遺靈千秋薦藻荒祠在四壁懸蘿故宅扃  
借問九原如可作爲君投綬等浮萍

寶雲寺懷顧野王廢宅

空山斷碣古苔侵高士風流跡已沉遺草獨看傳竹素  
布金誰爲乞陀林讀書臺伴香雲宿洗硯池經浩劫深  
惟有淨緣依法界到令江總獨傷心

代東郡大夫一首



乞身廿載放林泉一掩蓬扉息萬緣醉後枕書投石榻  
閒來抱甕汲山田回瞻北闕天應遠漸老西河世所  
捐獨有吳公今在郡憐才誤比洛陽年

出山漫賦

自笑機心久未忘一官重拜遠浮湘身慚懷寶同燕石  
客有過門甚楚狂白首揮戈回落景玄冬秣馬踐嚴霜  
平居漫切蒼生念涓滴何由補望洋

朱仲和奉親之金陵

秋風何處覓原鵠季子將軍向石城此日星文占內史  
太君高駕正東行

白公祠三首即邯鄲夢處

雲白風清鶴駕迴蒞珠宮闕望中開仙人汲處留丹井  
一道寒泉瀉玉來

熟罷黃梁歷幾春百年身世等栖塵獨憐夢者還占夢  
舉世知誰夢是真

出世翻嫌有世情欲將衣鉢付盧生傍人不解師心苦  
拋却明珠掉臂行

巫山高

以下少江集

巫山高不可招陸行無車使我心勞江水深杳難尋欲  
渡無梁使我心傷我思之人天各一方山川悠悠音容

渺茫赤鯉波濤迥冥鴻關塞長徒有數行淚夜夜沾衣  
裳相思苟不見不如兩相忘

關山月

莫問關山月朝向胡沙暮投越離別何必然長途自古  
關山老役夫桂影乍流青海外寒光直照白狼居閨中  
少年愁夜長自捲流蘇月到床此月從來有時滿人生  
別離空斷腸機中織就鴛鴦字鴻斷天南渾不寄遲將  
明月訴新愁明月長隨隴水流借問征人歸未得關山  
夢杳無消息幾回含淚喚嫦娥夜半清寒柰爾何

鷄鳴

雞鳴何如矯矯拂羽東烏未光落月承宇志士反側  
之起舞此生何爲蓬累踽踽振我衣裳坐以待曙

遊回山園亭

驅策出郊曠繁林靄青葱駕言事探討良友喜與同  
汎蔭喬木輕嵐隱危峰山花競迴春風意歷落穹徙倚  
千仞閣縱眺天界空夕陽紅  
長風紆鬱情  
爲舒清歌興難終飛  
水集群  
彥茲遊嗣芳蹤悵彼美人  
三

風雨蔽荒廬

風雨蔽荒廬貧士憂其生  
功與名俟

命庶不惑行險非所宜  
康世界毋以辜壯齡中宵  
籬花及時振華榮秋夕霜露交  
泣矢志當何成

詠懷詩

風雨無昏旦兀坐高城闈秋陰或易開幽抱難具陳  
首獨念之百慮來相親誰云酒蠲愁酒盡愁復新  
會有時工拙亦在人老氏貴懷玉儒者重席珍  
常業闔戶全其真冰炭任所施有好在德隣何能振  
步青雲致吾身酬此從俗願庶免栖荆榛

懷秦景陽施玉華二子

當尊每不展世罕知余情未足寫襟懷寧須示姓名  
人俱何處大雅誰相賡幽抱看瑤草中宵轉箏箏

秋夜泛月龍潭聽賈客吹簫

空潭浩渺秋如練竹樹千家隔波面獨倚飛盧泊夜潮  
冰輪一片林端見江頭賈客幾如何參差紫玉聲嗚咽  
欲絕不絕還更續飄飄入雲多恍疑清籟自風舉  
又似孤凰求鳳侶泣盡鮫人百斛珠  
江南八月烟水深魚鴈寂寥鄉國音我亦聞之不能寐  
曲中誰念客苦心一從簫史僊遊去嶰谷枯篁有幾行

今宵若遇玉容人青天定有駮鸞處

春日過龍潭訪方山人不過

問客投蕭寺飛樓一水臨因非生幻想與佛證  
草餘春色曇花自夕陰含情不可見幽音生

送雪和尚遊方

法性元無住行行躡萬峯如來傳正業  
鉢春江雨投齋晚寺鐘草堂寒不鎖今有尋

賦芝草壽友人

茹秀歌秦谷含靈紀漢宮名傳九莖異瑞擬六英  
露滋金液春雲煖玉叢遙知來五岳採擷向杯中

余客游崑陽病臥顧茂倫齋中抵舍寄謝一首

歲序客中感艱難病後知同袍幸相託異姓即連枝  
暗青萍色慚依玉樹姿義高苟巨伯彌重別來思

冬日與梁伯龍宋初陽馮子潛訪招隱園

十里出江郭名園訪隱來溪聲迴檻入山色傍檐開  
留客閒雲榻催詩落日杯座中摘藻者多是小山才

夏日與吳門顧伯子周山人及一二同志集顧氏西

園

暮雨散江郭條然竹樹繁重林隔煩暑一室晤清言  
不負西園約同傾北海樽論交重嵇呂千里命飛軒

訪周學士

共言懷夙好十載重違君  
倏爾凋青鬢依然臥白雲  
高標霞外映新詠座間聞  
自笑樊籠者何當入鳳群

過城南禪林訪無波上人山房

竹樹傍幽麓蕭疎一逕通  
黃金開象地白法秘龍宮  
並命秋山裏孤尊晚照中  
清游從七子鄴下有遺風

留顧茂儉

客中秋易盡落木黯驚神  
燈火銷清夜尊壘戀故人  
相看交道古誰復世情真  
廿載衣裘色蕭蕭京國塵

沈大叅園亭再得花字

喜奉休文讌東園勝可誇  
芳樽移暮景綵翰接春霞  
入逕樓藏竹開軒檻對花  
留歡殊未已歸路莫言賒

贈陸生名遠

年少風流重陸郎名都花月馬蹄忙  
論功早謝封侯賞  
好俠多從結客場  
新學五禽探妙訣  
舊彈雙鋏助清狂  
看君一指還丹術  
金鼎空傳肘後方

贈洪山人霍山人故大司馬胡公幕客也

廿年踪跡自支離把酒能談五岳竒  
遠興每將瑤草寄  
雄心不負寶刀知  
圖書夜月空山侶  
裘馬春風故國思  
聞說西園清燕罷  
更於何處定交期

夏日與袁黃州履善集何伯子曇寶并與吳門王生  
道故

日日江城臥積陰，緘題忽枉慰招尋。  
十年意氣珠難合，一夜襟期酒易深。  
愛客自來稱北海，論交還擬重南金。  
馮唐白首猶郎署，朝市多應感陸沉。

十八夜讌集倪公甫

華館邀懽夜未央，西樓寒月正蒼蒼。  
芳尊坐映青雲色，綵筆爭傳白雪香。  
十郡英游成合并，六朝遺跡豈荒涼。  
羈懷易覺秋容盡，階下蕭疎木葉黃。

鳳凰臺

一逕幽深竹樹寒，崇臺百尺倚晴巒。  
坐將雲物杯中變，行迫星辰掌上看。  
丘壑幾人能濟勝，風塵此日共彈冠。  
亦知靈翮游千仞，應有文章動綵翰。

顧仲方招隱園

清秋乘興訪名園，巖壑蕭疎桂樹繁。  
花外朱橋緣斷岸，竹間蒼岫引飛軒。  
空山猿鶴堪招隱，滿地烟霞久避喧。  
翻笑淮南重方術，八公徒著養生言。

寒日與何翰林登虎丘時郡太守禁游讌  
山色雅靜  
因坐移日有作

林丘寂寂對寒暉，半鎖荒苔立馬稀。  
何處齋鐘心共共

當年歌管事全非空潭雲氣生衣冷幽壑泉香入酒微  
盡說高陽罷游讌尚容山簡醉中歸

贈王思城

戚里繁華事盡休五湖空寄一扁舟可憐白壁埋貞士  
無復青門問故侯鄉國幾懸今日淚交知都異昔年遊  
即看聖世恩波濶客路風塵祗暫留

和友人十四夜泛月

何處清遊試木蘭蒹葭極目水容寬江門夜迥猶聞浪  
澤國秋深易作寒槎近河邊機寂寂珮分波面玉珊珊  
高情共戀良宵永坐聽天鷄振綵翰

贈盧次楸一首

羨君詞藻似鄒枚曾擬梁園作賦才白石歌殘身未遇  
黃金揮盡志堪哀江南草色烟中遠薊北山光馬首來  
萬里行行從此始斷雲孤鳥獨徘徊

懷秦子仁季

經春爲客抱沉疴深夜懷人入夢多玄思欲騰非馬辨  
清狂誰和飯牛歌樽前意氣遙相憶世上紛華近若何  
寂寞山堂感離索蕭蕭風雨集庭柯

瓊姬墩吳王夫差愛妃葬地在金鏡湖上

館娃昔日侍君王千載遺墟草樹荒雲冷翠帷消艷質

月浮金鏡倚殘妝  
忽辭寵渥先朝露  
空以蕭條伴夕陽  
自胥臺走康鹿  
不知誰復識高唐

和韻

密到雲林暮景斜  
竹房幽處護烟霞  
留君共盡清尊興  
數借慈燈照落花

戲答周山人

何處吹簫憶鳳樓  
王孫芳草夢中幽  
何須更說當年事  
只在城南有莫愁

二莫詩集終



盛明百家詩 曹子野集

曹子貞名大同號于野南通州人嘉靖間以歲貢遙授光祿寺署丞家素饒裕讀書城南別墅建有玉芝樓頗勝其所著詩賦因名玉芝樓集陳司空梧岡嘗序其首稱君不愧山人山人之文蓋搜奇抉隱肆力刻情可名一家者梧岡名堯登壬辰第嘗與予同賚捧交情迴出時格予知梧岡又因是知于野云于野集上下二卷共采詩賦九十餘首隆慶辛未秋孟隣郡是堂山人無錫俞憲氏識

靜勝軒賦



粵吾生之寡尚兮構茅葺以藏匿溘世氛之溷濁兮準  
索處以韜默莽荆棘之枉行兮安賁趾且焉止息去衆  
人之佻巧兮守樸鈍以堅飭巡簷隙以嘯詠兮閨戶櫺  
以沉抑爰避影於赤日兮抗軒冕以自得原生澹其處  
困兮翳蓬蒿之滿殖顏子貧而樂道兮曾操瓢而有憂  
色則英賢之遺篋兮每嗜脩而崇方豈不願被文華於  
四耀兮揚令德之芬芳翩黃鵠之翮奮兮吐驪龍之珠  
光彼寔混涇渭之濁清兮亂鳧鵠之短長守眈眈謂真  
曠兮攻蹶躄爲行妨登蹇蹶於前軒兮置駿驪於側旁  
淫桑濮之嘈聒兮九韶寂寞而弗揚伊誰哀時命兮恒

愀恍而不返顧孰若從吾之好兮執靜樞而鞏固縱肥  
癯之異觀兮敢紛紛之改度屈子之貞專兮訴湘淵而  
蹈赴賈生之通達兮係長沙而駐足豈淫逕之可遵兮  
令余行之愆素炳茲軒之虛寂兮規閔雜於一真收視  
聽於蒙滕兮安神魂於不驚地沮洳又蕪穢兮介四水  
以爲隣網蛛絲於門楹兮印鼠跡於牀塵踈絃古澹而  
自泛兮靈鏐陸離而與親甘皓首於蛾眉兮祗姁媮之  
自珍矯鸞鳳之翩翩兮蟄龍蛇以存身隱余軫於彳亍  
兮浣慘惻於邈迤託松栢之幽蔭兮招鹿麋以爲伍俯  
堵之湫溢兮猶采椽之藻斧駕柴車之朴素兮亦華

冊之相輔等羨藜於瓊靡兮齊衣敝於繡黼窮匪通其  
不鄙兮賤無貴以何忤信定分廓其無求方任螾爲龍  
而鼠變虎巨墟曲之葵亂兮采蘭芷於漢潯旣樛散之  
乏用兮燦文鷲於高深淨爾躬之瑕垢兮又惡用泣卞  
氏之名琛攬少微而效光兮揭斗柄而酌斟縮長河約  
之帶兮礪泰華以施簪挫萬化於方貞兮撫一瞬於古  
今駕青虬而驂白螭兮召豐隆導之璫林詠九招與九  
歌兮又奚惜寡和於余音亂曰切雲危冠鏘佩蒼璐兮  
超回志度完此蓀美兮紛詭不干用紆佗僚兮除穢反  
真逃匿陴側兮脩姱練要佳人未都兮懷質抱情容真

茲軒兮

上之回

蕭龍駕法乾旋西避暑東祈年群官從星麗天劔履翼  
旂常懸歷鳴澤遊昆田臣月支克左賢神心愉帝威宣  
樂孔博萬壽延

折楊柳

臨岐復映水春色劇堪憐攀折聊爲贈相思入管絃花  
飄金屋雪枝暖玉樓烟遠戍盧龍塞羞將愁緒牽

紫駟馬

繡陌戲揚鞭輝光美少年玉鑣金鏤鈹寶鞵錦連錢來

往弓刀捷功名竹帛宣交河烽火急一夜度桑乾

行路難二首

君不見銅雀臺娥眉睜眦同灰埃君不見阿房宮黃塵  
四起碧瓦空綺羅珠玉今誰在高塚壘壘人代改日月  
西徂若迅湍嚴風頃刻侵苔蘚百年不保千金軀可憐  
不飲下黃墟

翠娥素腕起怨尤羊車不顧長門愁少年不沐君王寵  
枉令朱顏成白頭丈夫處世轍輾復如是拔劍四顧髮  
上指行路難前有虺蜮後虎兇世情磷薄惡衰賤高車  
結駟人所羨耻向王門稱曳裾羽翼不得橫天便何不

飲吾酒擊吾缶仰歌嗚嗚耳熱後君不見汨羅抱石空  
自沉楚和雙刖罪難任

自君之出矣

自君之出矣珠翠黯無精思君如春葉逐日苦心生

短歌行

置酒華屋殷憂填腹人生幾何曜靈飛速頽波赴淵稿  
葉辭木來者無淹逝者不復維馬洋洋維車轆轤云胡  
勞生榮利微逐斥鷃卑棲翔鷗高育各葆其貞雄號雌  
伏伐絲比簧召我類族蘭膏載然朝以繼宿悲以別章  
歡由會蓄豈曰無感崢嶸在目我蔽旣崇我酒伊馥與

子同壽短歌代哭

劉生

慷慨思彼劉生負奇氣飛英聲馬蹏蹏劍號鳴五陵六  
郡恣橫行銜恩死難吾何寧扶風每驚座長安恒借名  
邀郭解結荆卿一諾重百身輕任俠縱橫誰其不平吁  
嗟乎劉生

雜詩四首

驚風厲秋節野館蕭以陰凝雲羃枉渚層霞暉鬱林吉  
人履貞素黃花怡晚聲矯首無良途頓足託幽深魚目  
鄙夜光甕醜蔽名琛白露塗前墀草蟲發悲吟感物結

中腸沉憂故難任

世紛謝微纏卓犖弄柔翰離群慕所歡居然參商判欸  
誠貽新詩恬曠展清玩穆如灑颼颼蔚若傳璀璨兀坐  
感同心蕭條歲復晏願得偕嫵婉合并無暮旦師消爻  
不奏誰能宣未歎

圓象運大化靈曜迅交馳東壁正昏中固陰排朱曦衝  
颺振長薄繁霜被隆坻槁容易豐條寒色彫芳蕤瞻眺  
惻中抱物化悲冰漸昔日姱婉態今成衰瘁姿陳人卧  
北邙墳塚何纍纍懽樂不照顏徒爲後人嗤不如紆勝  
引秉燭且銜卮

蠢茲東南夷肆然恣侵軼方舟竟廣川長戈蝟毛密膏  
血塗草野烈焰戾箕畢當宁厓宵旰飛章授戎秩誰爲  
請長纓亦復鮮投筆軍中輸黃金募丁多脆質虛文肉  
食鄙力屈謀亦窒顧愧懸弧身少習穰苴律咄嗟守枯  
魚塊然抱漆室

秋日田居雜興四首

歛性就幽蓬結構止容膝離離海樹攢曖曖江村出圖  
書紛滿牀川嵐藹盈室懷挾千古情憑軒泛瑤瑟靜襲  
蘭芷芳起披烟霧密榮吝都始忘獲遂幽人吉空爲世  
途憂紛詭諒非一曠望極高深驅吾愁與疾

皓月吐層岑清暉生滉漾興來命綠樽浩歌發慨慷得  
性匪外求寥廓沉遐想流雲曳高標悲風振清響意愜  
頗夷猶道存亦骯髒森沉野徑寒肅穆林扉爽懷抱旣  
昭曠外物徒龍蟒

泫泫露盈柯斐斐氣冪篠閒寂林棲客撰念入幽渺謀  
祿智所拙退耕力亦藐悠然返窮海掩卧淹昏曉鸞情  
超象外鳳想極雲表琪樹近蒙籠縹霞復繚繞詭仄眺  
明岑沿洄美陰沼賴欣滄洲趣持以蠲憂悄

屏居謝人徒朔風吹寒雨遠樹旣盤紆滌雲亦交互愁  
鷗戀故林隱豹諳長霧冪歷川光昏蒼茫野烟聚耳目

暫無擾閒情託毫素拙訥罷干時賞心于此遇飛光忽  
我道咄咄歲云暮眷言採三秀頽齡儻能駐

遊仙十首

嶽嶽九龍館峨峨八風臺赤玉靈文下朱陵真氣來棲  
山拾雲茵臨淵弄珠胎升降隨長烟飄颻戲九垓萬里  
一瞬息千歲方嬰孩綵女上少室羽童向蓬萊俯首區  
中士天濁堪悲哀

扶桑誕初景靈洲散奇香飛轡抗斗樞回旗拂雲間仰  
身操天瓢手勺沆瀣漿揚志青冥際流矚周八荒靈妃  
顧我笑引步登文昌僊佺擁芝蓋待問紫玉房金匱啓

增刪上紀列仙芳久淹變化途今茲昇帝鄉

有道百靈初無名萬物始九氣煉中和三元謝甲子化  
昇隨感遷清越徹表裏玄圃御斑麟丹丘乘赤鯉左拍  
浮丘肩右躡羨門趾山成數寸塵海無三尺水長嘯宇  
宙外超然得不死

煌煌金銀臺孤映大羅表祥飈自迴旋縹霞復飛遶列  
真乘羽車宴會三清沼絲竹間雲和芳卮薦妖少鸞孔  
揚雅音栖翔絳林杪大地敷蓮花靈景何皎皎羲和不  
敢驅玉虛無昏曉

蜉蝣豈見夕薜榮不終朝奇齡邁五龍道骨超塵囂朝

發嵩華陽夕憇匡廬椒飭輿驂玉虬翠鳳追飄颻二花  
揮鬢端歌曲上層霄終南揖呂巖緱山禮王喬借問朱  
門客容色誰後凋

山林隱遯士京華遊俠兒吉人懷貞心棄世以自娛飢  
餐金鵝蕪渴飲赤泉池手撚珊瑚株足踏白芙蓉山人  
呼種杏花吏付移梨名山度紀歲去去勿復疑

五香芬紫府十燈籠絳紗輕暎散華池肅肅真人家真  
景觀寶訣携登龍虎車赤羽來銜壘青衣出散花一觀  
太上京回眸歸路賒

齊侯問棗花漢帝看桃核要妙匪外求潛光鍊精魄居





嚴飈衝薄幌搖落既寡踪含毫情獨愴願附雲間翼懸  
飛寄神爽

城陰別業二首 效陶體

託志山澤居寥寥輪鞅荆扉掩白晝虛室息塵想氣  
和天維澄時嚶迤清響先民邈何攀遺編獨欣賞時復  
遡前疇行歌振林莽習習原風柔晶晶川月晃良辰散  
襟顏天真湛虛養寢迹棲衡門寄意義皇上

田廬本自娛水木備芳冽閒曠足我營野性免羈紲空  
林無游氛停雲靜如結銜觴聊自適百情已堪剝露葵  
翳庭除清齋供採折江上聳逸峰遙瞻起怡悅荷鋤擁

竒懷濯纓負高節諒哉隴畝民榮名耻拙劣

奉贈衡山文丈二十韻

燁燁真人府輝輝處士星千年關氣運一代孕精靈風  
表留祥瑞綱常肅典刑珠華照玄浦瓊萼吐銀瓶物色  
塵中識聲名贖者聽紫微垣獨迥青瑣闥長扃抽思凌  
霄漢搜竒接窅冥并包萬象列奧博百家并渤海詞源  
倒圖書腹庫停新章標正始妙墨嗣黃庭南國衣初返  
東山意獨醒淹留聊卧病瀟灑愛傳經鸞孔邕邕及仙  
仙矯矯形斯文徵出處吾道自年齡斗域咸窺峻  
總惜馨執鞭勞夢寐負笈謝輜輶容彩春雪麗微

露零微軀終願託腐骨今能銘伊昔嗟岐路于今就範  
型侯芭儻可教數過子雲亭

冬日田園

寂寂寒城迥綿綿野徑紆蒼烟迷戍竹白露淨園蕪小  
隱薜蘿密獨遊麋鹿俱攝生携藥裹學道翫靈符芳翰  
閒情適瑤琴古調殊會心挹雲物極日散江湖澤國魚  
龍伏霜臯鴈鷺呼行藏揚子宅勲業阮生途但盡流連  
飲寧嗟序運徂百靈迎夜氣群卉待春蘇歲月悲羈旅  
乾坤識故吾 聖朝明盛日東海有潛夫

渡江行

長江滉漭搖虛明三天疑鑄萬象傾靈源千古鑿真宰  
日月吞吐相崢嶸左滾右射勢如煮平分東南折吳楚  
巖鳴谷應萬木號炎方五月不知暑山人乘醉快中流  
長風相送無逗遛片帆直欲翔雲表森毛插羽橫三秋  
繫纍星辰灼灼虹天雞起舞鳴日東琉璃橫開子午道  
芙蓉倒映蓬萊宮劃然長嘯氣薄斗瀟湘洞庭入吾手  
側聽滄溟隱隱雷白龍戰爭翠蛟吼飄颻巾舄諧諸靈  
風烟颯杳思冥冥磊落江湖性骯髒土木形欲躡子長  
跡愛讀秦皇銘張騫之槎犯星闕祖生之楫扶王庭嗚  
呼丈夫勲業真難已百年無負此江水

畫龍頭行贈王茂才

長波浩浩東海東赤岸水與銀河通晨昏日月轉地中  
萬壑盡鼓洪濤風中有靈物神變化崢嶸頭角驅雲駕  
幾年失水鱗甲枯霹靂殷殷喧昨夜洞門水府不肯晴  
馬鬣冉冉天瓢傾昂頭直上恣澆潯元氣歛吸相縱橫  
風雲糾纏電雷守龜鼉徙穴蛟龍走長空滾滾拔浪急  
五湖齊翻四海立誰掃墨汁作此圖王君坐對天模糊  
彷彿滄溟開蕩泝四壁蕭蕭起寒漲英雄奮發會時逢  
王君自是人中龍筆端五色偏錯落胸中萬卷能吞容  
矯矯意氣當起蟄五雲天際看奇絕只今西北暗黃塵

火雲肆兀頽霞屯枯槔無功衆芳靡明堂宵衣總爲此  
深山大澤有曲蟠泥沙屈強骨格完瞬息甘霖一噴薄  
八埏九土歌瀾漫

題趙子昂畫馬卷

房星中夜輝溼注赤驃降世盤五花竹披雙耳鷓鳳臆  
汗血隱隱蒸輕霞憶昔千金曾市骨星流電逝驚馳突  
錦韉玉鞵紫遊韉黃帕高封香秘辭芙蓉闕下紆迴步  
祇願君王傾一顧嘶處秋生閭闔風浴時曉動昆明霧  
誰貌龍媒八尺身王孫筆意求其神草色離離錯雲綺  
恍見御苑驕行春孫陽旣死誰憐才後人空置黃金臺

丹青卷裏古風格逸氣凌秋不可裁只今關塞暗兵戎  
骨都僭號閔支雄烽火遙連未央殿羽書數奏甘泉宮  
駑駘下乘蒙繡黼爾輩流落江之滸霜凋首荷野躑躅  
色態閒閒意栩栩嗚呼天產真才何代無壯心伏檻悲  
窮途一飽酬恩千里徂鼓車服駕噫何辜

聽琴篇

香洩爐薰夜色沉影搖屏燭洞門深嶧陽枯木激繁響  
驚飈零露滿虛林商聲悽鏘羽聲苦積雪幽蘭音調古  
迴薄殷雷萬壑奔曲折流泉三峽吐朝飛夜啼指羞澁  
銅瓶滴瀝井底汲俄聞改韻鬱清危烟迷竹冷山魑泣

臃朧華月麗層穹青山寂歷蒼江空遠聽霜臯哀別鶴  
近聆風浴斗離鴻摧藏頓剗感人耳涼颺靈籟此中起  
湘波澄映楚臣心沙場寒徹明妃髓吳姬齊女抱睽離  
遷客羈人泣路岐夢斷酒醒開秘弄銷魂一夕鬢成絲  
元旦酬贈陳海門留燕

勾芒御春陽景熙明庶祥風原野披簇簇卿雲千頃合  
霏霏濡露百榮滋黃堂瓊枝真挺秀郎署華精參列宿  
陳蕃後裔八閩豪製錦鳴琴來海濤海濤頻年氛祲多  
夷舲血戰翻鯨波積陰寒谷思回暖喜見賢侯曳珮過  
仁風乍扇化已浹品物昭蘇元祚協履端介祉啓芳辰  
燕寢香凝動懽頰雙瞳顧我若平生栢酒殷勤相向傾  
已沾玉饌方圓溢復聽華梁歌吹盈坐眷蘭心挹芳蘅  
文德懸知覃蔀屋共推小范甲兵胸載展士元騏驥足  
嗟予濩落卧江濱年年椒頌向誰新甘棠蔽芾徵隣壤  
海上長歌不老春

相逢行贈王將軍

將軍勇畧天下奇龍媒八尺驕驥姿射策彤墀稱第一  
名姓親從玉案題張油駐鉞東海湄五營號令山不移  
煌煌鉄騎轟雷電燦燦金精盤虎螭中原虜夷近雜揉  
重關要津俱不守頻年烽火入甘泉已詔將軍屯細柳

將軍到來備不虞五千甲兵膽力麤據鞍笑撚金僕姑  
鳴弦仰墮雙飛鳥劍光揮霍鵬膏塗頑鯨辟易貪狼遁  
牙旗玉帳真清暇搜抉詩書欣滿架追尋不計能懺人  
論文啜茗銷玄夜瑤篇華軸懸我堂李唐風骨森開張  
山人業愧雕蟲長謂我躡足曹劉場學書無成學劍晚  
蹇剝陰符垂虎囊監車從來失駿步涸鱗不解天池路  
蒲團竹几謾藏真高歌劇飲狂如故將軍文雅誰比倫  
卻殺儒將疑前身相逢一笑無堪贈祇賞柴門月色新  
王將軍真偉人歛然逸氣干青冥功名早見圖麒麟

舟過觀音閣

石磴龍門拱烟霄鳳刹翔靈巖霏紫翠絕地捲縹緲衣  
逼香雲濕舟含法雨涼平生眷清賞身世兩茫茫

渡江

江明交曙色石秀雜雲容青浦繁陰積朱城土氣濃鳳  
臺標帝里虎旅衛皇封再草三都賦誰稱翰墨宗

報恩寺

金碧神居峻丹青福地開離光彌寶殿瑞氣遶香臺上  
界三靈會中天兩曜廻幡花迷藻思欲去更徘徊

郊居四首

畸人元野性鶴鷺意仙仙林鳥繁絃嘒池蓮焰火燃山

姿一以寂雲貌數番鮮此中多隱氣散髮弄潺湲  
跡沉抱甕汲意遠帶經鋤未廣絕交論先訂養生書  
蘿從小隱魂夢遊太初要知負病者踈索茂陵居  
屏開竹塢密絲掛柳堤長水染桃花色洲傳杜若香  
劉伶熟甕啓中散淨琴張託情此冲室竟日一藜牀  
逃喧遵遠渚養拙事閒郊雲水元同調人禽或對巢  
新蒲促晚節叢竹解寒苞蒙密山齋逕欣茲花艷交

陳方伯宅夜讌

樓氣色滿席上生烟霧耿耿星麗天皎皎玉爲樹窮  
討入渺冥命酌起懽趣意氣爲君傾長如流水注

奉贈劉督撫鶴詩二首

秉憲揚州域真稱跨鶴行三軍肅新令百代樹芳聲  
白玉輝顏色黃金鑄姓名竒功元不朽何用訪蓬瀛  
本自乘軒者願爲階下留自憐知遇鮮不爲稻梁謀  
夢斷茶烟午心危松露秋絃中哀別操幽意暗泉流

盧司訓致仕次答

廣文今解組花下一傾壺月滿謝公墅雲開范蠡湖  
携囊徵藥草拂几玩靈符海上成仙隱母今年鬢徂

王揮使把總鎮江

鉄甕疑連漢牙旗總插雲樓船橫海出斧鉞自天分陣

氣三軍肅威名列島聞金焦看新勒千古淨妖氛

金山

十載名山心賞睽喜從波面躡丹梯玉蛟窟近晴飛雨  
繡佛堂虛午暈霓四匝水雲疑地盡孤高世界覺天齊  
仙人笙鶴來何處接手層霞路轉迷

白下東廬拱宸次韻

白雪淮南稱雅調青春江左慰相思風流啜茗君家事  
蕭灑傳經何處師細認魚書增悵望分飛龍劍各差池  
秣陵臺榭登臨迥鄉樹微茫閣酒卮

登燕子磯次韻

百疊蒼屏一徑通背巖亭子枕江雄歸雲擁樹深藏寺  
峭嶺連城上逼空萬戶烟花晴照裏六朝興廢水聲中  
閒情徙倚虛明界鐘磬蕭蕭落晚風

靈谷寺

一抹閒雲鎖法堂萬松寒翠灑衣裳山迴易激風雷氣  
地僻長聞藥草香功德臺荒餘鹿豕丹青殿古自齊梁  
千年王氣瞻鍾阜幽贊功多福正穰

十廟避暑

古殿棲遲過轍稀踈慵真與物情違炎天樓閣虛相映  
僻地風烟靜可依山拱紫微饒王氣湖搖玄武瀉晴暉



自許心跡元超絕客裏尋幽總當歸  
雪夜張陳二春元見訪留飲次韻

江左烟花滿帝闈喜從奎聚識騷人茂先文采隋珠  
仲舉才華越調新春到梅花聊索笑夜深竹葉正瀟  
湘看意氣驚遲暮起舞燈前拂劍塵

宿牛首寺

招提高占碧雲岑展眺真懷出世心晝日殷雷喧絕壑  
暑霄法雨灑空林蓮花界淨天香護貝葉經翻道氣深  
一自借眠禪榻穩幾迴清夢落巖陰

送王醫士還吳

南客相過意不踈藥囊詩卷慰山居擬從花鳥淹淮甸  
愁向烟雲認闔閭柳暗津橋嘶足馬月殘江館憶雙魚  
逢人若問東遊勝一望滄溟萬頃餘

山行

山行表裏鏡光浮雲起無心似水流花氣熏人翻怯午  
巖陰欺酒忽疑秋古苔烟霽開蒼徑垂柳風柔掩畫樓  
金館璇臺迷處所斷霞千尺掛丹丘

奉壽衡山文丈

闔閭城頭南極懸玉堂風表正翛然人間衡嶽春常在  
海外瓊瑤句亦傳陶令歸來捐斗粟謝安老去眷林泉

松花芝草長生宴開向吳中不計年

孫氏招賞盆蓮

雨餘新溜溢盆池翠蓋隨花影似規君子風生香自遠  
仙姬浴罷弱難支不辭傾倒將筒勸已愛蕭疎製服披  
一咲相逢憐氣味坐深風露寫新詩

村館有懷同志

巾車迢遞入幽栖事外蕭閒玩馬蹄戍積蒼烟翔海鶴  
門留碧沚照山雞不禁魂夢溪邊冷已較心情樹裏迷  
芳杜幽蘭何處覓莫教氣味久睽携

七夕詠女牛二首

星橋極夜度靈妃故恨新懽集錦幃百和香飄龍馭轉  
九微火照鳳旗輝銀潢落月移粧鏡文席浮雲動別衣  
忍態含情天欲曙七襄仍上昨宵機  
雙星粲粲共迴翔珠殿銀堂樂未央風景依稀猶洛汭  
雨雲茫滉豈高唐同心霞幄張琴瑟比翼天池宿鳳凰  
靈鼓香車啓歸路心迷漢曲水湯湯

奉次崔宗伯欽家園

瓊花島上稱仙侶似與家山有夙期覓句愛逢池館僻  
啄筇閒度野橋危鳳凰詞吐香生舌鸚鵡杯傾喜溢眉  
文彩秋光相映發松風蘿月好懷披

九月十六日村舍二首

天南朔氣肅江鄉叢薄悲風歇衆芳青閣交情愁旅鴈  
華池清酌薦嘉魴攝生新演五禽戲招隱從教三徑荒  
蚤歲獻書曾不違晚來歌嘯水雲長

久拚江漢卧支離萸菊相將秋序移玉宇霜繁呼鴈鷺  
銀塘水落戲鷓鴣輪蹄日隔道情長著述年深蓬鬢知  
歲暮美人期不至蘭橈桂楫渺予思

白下贈朱射陂司馬

江左烟花迷路岐遙憐詞客在雲司魚封寢殿應多感  
鳳去高臺合有詩賈誼一身真戀主劉歆三世總稱師

他時六草涇園勝肯許幽人數問奇

村居

軒窓洞啓見南岑片片閒雲依素心三里川原明樹彩  
一區門巷靜花陰寓言不廢步兵酒託志長揮中散琴  
池上行歌採蘭芷自餘芳馥媚幽林

生子奉次顧公玉二首

摧殘年貌喜充閭敢謂寒門慶有餘仍愧小雛稱玉樹  
不堪老馬尚鹽車綿延衰祚懷中物料理貽謀架上書  
權處轉令生感愴劬勞未報復何如

腐儒家鉢愧相傳幾向高媒禮扣堅一索震陽初奮地

九宮泰運已回天難忘犢砥鍾新愛免錯麈書枉大篇  
見說蓬門湯餅會高賢情興獨翻然

城陰小構奉次姚錢諸鄉丈

結構因便山澤居委懷終歲在琴書雲藏戶牖高眠穩  
月映松杉起步徐緱嶺寄情堪馭鶴濠梁託興好觀魚  
不嫌路入踈林寂一任紆廻長者車

登岱嶽

高造天翻從下界見雲烟登封漢蹕餘風景  
表記秦碑空歲年絳節香飄龍虎馭玄壇寒切斗牛躔  
茫茫八表浮元氣較似身遊太古前

遊蓮園

采露華濃結伴相將入錦叢一色羅裙迷葉底  
行粉面雜花紅空濛香逐縈波霧咲語聲傳出清風  
最是同心堪把贈蘭橈歸路倘能逢

登山

惠風吹晴春服單郭南群峯秀可餐匝地烟霞迷寺杳  
半巖欄檻壓江寒林間送酒紅芳媚松際彈碁翠檜繁  
野鶴自多恬曠意愛逢雲水得盤桓

靜勝軒牡丹

一種元將富貴論忽驚靜處出芳新翻階艷萼香風細

暈水妍華綵霧屯燒燭酒杯照夜避塵書幌亦生春  
多情愧續陳思後結珮鳴璫賦洛神

新居二首

養慵真與世情踈新築堂成日晏如捲幔風微惟燕雀  
下簷星燦映圖書幽偏草合裘羊徑寂寞花深揚子居  
絲筆瑤琴棲託處最憐氣相入清虛  
野人門館本蕭疎散帙焚香只自如避俗故營張尉宅  
攝生堪究伯陽書愧無文采來冠蓋喜握菰蘭慰起居  
誰道江天雲霧斂少微經夜宿窓虛

大司空陳公總督濟上北歸取道來訪惠寄高文因

謝

清卿憲度肅河濱野客臺端一問津不訝芙蓉甘寂寞  
却憐騏驥老風塵斗山門望懸情舊雲錦文章過眼新  
閉戶草玄勞慰藉林間空有似雄人

登山

鐘磬和雲落上方參禪雙袖惹靈香風開瘴癘銷兵氣  
雨洗巖巒助佛光老歲飄零元縱性古人曠放總流芳  
鸞驂鶴馭將書至南岳真官烟路長

張計部左遷二守携樽過訪

畫省風流見偉人燕山冰雪洗心神清朝共羨連城價

僻地能敷萬戶春  
燦爾鳳鸞來  
枳棘終然劍珮上  
星辰  
一樽傾倒柴門月  
肯信高懷繫隱淪

奉次梧岡翁聞 賜告命下識喜

霞居高詠逼黃初  
一片閒情與世踈  
河嶽同瞻濟川楫  
京華新訂絕交書  
中原岐路愁逢棘  
東海田園喜灌蔬  
坐鎮淮南自風格  
茂陵端遣卧相如

紅葉

林綴染霜紅  
蕭疎下晚風  
曾將無限意  
傳出景陽宮  
題畫

天風吹嫩晴  
瀑布掛危石  
日亥山影頽  
酒杯落從戟

輝耀

簾宿亂輝輝  
新秋露氣微  
愁人紈扇弄  
休傍玉階飛

春閨

紫蘭纔茁萼  
素梅已別枝  
持將可憐意  
摘以寄心知

秋閨

玉露沾縹葉  
金風摧錦枝  
房櫳起蕭瑟  
寸心寧共知

詠蠶婦

摘葉餒三眠  
縈筐絲縷牽  
妾心有愁緒  
何日斷纏綿

齋居

月檻藤杯興  
鸞筵桂軫音  
從來揚子宅  
別有尚玄心

首夏飲顧公玉園

林暈滋垣潤山氣蕩簷輝  
憮然閱徂景無令樂事稀

送人入山修道

身逐孤雲上翠微採芝種  
木合忘歸市廛多少風塵  
色不向江心化素衣

秋日田居懷友四首

秋淨橫塘鴈影微美人咫尺  
渺音徽相思兀坐寒林寂  
霜月欺人弄夜輝  
曉持鋤鍤理寒蕪浦淑風  
烟似畫圖肯信世紛能解  
脫便來同作灌園夫

丘壑真野性宜籜冠  
艾服任離披烟霞徑路  
無人入  
頗有同心數寄詩

清光汀彩弄幽姿無數  
文禽集露枝貪把閒情  
酬物色  
一杯最恨不同持

觀獵

追呼陣氣散秋濤歷塊  
風前影漸遙報主請看  
鷹犬力  
中原將士莫辭勞

趙清獻焚香告天圖

自抱平生冰玉心仙禽古  
調共徽音碧天虛朗無  
昏日  
不待焚香已監臨

狼山寺

碧樹香臺兵氣纏  
怒濤來往寺門前  
亂餘僧去知誰在  
尚有鐘聲破暝烟

紅梅贈徐麗人

射姑仙人餐絳霞  
熒然五內發金砂  
等閒一夜東風起  
吹作長安第一花

王昭華抱琵琶圖

蕉覆瑤堦翠霧生  
花枝人面不分明  
琵琶別有風流調  
不是當年馬上聲

曹子野集終

盛明百家詩 呂山人集

山人名時臣字中甫浙之鄞人嘉靖乙未嘗遊吳會  
過白下出淮泗登泰山謁闕里因至青州客于衡府  
久之衡王愛其詩爲刻甬東野人稿一冊此又從稿  
中摘取百餘篇評者曰山人詩磨鍊老成時有奇氣  
絕無冗冗之言斯可謂知言矣隆慶改元春錫山是

堂俞憲識

擬乾清頌

乾文耀紫樞僊仗萬神俱  
星斗昭軒辰山川列禹圖  
殿雲春五色宮樹玉千株  
淑氣流玄鳥靈光攝寶符  
露盤



龍女貢雷座虎臣趨 九聖重興日山林足酒徒

三山篇上衡國主千秋

圓方流逸景海宇止冲融仙紀原無筭天才自不同金  
銀樓閣處清淺斗牛宮道氣揆鴻寶玄文闡象工鳳凰  
三島出河漢一源通瑞降堯天露雄披楚殿風頌傳賢  
帝子名著太清翁瞻戀夫何極華封意不窮

木峰舊業寄諸族兄

歲暮寒山下溪田久廢耕亂鳥驚日出猛虎傍人行蜃  
島蠻夷雜鮫潭冬夏鳴林窓讀書處清夜鬼談兵

宴新樂王我靈臺同李魯望應教

一時承眺聽共賦小山篇地迥蓬壺近臺高象緯懸好  
春明四履仙酒醉三年心賞知今夕東山月更圓

寄鄴中鄭中伯謝茂秦

閒居懷二老風雅自然殊落魄謝鷓鴣風流鄭鷓鴣春  
遊聯趙俠夜宴侍秦姝尚憶相憐處金塘結綠蒲

寄上趙國主

時鄭謝二老北上予亦東轅

美人俱北上芸閣掩重帷范叔懷恩日素安卧病時西  
園春到早北海鶴歸遲身世仍如此寸心不可持

送益都裴主簿還上黨

青州杏花白送子還遼州原有投閑念偶因從事留農

桑堯土地風俗晉春秋好與銅鞮客高吟共白頭

送顏大行應雷使簡府還浙

稷下星輶動仙郎海上還幾年經盜賊無處問家山客  
老遼東管人迎江左顏鄉心不可盡送出穆陵關

懷三兄敬叔

柴門秋老月華清不肯隨人入市城樓下石渠通海眼  
知君獨夜聽潮生

九月十日雲門山莊餞送李自修明府

林深人事罕山影座中移聊把一尊酒重賡九日詩却  
憐搖落處深感送行時君去星天迤濟夫有所思

徐審理舜和官舍和新樂王韻

帝子憐才日官閒更有情公田應免稅家僕且能耕山  
月當窓見松風盡日清共來弘景宅坐聽海濤聲

送青州兵憲王元美解官

雨歇川流急烟浮薄暮時羣公傾蓋別匹馬渡河遲淚  
滿齊梁道名存管晏祠掛冠何太早惟有此心知

憶山中寄弘六姪

山中有墳墓何必問生涯五月楊梅樹三春謝豹花魚  
鰕通海市鷄犬遍人家門外流泉在貧堪漱齒牙

審理王公生祠

一官不滿志憂國髮成絲古貌山人識丹心帝子知江  
南成別業海上有生祠却笑路傍子勞勞何所爲

陸孔明自塞上回有感

鴻書不到不毛地日暮長空萬木凋中國但聞頗牧老  
朔方安得甲兵銷却憐陶侃勤於甓因識王祥贈此刀  
我亦自嫌生計拙祇將無事答

明朝

蘓審理子長書來復以詩

書來逢歲杪視篆小春時蘓相舊公子王門新士師捐  
金求駿骨說劍吐雄詞不負昭王意先令郭隗知

宴衡王孫乾誠第

清風翠葆參差出白鼻嬌騎自在行綴賞不知三鼓下  
南城北斗近人明

贈吳山人子登

家在秦淮曲心憐子夜謔拂髯逐物外輕世閱人多旅  
食空河嶽秋衣製薜蘿一尊伴長嘯吳下阿蒙何

王子元書卷

晚天晴帶郭一逕入茅堂山色留虛榻槐陰覆短墻雄  
談誅王猛屏迹嗟馮唐不盡相思意秋雲海岱黃

高唐王園亭應教

不問坎牟者臺池喜客俱金塘通瀚海文竹走龍鬚列

坐寵罷石分題蛺蝶圖吟餘花影夕新茗出官厨  
青州客懷

不須悲道路到處有風波客侶越人少山河齊地多漁  
竿留我在龍劔爲誰磨江海正雲擾其如飄泊何

贈周太守伯霖

山中有道侶多病竟辭官華髮歸時變青山坐處看攝  
生知橐籥愛客種芝蘭詞賦仍招隱何曾廢歲寒

訪陳憲副子羽先投以詩

一別渺江湘悲秋意不忘東山卧安石四海識元康栽  
菊成三逕懸車及幾霜有人問竒字且莫掩茅堂

送羅山甫

我亦江南客天涯共去留呂安無限興海上送羅虬  
送王德孚還軍門

幕賓須暫屈王猛自從容馳檄方千里還鄉及仲冬劍  
歌流白日帆影拂黃龍談笑臨江滸吳王有舊蹤

同宋一中遊范公泉亭兼懷謝茂秦

多才憐宋玉漸老惜玄暉地僻宜流水城虛隱翠微斷  
碑存惠井蒼蘚闔神扉對此念朋好中原草木腓

衡王孫思誠輓章

浮生原不定冥數詎堪論別處曾逢鴈來時忽斷猿路

迷秦客子草怨漢王孫共憶遼城鶴誰招蜀帝魂多才  
無永壽有道未垂言野老猶聞泣山人况感恩托孤心  
不死報德語應存玉匣成千古 皇圖失一元風廊秋  
葉響月閣夜烏翻寂寂蒼山下空然哭墓門

值晏長史

曾向滄浪處聞君久宦遊相逢莊嶽里遙憶鄴城秋已  
結王生襪休嗟晏子裘梁園重詞賦且以一官留

窮劉歌

筵前忽見窮劉舞籊籊瘦影不自苦醉後更聞窮劉歌  
齒牙半落聲哦哦人笑窮劉貧不固長向人前賣詞賦

我羨窮劉似古人筋骸落魄不憂貧但將窮語寄衰朽  
窮得天年七十九送窮文者意何如何必窮劉讀死書

送陸翰林惟安使衡府還鄉二首

凍月輝輝風樹斜鏡訶夜轉九天槎淮南淮北霜烟路  
春到鄞江君到家

天涯相見倍光輝何事紛紛淚滿衣不道山人不懷土  
心旌遙逐使君歸

亂石岡

杳靄烟霧間耳耳復齒齒疑是秦時人化石不能起

送逯文甫還章丘蕪寄高仲純華四維

原抱幽棲志多能肯自誇半生初作客兩月即思家曙  
色雲連海川光凍夾沙山中有知己歲晚不須嗟

李太常江上草堂雪夜出妓彈琵琶

北風吹雪晝易昏樹深竹密江上村紅燈照席不知夜  
忽有遠客驚叩門繫馬登堂不問姓不顧傍人即坐定  
座中舉目皆英豪主人呼出鄭櫻桃紅絲裊地毳毼煖  
簾額紛香落鳳毛大小忽雷手中出須臾翻作鬱輪袍  
媚臉斜凝新病眼一曲低回黃金槽衆客聞之各掩淚  
潯陽此夜我先醉天涯海角同此心古人意氣輕黃金  
瞥然上馬出門去酒酣寒極天將曙

留別謝司馬

歲云莫矣將何之長途正值雪霜時寒鷄未午催明發  
披衣叩門前致辭我曹本是拙薄輩不力蒔稼徒爾爲  
燕趙齊梁豈無主青春窮夜天何知有家今在戈鋌中  
島夷橫絕潮不通海上人民作鬼語魚鹽城市愁將空  
杞人無故憂天墜清平轉爲愚者累當時豪傑起山東  
十二河山并七雄嗟予流浪杳莫止茫茫天地夫何窮

寄鄒子叙

逆旅經年別青袍舊日窮兵戈懷鄴下音信滯吳中書  
劍情多懶妻孥計亦同鄒陽詞賦苦句句寫秋風

戍婦怨

霜風殺汾水八月草枯死火牌疊上門速郎戍邊壘門  
前親送別計程遠千里昨宵燭光中歸向羅帷裏爲妾  
解同心試妾相思意悲歡未合陳鷄聲拂曙起

壽劉給事

常抱烟霞疾形骸不自憐牀頭餘諫草松下漱寒泉漢  
室金門客明時陸地仙幽花與黃蘗俱可寄長年

訪袁服周不值

黃石橋邊巨勝花數間茅屋隔林斜沉沉野水風初動  
雨阻山南處士家

暮秋同謝汝節登女郎山

多情得謝安移眺葆光壇老樹空江暮孤城落日寒土  
花章女墓洞乳漢仙丹鶴已冲霄去遼陽天際看

登山

獨立寒山中天地蒼蒼色不諗何許人作此登山客  
卧雨懷高仲純

老矣思鄉客閒眠水竹邊空江三伏雨獨夜數聲蟬生  
計貧無事交游詩有綠夢回草堂上曾與子談玄

弭元夫廬墓次韻

天地不憐君恩情盡死分空山猿鶴語白日鬼神聞雙

壑懸秋木孤心落夜雲此時正愁絕霜冷亂鳥羣

風竹亭

節節青琅玕清風生許許匡廬道士來留刻玄黃語

待月樓

川原夕氣交暝色自相向月還藏海底人已坐樓上

蘿月山房

窈窕不可測綠蔓結其牖不聞人語喧山空月如晝

別墅

何以爲我情駕言別墅好可耕墾上田可牧原上草

越女吟呈謝中丞少安

妾家東海壘寒潮日春門拾螺蕪採菡爲親治饕餮長  
兄豪俠士從軍歿邊屯舊年島夷來兵燹連江村負親  
匿岩竇諸弟俱潰奔腥風獵天地白日翻爲昏四隣不  
復辨眼見生人魂家室蕩灰燼無人結新婚妾死何足  
憐尊親莫大恩百罹摧肺肝逢人不敢言聞君漢梁鴻  
才德衆所尊萬惟妾來意賤貧君莫論台顏周謝盡獨  
有貞心存願君勿好色留妾侍華軒

寄上新樂王兼介弟思誠

清賞無人見瑤華照雪宮共知賢介弟鈞仰大王風偶  
別玄庭下遙思清夜中心期重九後還醉菊花叢



蒲履吟謝魯王孫中立

翩翩雙蒲履織自吳姬手蒲賤不足論姬情不可負秋  
深一卧病月冷孤松牖履在繩床前姬在吳江口

王仁甫卜築堂

為愛王摩詰長吟柳浪間文章緣數偶卜築自心閒池  
貯東溟月城連長白山秋烟時採藥客至始開關

扣始皇碑

以下登泰山五題

大醉呼山靈欲完天地壁祖龍死沙丘空此一片石

拜挂衣石

即太清峯

向日三伯拜挂我青蓑衣明朝滄海去騎個靈蚪歸

韞穆王駿

始皇碑前

蒙聖周天子元有八荒意鞭此飛龍駒一突一萬里

據望海臺

即日觀峯

千秋明月珠莫令螺女採應有苦心人願言超大海

摩蒼兕頂

此石雄峙如虎在元宮北

生汝天山中猙獰誰敢馭摩頂授爾戒候爾騎我去

蜀道吟送謝中丞

轡軒必明發西望此心懸烏道青天上蠶叢黃帝前巴  
童葵葉扇蜀客木蘭船共說錦城好相隨惜暮年

水簾洞見墨蹟寄蘓雪蓑

不見狂夫面已識狂夫心明月人閒路流泉洞口琴君  
能歌白苧誰復見黃金焉得元和酒終期秋水吟

寄上成皋王

游嶽雲生處思君若此情韓陵常作客緱嶺幾聞笙  
試劍霜天白彈琴月夜清西園風景好而我復東行

聞顧聖少客楚以詩訊之

詞賦動燕趙嗟哉顧野王離家多歲月作客久荆襄  
宿鴛鴦老行吟杖杜香一身餘落魄萬事付蒼茫肯爲  
黃金盡徒令白髮傷闔閭城下水曾照紫眉郎

桃村泉上

爲尋周太史偶向水雲深不意桃源處棲真有道林響  
應通海眼清可沁人心明日重來此流觴一醉吟

臨清值姚匡叔

風沙喧白日抱病度河干華髮逢姚合明時媿呂安談  
棋春思亂說劍夜光寒共憶虞山下長歌一釣竿

嗟哉行寄魯王孫務本

經年淹燕趙此情殊廓落嗟哉苦心人草木願可托理  
論苟不然黃金翻作惡詎肯受人憐終當重然諾視彼  
賢夫君恩情宛如昨感時難爲心何以越年籥

寄范二表兄秉操兼示同門諸友

三十餘年夢詎知黃髮生人多稱信士我獨念賢兄老  
去少同類貧惟不喪名有懷俱落落風日淡江城

辛酉仲春書晦同殷子飲東阿李明府官舍

白日杳冥風行沙春深縣郭寒無花竭來黃石仙人館  
醉卧青蓮居士家塵起眼中滄海變雲流天角崑崙斜  
明時不期遇殷浩赤手談兵雙髻華

留別龔憲副李符臺二公亦將北覲

夢到山陽未到家笛聲縹緲度梅花帝丘烟雨三春暮  
客路風塵兩髻華老去山人唯愛酒秋來天使共乘槎  
燕門楚國一回首薄暮輕雲天際斜

寄菊石圖上壽衡國主

片石分崑崙幽花移栗里服之可末年願以獻仙子  
留別濮陽諸公

亂後離家髣髴蒼每逢知己問滄浪未從王子登緱嶺  
偶值莊生過濮陽身外閑愁惟對酒花前遠別共牽裳  
不須更說何由見嵇阮相思在醉鄉

卧雨懷蘓仲子

卧聞征鴈一聲哀又是重陽帶雨來爲憶風流蘓仲子  
蒲床詩草菊花開

濮陽喜雨柬桑經元

濮陽久旱魃太守寧無憂  
半夜雲垂地平明天欲浮  
不惟安旅食兼得慰鄉愁  
道上逃亡者相將慶麥秋

重午臥病龔憲副招飲不赴是夕風雨夢青龍東翔  
賦此紀之

劔壑昌陽老逢時負酒尊  
應憐賈太傅曾賦屈王孫  
風雨懸江漢蛟龍入夢魂  
使君招不去病卧上青門

秋夜吟送李尚寶伯承

夜冷圍禽息燈前祗自吟  
脾虛常病酒思苦不操琴  
媿我嵇中散知君李翰林  
東山一片月總是送君心

有感

蘇武羝生乳鄒陽出獄時  
感時雙鬢短憂國一身危  
直道左儒死初心季札知  
臣工一如此天意竟何爲

寄周王孫西亭二首用王元美韻

層冰一夜解黃河九曲春  
聲到海多惟有波光流不盡  
梁王城下幾時過

河北河南雪後春王孫草  
發客愁新梁園舊事琴尊在  
他日相逢是故人

呂梁洪留別章水部子應

漢家戰壘暮雲空西北山河  
王氣中千古雄濤雷出地  
兩崖惟石虎生風自憐滄海  
意何極誰信黃河源可窮

今日臨流別水部滄浪一曲百川東

黃河舟中寄姚水部汝建

澆澆南風灑灑流天吳吹雨冷驚秋愁來不信頭能白  
烟草江南六六洲

淮南謠六首

舊年種官田今年乞官粥菜麥俱爛死相聚雨中哭  
日給半升糧一家三四口死者枕泥塗生者猶翹首  
昨暮給糧歸途遇催租吏不足供君食呵譴何由避  
食糠猶得生食草多遇毒何如服毒死免遭官府辱  
處處哭爺娘村村賣女子非圖我獨生不忍與同死

倭夷兩度來殺人已過半那堪復饑饉坐視咽喉斷

過淮再訪張給事異卿

霜落淮陰後睽違又十霜若爲音信杳其柰道途長夢  
裏黃衣者山中青瑣郎知君問來處盜賊在南方

午日淮陽遇虞國用兼寄衡王孫

辛年歸故里午日復淮陰共抱三閭恨徒懷一飯心虞  
卿今有後鍾子舊知音且泛昌陽酒悠悠江海深

邵伯值四十舍弟陪臣

井邑遭兵燹移家近馬湖黃巾餘黨在白髮故人無親  
老仍多病田荒不及租他鄉今夜月相對話窮途

過唐山人自東精舍

殷憂不可寫行藥之東家白日窓間過滄江屋外斜蟻  
閒穿古壁樹老吐餘花惟有長春草令人忘歲華  
訪李隱君本容感舊

草堂風雨一燈孤記得逢君解轆轤此日登堂重惆悵  
十年前去故人無

寄北海黃冠道人劉仁卿

憶別相將老那堪手重分春深無鴈字海闊有鷗羣名  
以黃冠著道於皓首聞二齊隱君子寡嘿不如君

金陵雨霽登吳子克山人長吟閣次韻

五嶽窮搜老未閑長吟此日共躋攀相逢到處俱爲客  
大隱明時不在山絳闕春深烟樹碧石城雨過草花斑  
六朝事業漁歌裏江上浮雲自往還

石城爲許吏部賦

積石凌霄漢王圖萬象臨金銀完地肺龍虎壯天心氣  
聚三千紀形蟠百二尋鍾山孕靈秀時有鳳凰吟

寄二十姪惟靜

誰分南北阮一本詎殊途曠達因憐汝飄零頗類吾青  
山歸夢遠明月此心孤皎皎天雲外空懷千里駒

明妃怨

君恩高莫極，妾敢怨和親。  
請問平胡後，閩外屬何人。  
訪何元朝黃淳夫不值

何遜本高情，時同黃憲清。  
多才吳下士，其隱石頭城。  
未得見顏色，空教聞姓名。  
遲回如有待，江漢暮雲生。

廣州曲寄包太守子瑞

粵中天地古南蠻，窮冬無雪花。  
堪攀九月驅車度，梅嶺太守家。  
在天台山桃花未發，啼鴝鴖鴝無聲。  
夏陰綠五千江路，九迴腸爲君遙贈廣州曲。

托陳奔牛寄蘇大司馬書

蘆芽欲老問鱸魚，風煖毘陵四月初。  
聞道尚書爾鄉里

爲余一寄濮陽書

憶沈太守玄洲

紫腦仙人家五城，棋殘猶憶飯青精。  
詎知南國詞人散，曾送長沙太守行。  
夜雨忽驚黃鶴老，春風定有紫芝生。  
欲拋書劍遯妻子，來續玄洲石上盟。

荅新樂王使者兼寄王審理天宇

秋水見鱸魚，山人尚索居。  
一言余有感，千里爾傳書。  
客子授衣候，王孫慨飯餘。  
善辭非不往，使者意何如。

臨行登姑蘇王氏樓懷許丘馬士全

爲憶南徐許郢州，臨行重上仲宣樓。  
三吳山水睽幽賞

兩浙烽烟感舊遊  
廢苑平吞芳草色  
練江斜帶夕陽流  
輕帆未發心先折  
沙岬無人自白鷗

江南舟中寄盧月漁山人

泛泛小舟波底滑  
下江三月蓴菜肥  
鷓鴣引鷄淺深見  
鷓鴣打食高低飛  
比去自憐風土熟  
南歸翻覺故交稀  
新來吳越相逢者  
星月空山幾布衣

寄大司馬蘇公

想見蘇耽鶴雲飛  
濮水陂功高神鬼忌  
力盡髣髴毛知寄  
興陶潛酒論心  
杜甫詩睽携冰雪後  
次第賞花時

送人歸錢塘

亂後望錢塘春寒島日黃  
山川仍旦暮民物幾存亡  
夜渡防漁火風潮識戰航  
江南日凋敝無淚寄家鄉

登江樓望吳越

遠世重雕戈稱臣自尉陀  
越天低帶雨吳地暗生波  
城郭微茫見龍蛇出沒多  
爭衡三國後放達幾人過  
詞客黃金賦佳人白苧歌  
雄心挂星斗幽事足烟蘿  
王霸空陳迹山川柰老何

送新樂府教授林宗湯歸閩

雪消北海君辭我  
花落吳山我送君  
千里穆陵同逆旅  
三年梁苑幾離羣  
荔枝廬榻堪投老  
鴻鴈鱸魚不可聞



脫畧此時從此別惟餘孤夢達南雲

遇沈四十二嘉則兼聞張公子孺教

四十五年不相問相逢無以作殷勤且留白眼看時變  
定買青山避俗紛何處更尋張仲蔚平生只有沈休文  
鷓鴣冠子余先製分付滄江鷗鷺羣

高大夫文中鶴使

階前見鶴使大夫之何所鶴鶴無所言低頭堂下舞舞  
罷復登堂黃鵠心逾苦

送曹少參有卿赴羊城

曉發山城下依依官柳新好風占盡鷓鴣鼓薦芳晨螺

甲三江水檳榔五嶺人明君拜陸賈南越自稱臣

送陳大叅于韶赴江西

大江西去一千里遠近汀洲杜若開廬岳曉雲從地起  
鄱陽春水自天來官聯藩省名逾著俗似吳門政可裁  
重鎮東南今有幾知君真是豫章材

吳山望中有感

誰問狂吟客登臨意獨遲霞樓岳飛墓山遶伍胥祠天  
地交兵處英雄盡命時百年雙短髻空受海風吹

遊吳山寺同翟教諭沈嘉則文子敬次韻

拂衣直上百盤梯客自忘言鳥自啼萬里潮聲回玉壘

四圍山色護璇題僧來竹下風初動帆過峯前日欲低  
不是春深武陵處碧雲芳草也能迷

許節婦

全生撫孤兒守節報君子此心移事君張許可同死

泊姚江訪楊秘園山人不值

嗟予蹇劣人未容安所向或遊齊魯間或在秦華上雖  
云辛辛苦心歷歷得奇狀十年且一歸正值春浩蕩弭棹  
舜江城因之訪高尚草蒲讀書處賢哉一陋巷白日欲  
西馳思君益惆悵

江上懷峨眉道者兼寄空塵山人

長生無術煉黃金書劍俱忘不廢琴入夜幾迴天馬走  
臨流一曲水龍吟秋生鶴骨年年病月到峨眉夜夜心  
未得從師度黃石萬家霜葉越江深

送西僧渡海

一謝西方路同登東土船船中如舊國海外更何天呪  
食魚龍喜然燈島嶼懸當年杯渡者許爾結良緣

寄塞上

九月陰山道黃沙凍不飛未調新戰馬猶着舊征衣上  
將全功去殘兵夜獨歸却憐聖明世壯骨老金微

贈俞羽客

俞子海上人能知明窓塵一飛蓬闔水三見桃花春劍  
外靈光滿眉間道氣真金鵝蓋可拾願得我爲隣

萬壽節採菖蒲

綠劍真人三尺長黃姑曾佩到仙鄉九洲明月三江水  
我欲採之獻紫皇

春日雨中約袁山人訪楊本清

二月花如霰山城尚怯寒停雲憶顏闔冒雨訪袁安貧  
置千金易生逢二妙難相看竟無語素髮且加餐

春雨同陳尚寶石卿張庶憲子受陳大叅時卿茅秀  
才汝賢雙尊登慈谿新城有感

此地誰開闢垣墉此日成蹉跎流白刃辛苦爲蒼生樓  
碍春山影江吞暮雨聲一尊共登眺應慰亂離情

清道觀持齋候方國華不至

爲尋靈境獨凌晨海氣陰陰鶴鶴隣坐眺青山懷隱士  
爲養白水學真人更無大藥能除老惟有流鶯解送春  
只隔江城不可問滄波淼淼正垂綸

姚文生秀才訪余山觀

江山失姚合誰復見良工愛爾青年子訪余石室中應  
憐吾道在還許此心同徙倚長松下悠然生谷風

風雨登郡城

劔倚江天動遠思江南亂後獨歸遲滿城風雨收燈夕  
萬戶絃歌破賊時欲採驪珠候潮落且凭雉堞看雲移  
終期買棹滄波上相喚妻兒理釣絲

歸鄞寄嘉興侯太守儒宗

江南晏安久前歲忽兵戈盜賊下車息兒童騎馬歌九  
江無猛虎全浙頌嘉禾我亦在隣治思君此一過

夜經徐家渡

夜渡聞鬼語隔江見明月過橋不敢行畏觸生人骨

寄上新樂王

家在鑑湖上行藏受一航主人曹子建鄉里賀知章舊

盛明百家詩 續呂山人集

隆慶巳巳友人貽予呂山人稿梓入後編今歲庚午  
冬山人又以茲稿并近作寄予山中續爲登梓題曰  
續呂山人集茲稿舊梓于曾藩中立公公爲序云山  
人往來魯趙青齊間且十年鶴骨癯癯若不勝衣然  
貞介廉潔不妄交不苟取以故爲縉紳所重即此可  
以知山人矣山人詩有奇氣多從人意所不到處用  
力蓋駸駸乎唐漢人之階徑也是歲十月望後無錫  
是堂散人俞憲再識

留別海豐諸公

明月滄洲是舊遊諸公何必重相留憶爲客處逢初夏  
想到家時及暮秋山轉夕陽隨匹馬岸移樹色上孤舟  
大江南去幾千里回首煙波兩地愁

較獵圖爲喻明府賦

大漠天分處平原較獵時馬嘶衰草健鷹入暮雲遲胡  
部供牛酪番王踞虎皮那知漢禮度垂拱自無爲

別陽信諸公

三月滄洲客重過陽信城共君通夕飲慰我遠歸情秋  
氣侵人早蟲聲到處鳴不堪口馬外黯黯暮雲生

宿毛公子海隅別墅詩別

信容顏好那知髻已蒼一秋渾夢寐終夜到家鄉毛  
遂壯心在呂安歸路長空堂對耿耿涼月滿滄浪

簡巡海董憲副

董子元王佐勛名擬伏波雄才匡世久義氣感人多漫  
爾辭簪組飄然隱薜蘿碧山明月夜應許海樵過

舟中冬夜寄馮明府汝行

歲事驚心一葉過不知客夢夜如何臥聞羣鴈鳴沙磧  
起看層冰冱野河洛下帆檣淮水盡舟中言語楚人多  
此時別有傷離處腸斷南船商女歌

秋夕唐山官舍兼寄喻明府

翠華千載空消息  
弔古還應動遠思  
草沒漢王無寢處  
山留越客獨吟時  
荒城雨氣蟲聲切  
落月槐陰夜色遲  
強把一杯問黃菊  
不知何地楚天涯  
述所見有感

春明門外厭青春  
白馬繁纓紫綬新  
我向長安病三月  
風塵無地着閒人

寄楊中丞

溥溥華露湛庭柯  
別後空憐客夢多  
今夜中州看明月  
不知何日渡黃河

登宣務山隆聖寺

陔陀無草樹騎馬直登山  
竇泐藏神物雲根鎖石關  
問僧蕭帝後看碣宋年間  
偶爾來探勝塵心得暫閒

秋日陪馬明府馬廣文祭堯山

郭秋光滿登臨興轉孤  
萬年禋祀在三尺土階無宿  
草猶裹國空山問慶都危然  
一拜罷金氣肅天厨

自齊往鄴過任城訪李大叅德聚

草色平原路而今復舊遊  
新秋離北海明月過中州  
君作還山賦予慚隱者流  
不知何所似得上李膺舟

李大叅德聚慕道常夢純陽與語因名其園爲漫仙

題贈

君慕玄黃理多予偶命名問年三老數十地五仙城玉  
葉花初種金光草自生天風知早晚並鶴御蓬瀛

夜懷

起來喧不減策策涼風生月暗蟲聲裏人孤樹影中南  
埏寒尚早北地候難同想到鄞江上秋花滿舊叢

哭楊侍郎二首

一朝淪劍氣生血污戎衣奏疏終無用精魂恐不歸  
門煙草遍遼海鶴書遲諸將方垂泣天山又報圍

仰天揮涕泗莫可向人垂驕虜年年入邊臣日日危朝  
馬烏泣生死寶刀知莫道君恩薄孛存幸有私

次李大叅韻留別

河北中秋盡江南九月歸草深藏虎穴潮滿上魚磯田  
舍春新稻山妻補舊衣到家貧自得莫恠與君違

夢楊侍郎

烏丸回肅殺憶別白河時爽氣浮龍劍寒光蕩虎旗臨  
流重把酒握手一題詩逝矣寂無嚮斷腸誰復知

望鄴下懷謝山人茂秦

舊遊無復在老去惜離羣吳越一爲別音塵迥不聞旅  
懷俱落落秋氣重紛紛極目平原路蕭條獨問君

辭叢臺

辭却叢臺去依然感慨深青山黃鵠夢滄海白雲心不  
盡高秋意猶餘清夜吟中原多壯士誰共此登臨

輓應禪師

吾師幻何所抱泣向西風說法席猶在隨緣世不同行  
藏歸絕域言語入虛空誰識無生理乾坤寂滅中

鄴下送張茂復北上予南歸

潦倒張平子相逢燕趙間傍誰看白髮何處問青山北  
上風雲滿南歸江海間中原此時別共爾念鄉關

憶九日登叢臺送茂復張山人訪馬邯鄲

叢臺高出滏陽邊煙樹平臨九日天賞處秋花愁未放

別時海月望將圓思鱸張季猶爲客飛舄王喬疑是仙  
相見倘詢予去住半生慚遇主人賢

北下過江寧成臯二長君南歸留別

寒烟白草渡漳川重見諸君才且賢風物古來亶甲地  
文章今復建安年應慚騷客分珠履猶憶先王啟雪筵  
兩度秋風歸不去故山月冷剡溪船

趙康王輓詞

一聞 天子泣下詔輟朝班 聖意真垂憫英靈苦

不還銅車沒秋草玉匣葬寒山夙知雲霧好那肯駐人

間



寄海霞道者

欲訪騎鯨客緣無泛斗槎台光浮翠水靈氣吐丹霞  
緲三銖服繽紛五采花有時收暮雨飛入阿香家

贈趙武舉

幾年不相見何事髮蕭蕭有宅臨銅雀平生愛寶刀壯  
心貧更熱俠氣老難消一語逆君父千金未可招

湯陰武穆王祠

天意恣兇慝將軍勢莫爲氣存生髮地忠盡死心時泣  
血包胥見歸魂嵇紹知古今臣子恨雪涕過王祠

渡高村石河

遄征發霜曉遠道絕交親沙汜足飲馬草橋獨過人  
流喧白石隔岸走黃塵前去大河際何勞重問津

相國寺阻雨對菊飲和上人

南歸舟楫出陳留風雨催寒坐沃州賴有幽花堪遣興  
可憐黃髮不禁愁藏中佛蹟看唐碣城外河聲走汴流  
弔古幾來經劫地一尊聊共野僧酬

贈周王孫

乾坤一斷梗世事復何論兩度汴河水十年趙國門  
寫秋悲客子好句憶王孫兼爾温如玉劉滄古意存

贈許殿卿

蜚名馳歷下相見勝聞初才擬劉公幹官閒董仲舒年  
來詞賦重日與宦情疎長侍銅車暇隨時好著書

蒼泉爲遠上人賦

蒼山卓錫處源自沃州通照影雙林下分身一葦中  
隨流水盡心與大江空已破西來意浮天直向東

汴上值胡典簿文叔

鄴下曾相見重來一愴神王官即隱吏客子是鄉人行  
盡梁園雪還逢越國春共嗟兵燹後山水少比隣

過白潭

賣劍出梁國拂衣下偃城龍蛇常出沒兵馬昔

歛一帆影日斜雙櫓聲到家知早晚日夜數歸程

舟次西華

鴈過停舟處徘徊野色遲城根流水抱岸角斷橋垂烟  
集棲埤鳥風寒牧馬陂豈堪今夜宿短笛隔船吹

潁州阻雨訪楊琴士不值

微茫浦溆漫沿洄一點漁燈鴈獨哀昨日片帆蔡水上  
何人從事潁州來煙深古戍聞鷄起鐘斷荒城帶雨開  
曾惜六郎美風度共誰調鶴向琴臺

村家阻雪寄張給事巽卿

絕夜孤村旅食稀金河冷氣濕征衣舟橫斷岸人難渡

續昌八集 卷全  
雪壓空江鴈不飛懸夢短燈三宿暗酬恩長劍七星微  
不堪索寞悲遊子歲晚關山未擬歸

歎世

歲序忽驚春之齊復入秦我常論世道誰是感恩人白  
日空垂泣青山不厭貧此生何所有秋水一絲綸

夢老父

冰雪涸川陸窮途憶老親病深黃葉夜夢繞白頭人髮  
自愁中變家從亂後貧山妻勤井臼雞犬諒無嗔

懷吳生

與君同齒還同里齊趙行蹤落落聞王粲愁來曾作賦

陳琳亂後未從軍流雲野馬星辰隔剩水殘山岐路  
長使豪華不相見大江南北鴈離羣

伏枕舟中作

楚魂招不得哀怨此中多纖月回頭失踈星伏枕過榜  
人吹宿燎曙犬吠驚波毒霧塞江海勸公無渡河

寄大司馬張公

野鶴孤雲那可尋天邊山色寄歸心聲流白鴈關河迥  
夢渡滄溟島嶼深太傅宅邊潮上下辟疆園裏樹森陰  
無餘往事多君著不採狂夫幽憤吟

夜行

小僕兼疲馬荒荒獨夜行  
滄江愁我處流水斷腸聲  
語知臨浦煙光似近城  
不知何地宿無月又三更

冬日感懷

直北雲天朔氣陰  
中原生計幾浮沉  
妻孥貧病仍兵革  
兄弟存亡絕信音  
日暮途窮何所事  
江空木落未歸心  
少年磅礴今垂老  
併作冰霜一醉吟

自陳州過楚懷亳州李別駕懷遠何明府

夕陽落木影踈踈  
遙望荆塗禹鑿墟  
九月星槎浮楚熟  
兩臺沙草過陳初  
談兵庾亮新登府  
避世陶潛舊卜居  
今日行人看山色  
百年興廢復何如

冬日江行

自齊出趙備梁陳入淮途經四月

七月滄洲戒別期  
九河雲物重馳驅  
天寒客裏留三舍  
日短人間信五時  
欲凍寒江潮獨晚  
背巖孤艇月偏遲  
莫言歸去當殘臘  
會有春風入壽卮

揚州

淮海人煙漸入吳  
初冬翻爾客心孤  
莓苔雨暗蕃釐觀  
物柳風寒白馬湖  
騎鶴仙人真孟浪  
聞鷄糝士任踈迂  
龍舟錦纜東流盡  
肅肅霜天起夜烏

過山陽有感

黃金散盡不封侯  
始信浮生總浪遊  
漂母祠前芳草暮

淮陰道上白雲秋  
帆收遠寺鐘初定  
角轉重城水亂流  
多少英雄死無處  
何如吹笛下揚州

曉望淮陰寄諸友

夜氣睡不足起來寒  
月沉飛流貪海濶  
積雪戀山深未盡  
親朋念空餘霜露  
心敞袍將短劔  
今日度淮陰

過寶應湖望高郵作

入淮冰雪候川陸  
少人行草落漁家  
出煙消湖水平  
帆檣半商賈鵝鴨  
滿州城忽憶曾棲  
處滄浪夏夜清

巫山吟寄射洪謝中丞

山高高莫極氣色  
幾朝昏峽靜浮春  
雨江空響夜

王今夕夢神女古時魂  
宋玉千年後風流誰復言

太虛洞寄屠公子田叔

鑿石開滄嶠空明藉  
化工星光銀浦入霞  
氣赤城通賦極思  
玄外神遊非想中  
時來王子晉飄忽  
五龍風

憶元六

共憶爲兒時問閩相  
嬉戲煦煦惟飲啄  
不問何天地一朝  
及總角始知敦友  
誼出入各告戒相  
看生意氣華鐙不  
永耀浮雲焉可繫  
遂致南北間中途  
盡捐棄始識人生  
會面難逢人涕泗  
長沈瀾中原格鬪  
今未息聞君仗劍  
閩南客閩南道路  
山川隔况爾無家  
歸不得魂魄歸

來不相識顏色黯黯眉髮白心知別後老兵革爲君生  
死苦相憶

與黃滋穆話舊

神書藏禹穴龍馬失天曹太拙爲時棄多能不自勞古  
今同睥睨天地一毫毛家近扶桑水相期駕六鰲

寄題李于鱗白雪樓

不挂人間皓齒愁謫仙歸去更風流絃中久輟幽蘭操  
歷下重開白雪樓半夜潮聲聞到海一尊山色坐冥秋  
欲消今古無端態盡日狂吟醉上頭

夜雨話別黃滋穆兼呈秦憲使鳴和

空齋夜雨坐紛紛春盡明朝不可聞海上青山頻入夢  
天涯白髮此逢君淄澠水漲迷官道管晏祠荒鎖暮雲  
况爾知音復知己那堪相見復相離

冬日北海客舍寄蘇司馬

蕭條千乘地盡日風沙寒長夜惟餘夢短天不午飡荒  
城半鷄犬到海絕峯巒欲寄別來意依依縑布冠

留別謝少府子魯

木落見中州遙連白帝愁黃河臨斷岸明月上孤舟作  
客已多歲還家又暮秋思君西下日寒葉滿江流

訪徐太守園亭

隱隱林間五月寒燭花光染碧琅玕王門夜雨空彈鋏  
霸岸秋風早挂冠往事漫於詩思苦高懷常共酒杯寬  
相逢不盡相憐意明日別君行路難

同楊三煥南歸值雨舟中小酌

逢君無語起鄉愁萬里歸來欲白頭淮海星霜嗟異業  
吳天風雨幸同舟浮生總付杯中物浪迹多慚水上鷗  
寒盡烏門梅已放還期蠟屐探春遊

到家苦雨寄城中諸友

歲晏兼貧病歸心詎可論寒潮冰下咽饑雀雨中翻野  
逕蒼苔合山窓白晝昏還家已十日愁絕舊柴門

薊門別楊侍郎

野人家在四明山之陽二百八十峯前古有逍遙場我  
欲避人買此好山水不與五陵俠客爭榮光昔遊淮海  
有人識青春玄髮生昂藏說劍數遭楚王間投珮去國  
蘭無香至今束策板戶中白日高卧繩爲床一室何足  
拂衣下高堂不及理征具妻兒牽衣裳問余何時歸黯  
然各斷腸志士寧肯畏別離出門自然天地知生來四  
方射弧矢詎能株守齷齪爲新豐道上呼斗酒拔劍砍  
地霹靂吼主人明日索酒錢解下轆轤我何有五渡黃

河心欲寒世上王侯今在否黃金落落昭王臺曳裾豈  
獨余不偶劇憐王粲賦登樓日暮荆門煙樹秋文章不  
用馬牛斃山川慘淡龍鸞愁寧爲小忿傷大節當年讀  
書本激烈牢落風波二十秋長江流盡英雄血時窮慮  
及天下人感悟造物能通神忽憶遼海歸來鶴炎天飛  
歷三邊塵薊門一見霍博陸呼我幕府蓮花賓許我出  
關傳食遊關吏不敢相呵留東去榆關觀碣石西從上  
谷俯雲州長城亘天祖龍業赤雲薄地迷蚩尤蚩尤已  
滅祖龍死殺人塗地竟莫止我來心亦苦戰時六郡材  
官屬庶李胡兒不敢窺天山

水不用兮

刀騎馬行飄飄華髮沙塞明萬壑千巖馬蹄裂險絕始  
知天地平延袤萬里不可極秋高殺氣酣金聲谷子乍  
聞沉心曲觸目愁上烏丸城自笑餘生四十六燕趙齊  
梁徒碌碌欲凌肝膽訴上帝昨夜秦坑聞鬼哭明朝明  
發涿鹿岐感懷惟有故人知手持杯酒泣不下慷慨爲  
別楊司馬

寄李叅將從楊制府出巡遼海

聞道將軍開幕府又從司馬度遼陽胡笳奏處寒雲黑  
戰馬嘶時燕草黃上策幾年懷李牧解刀今日贈王祥  
鯨波不動旌旗影鴨綠江晴夏日長



檀城送別陶未夫之京兼寄陶翰林

漁陽東下古檀城客邸逢君復送行五月雨涼秦塞遠  
三河雲護漢家兵運籌謾恃前朝業彈鋏空憐異國情  
爲語風流陶太史山人慚媿不知名

登候濤山

兵火後移建普陀寺

天盡重開歡喜國片帆直渡海之涯城臨島嶼鼉鼉伏  
地極波濤日月危蜃氣四時吞殿閣龍光終夜閃旌旗  
鯉奴亂後星辰定會見梯航入貢時

同周山人文父張公子平叔宿候濤山閣

傑閣臨無地星辰貫綺疏候潮鐵馬亂聽月谷音靈

泣秦餘石僧傳越絕書仲連俱未老蹈海意何如

張司馬玉芝堂牡丹初開即席賦此

把酒臨華館携鐙啓絳紗種分天女國春到地仙家  
浥雨香初泛含風態欲斜似憐游子去先放兩三花

憶環谿草堂託張公子寄雲間沈大叅

白苧當年憶勝遊芳尊早暮共登樓秋風故國張公子  
明月雙谿沈隱侯花氣尚憐吟處醉江聲不斷別時愁  
吳淞水煖鱖魚美何日重來泊釣舟

題范司馬安卿山子

招遙下仙子深坐說玄靈縮地呈巫峽開渠借洞庭沙

坪留鹿迹石室撰龍經適意足山水何須九點青

出越江寄張孺毅

病餘初下越王臺杜宇聲乾謝豹開兩岸亂山隨棹轉  
半江落日送潮來夜行曲水春無賴曉度西陵首重回  
四海交游半凋替幾時采藥向天台

雨中渡錢塘留高大夫文中宅出新詞譜以侑觴

碧雲芳草滿天涯相見應憐歲月遲半夜開尊留客處  
片帆帶雨渡江時青蓮許結山中社白雪教傳郢上詞  
且醉且謔休問訊浪遊原不計歸期

雨中望三茅觀寄王仲芳

不見王摩詰無由託羽翰青山資旅食白髮就仙丹  
遠近江城晚棲遲風雨寒知君不歸去心戀竹皮冠

宿虎丘山下懷質夫

遙傍山家歇空潭塔影低雲根懸白板樹杪認雕題  
鐘響松濤雜僧歸花霧迷同懷人不見終夜子規啼  
乘風過毘陵

飛帆截平地恍爾乘空行春盡延陵道山餘泰伯城  
水騰喧樹影風急逆鶯聲縹緲新豐市疑聞舊酒馨

同馮郡博諸文學遊長山龍湫得謔字

爲訪馮太史南徐得漫過人煙逼虎窟雨氣暗龍阿  
落

日見江漢空山聞笑歌望窮滄海外吾意老漁蓑

寄招隱寺讓上人

臺殿森陰洞壑連衆山高枕大江邊偶來越客一千里  
相見吳僧八十年雲物晝生龍臥石松風夜出虎跑泉  
再來欲勒戴顓傳肯借禪關幾夕眠

諸公邀登甘露寺留別

天風飄忽苧袍輕兩度登臨慰客情踈磬雨催山寺曉  
亂帆春放海門晴江迴缺甕三吳盡潮過金陵七澤平  
明日別離何處問斷腸烟樹漫蕪城

京口望揚州懷吳原相沈肩吾

隋宮梁苑暮雲遮淮水淮山煙樹斜隔岸雨晴飛燕子  
渡江風煖散楊花多情李札常爲客抱病休文未到家  
我亦飄蓬無所寄祇將詩酒報年華

登焦山訪郭次父不值值陳允修王則明

不見郭有道空江夏夜清豈期逢二妙相與話三生古  
洞流雲響殘潮帶月行嗟嗟焦隱士泉石好同盟  
同張平叔余君房飲張司馬湖亭得陽字

萬里狂譌客重來宴此堂池臺今上相我輩舊高陽山  
色清尊破波光白苧涼不須辭醕酹明日又錢塘

登黃鶴樓遺址

獨上高城汗漫遊天開兩郡夾雄流一聲鉞笛人何處  
萬里空江月正秋黃鶴不知天地老蒼梧應爲雨雲愁  
新鯨客去稱衡死滿眼烟波共白頭

登錢塘江上樓醉中有感

登樓感萬古何似仲宣才月爲銜杯出潮應待客來華  
詞元樂府烟草宋池臺獨有錢王廟臨江朝暮開

句章里寄城中諸社長

白石江鄉家益貧 聖朝漁父不稱臣門前海水通三  
島谷口人煙雜四民手種參苓義世藥心知鷄犬漢時  
隣却憐叔景浮雲薄留得黃冠一季真

同黃憲使張山人雨中登戴子謙種玉樓得風字

種玉樓高赤嶼東蒲城涼雨淡秋空星辰暗度欄杆下  
江漢低回鼓角中白髮漁樵貧自好清朝詞賦老猶工  
一尊潦倒何如我海樹煙消昨夜風

懷齊雲岩寄汪中丞

秦漢無人到鴻濛有此山精靈不世出猿鶴及時還託  
迹羣仙外爭雄五嶽間飄飄極神想何日一躋攀

西窻雨思

吾豈好名者窮生自不齊踈狂非假阮幽憤實含嵇孤  
月平林沒寒鴟後夜啼此時心折盡飛夢大淵西

爲張司馬壽

江山一笑破烟霞不問人間幾歲華三代文章翻白髮  
兩朝事業謝黃花秋生叢桂初開社月在滄洲舊在  
惟底夜來風露爽天河萬里轉星槎

雨夕思鄉駐雲飛一闕

四海空廬跌宕明時一酒徒忠也慙無補孝也慙無補  
飛雪漸點頭顛何時歸去路遶三湘兩載無尺素風雨  
江天鴈到初

續呂山人集終

盛明百家詩

續萬履菴集

萬履菴集刻成予方以爲少也客歲華存叔還自京  
師復遺嶺南稿一冊刻爲續集時履菴官禮侍矣其  
他遊宦詩篇必多不知何日更見示也虛木耑俟隆  
慶戊辰冬日忘言老人俞憲再識

過梅嶺

重關鑿天險鳥道出青冥方物來番舶明珠入帝庭  
衝星乘漢傳拂石看唐銘萬里投孤跡飄飄似水萍  
人日偕諸藩伯遊海珠寺

石骨支滄海珠宮駐法乘波浮浴日鳥船渡趨墟僧梅

柳逢人日山川聚友朋遙思吾地勝盤菜剪春冰

英德道中書懷

明時懷祿亦堪慙白首投荒到嶺南百疊灘流浮客往  
萬般山勢與心參松杉路合廻前浦雲霧天低轉夕嵐  
十室九經豺虎散高品偷息一僧龕

送大叅程靜泉入賀二首

聖壽齊天始六旬嵩呼四海走王臣八千里外趨朝客  
二十年前尚聖人整珮入班同榜少望門投謁貴貂新  
羨君復見長安日莫更逢人歎積薪

鳳曆干支紀丙寅 君王初度頌聲均人歸日下雲端

路衣帶天涯海角塵已覺理函隨御氣行瞻黃屋近龍  
鱗清朝正欲咨民瘼嶺外瘡痍試一陳

言別

宦海迷人歎陸沉祝融炎瘴火偏淫保釐無狀羞糜祿  
容髣齊彫只有心室遠玉人誰作伴書投金闕欲抽簪  
朝端若問嶺南使云是衰年病不禁

肇慶登崧臺暫謝簿書解衣獨坐盡日

天淵江清已覺寬更尋江閣坐雲端星岳數點隱高麓  
漁舟一灣爭急湍莫訝騎曹忘記馬且容桑扈暫投冠  
客愁到此都消釋疑是幽人在考槃

病中書懷次張纓泉憲長韻

拜盜無能媿薛宣  
黃花只合醉籬邊  
此身渡嶺八千里  
衰鬢逢冬五十年  
蕉鹿至今占昨夢  
網羅自昔墮塵緣  
閉門數日憐同病  
喜得瑤華贈蒲篇

客中謾述再用前韻二首

亡羊本爲路多岐  
臧穀原來總是迷  
滄海望時諸瀆小  
泰山登處衆峰低  
獨醒屈子寧煩卜  
示病維摩孰解醫  
我亦心情渾似水  
年來頭角漸忘圭

前席難逢漢詔宣  
蠻烟深鎖瘴江邊  
不將蒼草推他日  
欲托檳榔付短年  
應世已除通介跡  
觀心未了去來緣

大鵬萬里逍遙意可愛南華第一篇

登越王臺有感

高臺千尺雄南越  
更引甌閩作外藩  
漢使當年迎陸賈  
吳人異代泣虞翻  
松圍墓塚移新主  
潮長城壕只舊痕  
可恨相臣謀國誤  
絕無遺種爲招魂

張曲江祠

複道通高嶺  
孤祠寄獨峰  
關疑天地隔  
人想古今清  
淑扶輿氣  
栽培造化功  
御前頻進諫  
亂後始知忠  
生也當南服  
良哉嗣古風  
開元張相國  
名與此山終



盛明百家詩 龔副使集

姻友華少嶽遺予三幻集一編讀之則虹洲龔憲副  
作也予舊有此編逸去乃爲裒而刻之三幻者虹洲  
先宦潤州爲司理繼宦南臺爲侍御又宦永嘉爲郡  
守自謂宦者幻也而集是得名及後擢宦襄陽爲兵  
憲則予嘗同署而詩未專刻也虹洲名秉德字性之  
嘉靖辛丑進士家山東之濮州性喜山水所至必盤  
桓終日歿後家甚貧無子隆慶戊辰四夏是堂山人

俞憲識

秋江晚望

萬里煙波屬上游，海天風氣接高秋。山連京口盤雲出，潮轉江門帶月流。鴻鴈空傳南下字，關河猶阻北來舟。乘槎歲晚無消息，落木蕭蕭滿渡頭。

秋仲十四夜對月二首

素魄當樓滿清光，遍枕多林踈疑鳥雀。江白恐黿鼉撫景添幽思，臨風起浩歌。迢迢望霄漢，此夕柰姮娥。玉笛聲初歇，瑤臺影乍明。桂枝疑露潤，兔杵傍雲清。涼浸燕姬館，光分漢戍營。繁尊未敢問，倚杖獨含情。

寄答石川先生

江城曾謁水雲居，千里瑤函重起予。勲業行當卑五穀，離騷漫許繼三閭。舟通石浦常看鴈，門對清流詎少魚。聞道山公薦中散，年來休著絕交書。

甘露寺二首

逶迤盤石磴，瀟灑度珠林。草帶南朝色，雲橫北固陰。波光縈戶濕，樹影落巘深。清磬泠泠發，方窺靜者心。坐愛僧房僻，煙霞識性靈。江雲侵石碧，法雨印苔青。鶴唳投孤嶼，漁歌傍晚汀。海門看漸近，片月出東溟。

曉發龍潭道中

霓旌蕩煙靄，星駕轉蒼堯。水落龍潭淺，山連雉堞遙。林昏猶辨月，江冷不聞潮。漸覺鍾陵近，婁京憶六朝。

立春日獻 表朝見

燎火初張玉漏遙  
璠函親捧覲 天朝掖垣曉月穿樓  
角禁苑春光上柳條  
趨陛欣逢周正朔  
分曹重接漢官僚  
微躬漸覺紅雲近  
多少陽和在九霄

過邯鄲有作簡董近淮同年

千里塵沙一騎過  
邯鄲城古動悲歌  
呂翁祠畔蒼苔合  
趙武臺邊芳草多  
無復美人調錦瑟  
空聞俠客擁瑠戈  
漳河不共繁華沒  
日暮東風起夕波

淮上逢董濟陽太史歸湖州賦此言別

金光罷草憶林廬  
銀漢僊槎慰客居  
淮海遙傳秦太史

臨邛爭接漢相如  
隔溪花柳邀文藻  
近水雲霞護簡書  
明發湖南傷此別  
滄江何處覓雙魚

贈鄔南涯憲使謝政還里二首

萬里蠶叢客遺榮  
事息機韋賢方請告  
疏廣竟辭歸棧月  
依龍劍江雲上豸  
衣芳名振嘉藻從  
此擅漁磯 罷官心  
尚赤投老髻猶青  
瀟灑陶元亮行藏  
漢管寧耽山歌曰  
石閉戶檢丹經處  
處流華譽江門隱  
歲星

秋日山亭閱試水戰

孤亭落木縹蕭蕭  
風送樓船闔海潮  
夾岸旌旗廻日月  
中流金鼓薄雲霄  
波搖水色明朱胃  
秋入山容射錦標

試問臨江諸將士先聲誰似霍嫖姚

江南雜咏二首

東漾海潮生西壩秋水長夜有捕魚昨輕帆來蕩漿  
積雨盈圩岸田家報有秋遊人爭穫稻閒却采菱舟

江南春遊二首

芳草萋萋蔽野遊絲裊裊浮空彩鷁飛蓬遠近畫橋流  
水西東

風吹桃葉柳葉雨打梨花杏花竹塢一灣春水石欄幾  
處人家

夏夜寓地壇道觀作

朱旂初應律赤帟屆方壇影落千年樹香飄五夜壇玄  
膏佐僊鼎瑤草出雕欄步葉雲生履牽花露拂冠星垂  
瓊宇澗月轉玉階寒飛靄薰蘭蕙鳴簫引鳳鸞芝童調  
石髓羽客授金丹燕坐心能寂高眠夢亦安汾陰良可  
賦寥廓見才難

謁 孝陵

靈園松柏鬱蕭蕭幽壑陰森一逕遙山抱玄城屯紫氣  
雲扶寶殿立青霄鸞輿鳳輦虛疑近石槨金燈儼未消  
總是成周郊外地萬年豐世頌 皇朝

贈沈紫江先生

將軍世有早談兵，餘事猶傳都護名。節制素閒諸閫靜，  
指揮初定百蠻平。伶人不徹芙蓉帳，甲士常屯虎豹營。  
聞道伏波思報漢，肯教胡馬獵長城。

元日

金陵逢獻歲，佳氣靄氤氳。碧襯吳宮草，紅聯漢闕雲。  
韶光萬戶動，春色九衢分。獨有豪遊者，酣歌入暮聞。

贈虛白道士

洞天處處是行窩，煮石通宵養太和。手把道書疑柱史，  
口緘真訣似維摩。九還消息諳應久，六甲威靈驗已多。  
聞說神遊環八極，崑崙無日不經過。

雨花臺眺望有感

崇臺縹緲出雲孤，春日憑虛覽壯圖。江遶潯陽通楚甸，  
山連京口半吞吳。秦淮風土憐今昔，王謝豪華問有無。  
回首長干傷往事，六朝煙雨混蘼蕪。

送鄭少潭給舍之任長沙

刺史分符下楚城，西風江上櫂歌聲。封章漫許推劉向，  
吏道還須待賈生。帆挂三湘秋水濶，旌懸七澤曉煙橫。  
漢家元重循良選，紫閣應傳萬石榮。

除夜言懷

鑪煙燭靄靜相兼，絲勝椒花手自拈。梅吐寒香分玉砌，

竹搖清影上牙籤幽懷忽訝丁年近華髮應憐子夜添  
獻罷春盤渾不寐霏微雪霰度疎簾

徐公子西園十二韻

邸第通衢北僊源枕郭西經年厭塵市此日遂攀躋窈  
窕穿霞洞逶迤度水畦棋枰分別墅蓮舫泊前溪疊石  
迎人立叢篁刺眼迷雕甍藏密景綺澗挂晴霓酒載邀  
雲酌詩成借竹題香亭含薜荔芳樹隱棠梨丹穴餘蝸  
薛蒼苔印鹿蹄衣沾飛絮雪屐惹落花泥金谷名堪並  
蘭亭興與齊鳳臺織月轉不復問青藜

春日過滁陽太僕諸公招遊醉翁豐樂諸亭暨瑯琊

山寺簡謝

羣峰迴合倚城西碧重煙濃路轉迷潭底雲深龍乍伏  
林端雨過鳥新啼亭留六一山形秀寺接瑯琊樹影低  
最愛蠟花當澗落不妨步履印香泥

訪蔣南泠隱居賦贈

君家淮海擅詞源逸氣翩翩道義存種竹每分蔣翊逕  
著書常臥茂陵園日高花影朝侵案月轉潮聲夜到門  
世事浮雲那可問客來唯有一開尊

臺竹

朗葉踈枝倚栢臺幽懷長對此君開晚風忽動蕭蕭影

疑有僊人擁珮來

寄贈逸人鄧梓堂

衡門幽敞對蒼山  
綠樹清谿指顧間  
身着蘿衣隨豹隱  
手持藜杖伴鷗閒  
輞川舊卜王維宅  
韋曲今歸杜老班  
回首江南更牢落  
願投白社識君顏

山行晚投梅心驛次李北山

長風捲霓旌  
深嶺度霜戟  
肩輿歷下坂  
懸崖畏巉石  
不聞樵採音  
轉覺山路窄  
蔓草悽蛩聲  
危巖留虎跡  
旅懷鬱未平  
秋思亂如積  
蹊逕入松蘿  
羣峰掩孤驛  
我友昔云邁  
停驂此憇息  
石壁落雲烟  
無由冀良覲  
伊余敝帚

材秋深忝茲役  
稅駕坐芳林  
聊因展瑶席  
陰陰雲迤寒  
隱隱日沉夕  
伏枕憶同心  
空山未眠客

曉發望大龍山

峭壁盤雲紫翠橫  
偶詢行者識山名  
鶴鳴漸覺巖光曙  
龍臥應知澗水清  
合沓峰巒空色相  
霏微烟雨未分明  
箇中定有王喬侶  
爲訪僊機學養生

雨夜發同安抵池口旣而見月漫賦一首

秋江雲乍歛  
入夜興偏嘉  
水濶星垂野  
天寒月在沙  
遠山流赤燒  
曲浦斷清笳  
燕坐蓬窻裏  
殘燈半落花

登齊山次杜牧之韻

風急天高頰葉飛聲傳幽谷遠微微雲清池口鴻初到  
霜冷江頭人未歸騷雅當年懷杜牧登臨此日愧玄暉  
探竒更欲攀蘿往轉覺煙嵐蕩客衣

華補菴謝政還錫山貽贈一首

聞君上疏早抽簪權返毘陵訪舊林梅里家聲傳素業  
蓉湖雲水靜幽襟延齡定受赤松術寄興應多白雪吟  
一枕羲皇春夢曉風波不似向來深

贈黃翠巖侍御

學憲名兼柱史聲高秋驄馬度江城掄文自許崇師旦  
校士應知忌襮衡案有羣書窺典籍臺留一鶴見澄清

遍收駿骨空吳地不負求賢報主情

舟泊京口懷舊二首

駐節昔年地揚舲此日心雲橫瓜步杳潮落海門深撫  
景添新興看山續舊吟嚴城催鼓角江柝晚沉沉  
近市晚飛煙羈懷人未眠江山猶是舊寮案盡非前樹  
影斜連郭波光遠映船臨流窺勝跡感慨異當年

過錫山華補菴暨諸郎移舟遠餞賦贈留別

秣陵曾憶共彈冠一別風塵會面難竇老清芬留畫省  
謝家芳樹滿雕闌分符愧我仍爲吏解紱憐君已厭官  
秋水驪歌情轉劇臨岐惟有勸加飡



姑蘇驛夜別石川先生

姑蘇城外晚煙重，忽漫高人水際逢。  
古驛乍停秋後舫，寒山猶聽夜分鐘。  
思鱸真見吳張季，剖竹虛疑漢魯恭。  
萍梗茫茫難逆料，滄江何日更相從。

初至郡作

銅虎初分綰郡符，專城十里試雄圖。  
身當簿領勞應劇，地接滄溟興不孤。  
祗恐疎迷懸水鑑，敢言節操比冰壺。  
公餘細檢循良傳，渤海芳聲得似無。

天柱峰

氣奪羣峰秀，雄疑萬仞標。  
根蟠來脉遠，頂峻得雲饒。  
翠

黛春常滿靈光夜，欲飄誰能回造化。  
移向紫宸朝。

得謝茂秦書寄懷十二韻

問訊梁園客，違顏幾度秋。  
詩真卑大曆，名已動中州。  
世故多嬰慮，身家不豫謀。  
吟餘添白髮，興遠寄滄洲。  
和壁逢清鑒，隋珠豈暗投。  
論交非許史，下榻盡應劉。  
時序淹歸騎，風塵戀敝裘。  
冥搜探禹穴，慷慨覩吳鉤。  
自薄千金產，常輕萬戶侯。  
孤鴻棲北野，雙鯉到東甌。  
好我頻貽賦，懷君獨倚樓。  
何時重載酒，共入醉鄉遊。

江心寺同侯二谷金文峰覽眺

秋風空憶故山薇，忽向江心扣竹扉。  
雀啄荒苔隨砌落，

鳥迎寒雨逐船飛，酒邊狂客花傳筆。雲裏高僧珠繫衣。  
自古登臨多藻賦，不知誰繼謝玄暉。

海上聞捷上總督軍門一首

萬櫓樓船靜海濤，轅門入夜將星高。氣衝短髮凌朱胃，  
血染餘腥上寶刀。料敵真如唐李郭，紆謀奚翅漢蕭曹。  
捷音初報天顏動，南顧應寬宵旰勞。

元夕夜遊集甌江宅得韶字 張甌江乃羅峯閣老子

上元燈火扈寒飈，月轉春城景自饒。裊裊芳塵連紫陌，  
冥冥煙靄入丹霄。香飄羅綺思鸞馭，曲引笙簧擬鳳韶。  
聞道星橋猶未鎖，平津遊罷已分宵。

江上贈別金文峰北上三首

嫋嫋江風生陰陰，江雨歇潮來有定期。君歸何時節雲  
影淡不流，山色遠還滅。相持一尊酒，慰此長途別。

良晤苦難邁，延佇忍睽離。相顧仍執手，惆悵春風時。玉  
京萬餘里，滄波杳難期。殷勤勸君醉，聊以證相思。

遲遲戀飛旌，蕭蕭悵行李。揚舲肆離筵，于焉送遊子。芳  
杜滿汀洲，寒鳧下江汜。贈君雙鳴璫，平生寸心爾。

晚登平陽鳳山有作

崇山表嵯峨，縹緲羣峰外。緣嵐躡層巔，遙看海門對。興  
遠寄薄遊，情愜符勝槩。陽谷散綺霞，陰崕破蒼靄。雲煙

識性靈蘿薜牽衣帶平臨寰宇濶俯視滄溟大偶茲憇  
石門忽與山僧會有時松風生萬壑發清籟雨餘山色  
佳月上林光碎夷險雖異狀晦明有殊態陟巘復降原  
篁逕轉飛蓋匪爲肆窮探冀全山水愛倘逢採芝翁願  
言謝流輩

夏日過真華觀

花塢疑秦洞山房似葛廬非因避塵劫誰此問清虛雲  
水依壇靜松篁繞檻舒幽懷思借榻枕上覓方書

江心寺題王拱甫書屋

逸少談經處支公說法筵雨花飄雪案江月照韋編學

向禪中得迷因靜裏宣相期逃世網來共石床眠

秋日感懷

江城砧杵動高秋南雁不來故倚樓戎馬猶聞朔塞急  
烽煙重繫海門憂閒芟翠篠存碁局愁折黃花對酒甌  
宦宦十年歸未得幾回清夢繞滄洲

過護國寺

瓊樓遙接萬峰陰絕壁香臺路轉深煙靄連雲迷上界  
鐘聲和梵出空林庭留老樹傳僧臘案有殘經定客心  
不爲逃禪叅法象聊依慧境散幽襟

早春對酒漫成

海畔陽和動彩毫酒傾春色泛葡萄艱虞世態驚雙眼  
荏苒年華感二毛多病幾耽南土藥遺榮思剪北山蒿  
東風漫助琴尊興不學揚雲賦反騷

送張光祿旣江赴留都任

挂席東南下建康渚花江樹引離觴清標自許如濤岳  
雄藻人疑是謝莊潮落錢塘魚信杳雲橫瓜步鴈聲長  
秣陵多少金閨彥應識當年粉署郎

夏日齋居即事

首夏物始和端居恣游衍林木花已敷池荷葉未展布  
啼空桑流鶯下崇峴雨餘竹韻清日上巖光顯澄心

扇自捐縱目簾初捲偶因謝簿書兼得理墳典叨籍力  
不任冒榮分非淺感茲華髮生滄洲若在眼神與元化  
并思將遺慮遣守道情自愜處順顏無覲升沉嗟倚伏  
明晦嘆尋轉性本戀烟蘿敢云輕軒冕

送樊斗山臺長北上

柱史聲華迥自如奚囊再整舊簪裾三秋伏劍辭鄉國  
萬里鳴驄侍禁廬飛旆漫牽吳甸柳行厨先薦越江魚  
東南烽火頻年甚應爲蒼生一上書

遊天台深處次王巖潭韻

一入靈山逕轉長遙瞻華頂鬱青蒼霞光初散連天碧

藥氣微薰滿澗香草蔓丹鑪懷葛令雲深桃水失劉郎  
赤城本自迷來路虛擬僊姬度石梁

龔副使集終

盛明百家詩 萬總戎集

予筮仕則知武弁有萬鹿園氏依附學士者  
然而不相值也最後集明詩覓其詩不得集完如友  
華少嶽氏以其稿遺予結刻如左其詩于武弁中殆  
不可廢名表字民望始號九沙山人晚更鹿園田寧  
波衛指揮中武舉以功歷陞至南京後府僉書嘗爲  
總戎督餉江淮屢伏屢起益智能之士急于功名之  
會者本鄞人入仕後多居杭州平生喜佛好施尤好  
以醫藥濟人隆慶改元錫山是堂俞憲識

病懷四首

病質當委致寧無復鍊憂好爵非弗榮犬馬力難酬所  
須三年艾收畜惟林丘樗櫟本易朽松栢豈同秋寸陰  
苟不珍逝矣詎能留

三十始志學德立始何時往者既有悔年當復怠茲由  
仕莫非學開心末信斯說惡一何殊生事當在思豈不  
貴格物窮至乃真知馳求外吾心癡狂竟何爲微吾管  
中叟萬世將誰師

老氏有至言貴大患若身旣壯必老盡安得常如春茂  
陵驪嶽間僊質俱沈淪孰幻鉛汞談惑彼貪生人豈非  
學者誤相轉故失真疑結命或延染愛非所欣朝也若

有聞夕死無復羶

海涯有一士飢餒常不充力本乏捕雞狂志在屠龍相  
逢或嗤笑但云罕所同萬里覓干將仰漢思騰冲百折  
念不回龍鬣輿從所患者志耳金石匪難通

吳門偶成

中歲若有悟常栽火中蓮託根已無所培植將何緣兩  
瞶應不壞四時花自妍偶厭縉紳交時欣俗子言山林  
忌高栖寄迹多市廛固知與者稀適意何慍焉

九月四日同孔文谷童南衡周虛巖陳海樵湖上山

續文集

秋興近佳節何必需其時登高成野集舉目皆可怡獨  
問東籬菊纍纍未盈枝未齡豈假是幻住本無期大化  
融延促貪生虛自迷傾懷同一醉日暮宿湖湄浮生但  
如此玄造欲何爲

湖上別虛巖山人

虛巖山人野鶴姿爲耽佳句故名詩心無塵土秋潭淨  
意在煙霞暮景遲相逢擬結金蘭好別去還將雲水期  
不是蓬心獨留滯江湖何處覓相知

山寺雜懷十首

病棄人間事寒依佛氏廬寂寥逢歲臘澹泊茹山蔬紙

歎官猶在非關志未舒

皇恩真浩蕩感激

閒居

盡日門常掩山居避跡深豈無兒女念爲了死生心百  
草看西意千金惜寸陰閒吟非自遣漏泄爲知音  
投禪人不與解脫且山逋我愛雲游侶形無禮數拘規  
規方是病莽莽未爲粗牛馬隨呼應逢人莫說儒  
斯世真如夢羣生大化流聖賢天上電事業海中漚聞  
道斯無際抱玄俱寡謀誰知顏子樂元與禹功侔  
唐殿垂千載終應有廢年但知興是廢應悟曲爲全鐵  
限非常計桑田本易遷出家猶刦刦塵世固紛然

借榻青蓮舍叢雲碧樹林  
迥寒人寂寂明月夜沉沉  
幽獨身忘旅虛聞自適心  
猶嫌不諱姓漸有客相尋  
望梅那止渴水向識情生  
木火危相遇唯阿析太明  
嬰兒寧有此混沌本忘情  
盡說予明性誰將撒手行  
處惡爲幾道人情祇向高  
應知托鉢者果是出羣豪  
調古誰將和形枯自不勞  
行庭人不見滿地任風濤  
多病因辭宦山中每獨行  
深雲看世遠短褐覺身輕  
出處曾何定衰榮已數更  
不須除老病吾欲悟無生  
功名三十載荏苒鬢成斑  
一自傳僊訣人間俱等閒  
陰陽全具體宇宙少慙顏  
此道元無死金丹不用還

山中酬唐太史見訪

山齋寂寂臘初深披衲朝朝聞梵音  
我已出家惟恐君來聯榻與同心  
天涯避地因多病幻跡隨緣即故林  
明月滿庭殘雪在那堪孤櫂返山陰

宿善卷寺碧蘚臺舊處

古臺依閣薜蘿深榻閉寒雲此再臨  
近枕鐘聲曾喪耳入幃月色若明心  
名途悟後嗟猶逐鳥跡空中詎可尋  
緇俗了觀元不二逃儒非是滯禪林

重游芙蓉寺

谿橋疊疊穿林麓徑入松林一障開  
似現優曇舒半葉



化成蘭若結蓮臺瞻依已覺歸心換信宿何妨落照催  
行委所如無定跡山僧猶記昔曾來

曉發靜海值雪

朔風吹曉騎飛雪滿征鞍一望川原合孤城鼓角寒紛紛  
行旅思蹇蹇僕夫顏時憶袁夫子高眠世不干

自然亭一首

亭在漕府後園

孤亭臨水上竹裏小橋通深曠市塵杳蕭條墟里同平  
蕪城列障枯木鳥爲叢吏隱吾何有悠然覺性空

奉和相公七十壽

愛賢論政色常溫吏靜庭閒道自尊夕侍西垣酬

聖藻晨趨

中閣代

王言無歌行曆紛爲

霄盡在門淮海下交遥獻頌願如松栢奉明恩

病中口占二首

年來喜了尚平債春夢應稀到越南生死已隨心  
猶將此意病中參

每悲屛息一支頤飲水寒溫祇自知三十功名消已盡  
欲歸猶有世人疑

寄懷天池寺山書記

與爾曾將出世期空山寒月共棲遲而今南北遥相憶  
猶是情塵未斷時

贈別童侍御還杭

雲霄龍驥飛騰近何事  
明時早拂衣別有玄思身世  
外知君應不戀鱸肥

水月寺改爲忠孝祠次韓司徒韻

城邊古寺作新祠  
樹隱谿迴客少知  
水月尚存僧已盡  
惟將忠孝繫人思

過東阿喜張秋巖水部遠至問勞詩以謝之

別君荆門道重會山東阿  
別時初履霜堅冰今渡河  
勞不自慎積困成沉痾  
徇寒枉遠駕攜筋列清歌  
此交情一顧豈在多

贈輩鷗江

憑君筆底識吾容  
鬢漸皤然一老翁  
我自真君識否  
盛衰不與四時同

巳酉歲五月廿二日同男盛二夜渡錢唐時久雨水  
汎舟不利涉

洪波浩浩那堪渡  
昏黑相將冒險行  
豈謂委生方是達  
但看吾履向來平

柬答馬石渚方伯

衰年一構疾形神  
索然殊解印還明  
郡親朋亦因踈  
投迹來山中但與木石居  
有懷薇垣客契闊今何如  
顧勤

垂問意頓令沉抱舒崇要自多政詎復存遐隅是以君子交悠悠靡終初相思不相見因風致尺書量力避城府豈爲形迹拘况當趨曠秋焉能安一區

題僧瑞雲扇景

人間名利俱塵土出世高僧亦染衣紅葉青山谿閣上蕭條誰向此中歸

贈性天行者

少小出家應有悟往來役役若爲忙祗緣學佛先忘我隨處勤勞是道場

夜宿毘陵聞輓舟聲有感

舟涉關河險阻身親勞瘁客久  
良辰成病卧  
夜聽輓舟歌

贈吉物雲

三晉家何在問居金馬門五侯廷士少女口向誰存賣藥朝依市垂簾夕灌園還將萍水思與爾解芳尊

金陵客舍與劉愛山話舊一首

錢唐秋夕河邊宅明月梅花  
幾處俱蝶夢  
相逢猶誦別時詩

道人自昔多山隱世路相看盡染塵少小遨遊今白首憐君猶是本來真

靈巖寺即吳王館娃宮

歌舞易消歇千秋一寺存日斜寒塔影僧閑薜蘿門  
南濠寄居言志

吳門避跡掩郊扉衰柳寒塘客到希鏡裏青絲秋盡變  
人間白日病長違蒲條祇擬填溝壑懶慢誰能計是非  
旅况自隨禪味淡佛龕錄久夜依依

夏日飲許員外山亭即景三首

一亭梧竹裏迥出市塵間石逕緣蘿入江峯對壑澗  
雲朝數變山鳥暮雙還別去衡茅下思君懶閉關  
豈謂池臺上蹊迴復此亭江環城外絕山關

花同醉彈琴鶴共聽上人應戀此不貴此

檐楹俯竒曠洞壑入庭登峰間戍樓起林連雉堞平翠  
煙巖閣靄紅日海門生景絕恣臨賞茲亭不可名

夏日同楊水部飲李氏卧雲樓喜黃陸二生偶至歌  
咏及夕

亦知衰髻短強逐少年歡淑景寧堪返愁懷但覺寬清  
歌消永日綠醕伴幽蘭冠非真樂喟然應不歎

送聞它泉之欽州

去年京邸爲君別今日江頭復送君官舸霜前隨鴈發  
客身嶺外更誰羣猿聲斷處聞蠻語草色青時入瘴雲

忠信干城堪自衛不須三尺淨妖氛

武林病居寄答唐荆川太史

病歸辭祿家無計老去貧聞子析居賓客到門常不接  
詩書乘興獨難除已知攝養形終滅稍悟浮虛意覺舒  
爲問荆谿唐太史道心病後更何如

送劉望洋之南華

幾年每作南華夢緣有曹谿一水通料得君游非浪跡  
好傳心印到吳中

憶子來章一首時赴餘杭考試聞被主司嚴譴

歛迹歸來久衡茅多閉關人隨時見背身與辱相安祿

棄家無養門衰子共難病眠唯益苦歎愁淚沈瀾

重宴楊水部容閭閣

京暄雖異序煙月共斯樓又覺一年謝空憐兩度游  
雲仍駐曲密柳更移舟留客何須醉忘情但狎鷗

送劉少府之鎮江

六年佐杭郡唯飲吳山泉髮爲憂民白心因敬事懸  
風揚庶頌江月照離筵幾許徒攀卧金焦已待賢

九月六日湖上同沈青門許茗山茅鹿門許石屋諸  
友宴集分韻得風字

已近登高節清尊雅席同未須吟待菊祗愛醉乘風餘

綠連隄密幽芳照水紅自慙衰廢者叨宴墨卿中

九日同沈青門劉望洋童南衡楊南泉姜對洋諸友  
登吳山昊天閣旣而朋舊皆至列坐庭陰分製得五  
言律一首

僊閣雲厓迴清秋此共臨江山時極目散逸識同心野  
席紛平麓斜光明近林嘉朋元不約觴酌漫相尋

題王大巡雲竹卷

片片自無心蕭蕭滿故林祗緣虛是質不礙出爲霖結  
幄虹初變棲枝鳳一吟毋勞歸夢到披卷足幽尋

贈王西石戶部

山中方一遇歡洽若平生論世懷先老憂時志甲兵玄  
空諸士蘊諾視百金輕別去頻相戀猶爲入道盟

登太虛樓一首爲孫環山太守作

擾擾人寰裏泠然此縱觀使君元有道黎庶許同歡危  
檻雙峰並西湖一曲看吾將乘鶴背萬里御風搏

宿應仙山樓

窈窕蒼霞裏登樓愛隱居水聲孤枕近山色四窓虛林  
靜朝看鹿心閒夜對書獨將耽寂意覺與世情疎

送高南州行取北上

網羅紛俊彥雅志不知君共有飛騰慶應將獻納聞琴

尊移海月車馬入燕雲清禁踈鐘晚玄機詎可云

除夕宴隣宅

弱冠辭鄉早并州久滯身乍歸翻作客欲別更相親臘  
向宵分盡春隨曉霽新寒暄君莫問千里尚爲隣

新正登阿育王寺四首

避喧來海嶠元日坐禪林自笑身逃影還將景易心寒  
流春雪化疊翠暮煙深幽寂非人境應無積俗侵  
山中無節序新歲不聞喧步壑遵樵徑同僧叩竹門春  
盤供野蔌晚磬諷空言却憶閻浮界酣歌景正繁  
坐觀山色好忽斷世間緣欣厭知情轉寒暄與運遷金

沙明寶地玉几淨慈筵說法元無二松聲祕已宣

攀蘿登上塔絕頂見蛟川杯土三山小叢陰萬室連遐  
觀隨所履色界本無邊欲識元來面因僧一問禪

荻洲詩爲張德馨姊丈作

荻江廻曲處草閣一洲間鴈宿時來去潮留日往還秋  
風吹葉老夜月映花閒自歎風塵久因君戀故山

元夕祖關獨坐

城市觀鐙罷仍還郊外居春暉林木變野興酒朋疏茹  
菜分僧供臨軒閱道書笙歌何處沸喧寂此中殊

元夕後宿應仙山莊

幾宵燈下醉雙向隴頭醒隔歲梅猶白經春竹更青就  
雲移石榻迎日啟山扃入郭非吾好塵勞髣髴星

壽樂亭詩爲戴靜山翁賦

一亭深院裏別自有山川疊石松生嶠開池地迸泉天  
光翻上戶春色每增年幽勝心俱遠朱輪何處邊

過明真宮澹然道士故居

一試人間味榮枯總澹然厭身還羽化住世已胎僊壁  
上塵封塵鑑中篆息煙因經下榻慶默默憶當年

過虎跑寺有感

果師遷化後上首繼傳鐙厨有經年粟堂無一宿僧高

山懷舊隱喬木想餘馨紺字成輝映惟應慰覺靈

午日汎湖

端陽重載西湖酒山色依然侶去年堤上兩行桃柳密  
湖邊一望死臺連競將歌管娛佳節自折菖蒲插野筵  
病質強支同此醉不勝歸思夕陽前

題楊水部五十壽卷

金冠羽扇容閒閣畫道蓬萊境裏僊尊酒每邀明月飲  
竹床還伴白雲眠榮名已覺俱成夢山水常親獨有緣  
不用知非求妙道地偏心遠自長年

壬子秋登許氏樓觀諸士入試



白露初零秋氣激高樓臨望喜賓興月宮已見千鎰聚  
桂窟誰持一斧升題柱橋邊迎駟馬乘風霄漢化鷗鵬  
丈夫奮起元何爲斯道康時待爾弘

冬日同諸友餞童南衡之南都

深山寒雨積遠出爲情親茲別社中友誰同白下春絃  
歌歡永夕雲樹悵離津君去無知己林扉一病身

報先寺鑄大銅佛書此一偈

丈六金身合下成本來無減亦無增豈知佛亦由人做  
擬見紅蓮脚下生

冬夜坐蔡可泉中丞舟中話別

山寺僧同寂雲霄客畫踈獨將剡谿權爲得故人書剪  
燭寒宵短停雲積抱舒相忘知道在復別意何如

雪中登上寺聽祇園法主講經

苦寒何用避冒雪上方行淨界天花滿空林玉樹明忘  
言迷有象聞法悟無生攀陟胡爲累吾身自可輕

元夕自山寺入城散步遇沈青門張中山劉望洋諸  
友

新正七日雪元夕月偏明即此人間景誰無鑑下行路  
多朋舊遇步逐管絃輕何事棲山寺寥寥負此生

湖寺贈孤峰禪師

有道者無我偏爲衆所依  
盧能克碓主拾得作厨師  
淨意消三業焚香禮六時  
龍華今幾會九品總蓮池

赭山戰後作

時用僧兵取勝

一夜風煙傳警急  
曉扶病骨強臨戎  
山中饘粥供兵食  
架上詩書易塞弓  
畊鑿于今那識陣  
跳梁使爾獨稱雄  
最憐子壻能忠戰  
不道緇衣也報功

閔黎吟三首

有引

淵叅政平崖錢公出按四明  
會于於舟中談及征黎  
事悲動顏色且示以閔黎諸  
詠惻然傷懷因而有作  
地何產柵與速吾何畜豕  
與犢豕犢盈盤吏反嗔柵速

窮年采不足但願黃金滿  
粵南寧使黎田不盈粟粵南

金多吏不索黎田粟少人未  
哭刻箭爲約安得銷

黎人借錢

無約刻箭記之

歲歲生當剝吾肉負戈因拚一命  
償嗟嗟黎人

誰爾牧

皇章惠爾非爾毒

虎兕來猶可奔狼師一來人無存  
大征縱殺玉石焚昔人鵬勦只一村  
鵬勦功成賞不厚大征廕子還廕孫  
殺一不辜尚勿爲何况萬骨多冤魂  
願君爵賞毋苟貪但以三槐植爾門

鑿而飲畊而食撫黎何事來相逼

舊設有撫黎老人

瘠牛可畊

豈不惜薑水那堪吞蒲臆

撫黎逼黎人之財則以薑水灌之

遙明鐙火

忽驚疑一望旌旗我心惻

撫黎至黎則明  
鏡揚旗以進

羣黎草木豈

有知貪吏腹削無休息攻掠犯順誰所爲撫黎毒黎還

毒 國南征稍喜平崖公殲掃惟悲不爲德

送法光弟子還普陀山因簡法光

佛光何廣大夷賊亦來親爲緩王師令將全苦行人遠  
峰巖列戟環海總迷津擒縛自爲計慈悲是小人

與法光汎舟月湖時光自賊中還

月湖同蕩槳相對各生悲百死何須問重逢轉覺疑禪  
心元不二幻體豈無知寂寞殘生在焚修更有期

祖關夜坐簡倪生

別爾惟孤坐其如夜雨何自從禪學久應慣寂寥多情  
福頻辭席思漁欲理蓑不嫌貧薄味衝濕好來過

酌酒與倪生

故里逢君子高歌百慮輕少年誰不愛衰歲轉多情從  
獵心應怯忘機酒共傾餘生何足問對爾欲逃名

居明歲暮偶成

居家猶作客俗慮不相關歲事從兒辦圍棋對客閒一  
年今又度兩髻早成斑騰化知無術金丹尚可還

次東沙少司馬元旦生孫志喜韻

鴻鈞大地啓三陽更訝君家有異光天上慶兒誰抱送

夜來熊夢是禎祥芝園宿植雲霄種香閣新栽錦繡裳  
五十爲翁非不早况看勲業與時芳


春日過白石山人幽居

幽人深巷居閉戶少迎將屏外懸名書除前列羣芳雙  
桂蔽檐端清陰常滿堂紅杏帶春色一枝出隣墻惟有  
三尺童烹茶與焚香坐來忽移時不覺心清涼時取壁  
上琴爲我鳴琳瑯庭月爲之白子夜爲之長人間那得  
此疑是費長房欲別猶徘徊花露沾衣裳

萬總戎集終

盛明百家詩 何翰目集

予刻百家詩成皇甫泉氏復貽予何翰目集  
二集來書云前索名流之作如雲間何子吾吳撰子  
一則積學渾成一則少年英發藻鑿之餘必垂採錄  
無遺也時純綺集已刻乃又刻何翰林集何君名良  
俊字元朗號柘湖以進士入官監獄舉不第授南翰  
林孔目三年遂引疾自免遊通海上冠變卜居清溪  
者數年以親友固請而歸又買宅吳城與諸文士遨  
遊倡和復且數年壬戌其弟祠部郎叔皮亡親友再  
申前請始歸其曾次蓋傲睨千古不但四海而已讀



其詩若文者可以知其人矣詩一卷百篇有餘隆慶  
改元春隣郡俞憲識

壽賦有序

維 皇嘉靖戊申楊母高太夫人壽屆七十十日  
日實維降誕之辰其子亨有文章與黨好客一  
能文之士咸走堂下稱詩奉觴為壽子亨執毫  
以語其妹婿何良後曰吾子爰自蚤歲即好  
日羣公諸君各有撰著以光尺璧子安付無  
良俊濟濟於世其子長益堅以來將登魁  
唐宗室者無不稱其尊也近昔何作賦  
禮絕名者非不稱其尊也近昔何作賦  
賦亦後憶自五歲時即拜起太夫人膝前  
尊良俊後憶自五歲時即拜起太夫人膝前  
恩同所生今日安敢無言則又何敢以謏  
獻乃彷彿仲默之意差次替衛之細小作壽賦一篇  
其辭

於沕醜之發祥兮總休氣之氤氲

貞媛於洪源繫大人之嘉止兮解瓊佩以

之嫵婉兮遂日嬪於慶門嗣京陵以作範兮詠

惠溫固有聞其必允兮籙靈秀於玄根晞陽精於

兮布芳條其纘纘兮蘭之在庭兮挺玉樹之

坤體之靜固兮盤厚地其靡極况仁者之宜壽兮亦

德而必食故日月皆得盈數兮諒年歲其如式日月皆得

盈數以七十歲為一壽兮肇一壽於萬億永欣欣以壽

兮絲慶譽於茲日于時顓頊總轡玄英肅駕露綠隙以

流戶日躔火而徙舍覺水泉之潛動驚木葉之微下播

玄籥以吹萬，但何物之不化。維彼長松，蔚蔚亭亭，亦有黃華。芸芸英英，挺特山河。璀璨中，豈非物之在。貞脆之殊形，若廼孝子，備養循彼。于懷薄采，芳潔既庶。既偕名錯，踰江海。湧室冬筍，生階實冥。感而潛致，固靡物而不。之既調適，九醞之新醕。綵衣翻僊，輕軒徘徊。儼無上尊，暢慈顏之遠。開于焉親實來，賀儒賢畢至。屬簪裾鱗次，溪縈青雀之航。門結流星之駟，莫不。三峽氣陵秦華，足使崔班相輿。潘左扶駕，俱呈才而効。

伎各爭騁，以陵跨太夫人。喜子姓皆賢雅，能得客顧勅。中厨肆烹前，榮設席盛列。壺尊妙選漿，炙名酒泉至。異膳丘積，冷主賓之獻酬。方轉盼而累百，亦有衛北繁聲。粵南名倡，清歌徹雲。遺音遶梁，魚龍角觝爲樂。無方鯤絃嘈囀，鷺翻低昂。應疾徐以赴節，叶金奏之皇皇。旣而觴酌交錯，耀靈西下。燈設長明，城開不夜。吐金蓮之玃，璪蕤火樹而狼藉。更盡酒闌，客稱旣醉。良俊再拜歌曰：虬翼文螭，浩淼絳河。斜招要郁墨子，遊嬉金母家。桃康守泥丸，延年壽無涯。又歌曰：冠明星，今帔絳霞。攜慶都

今招女媧遨曾城兮憇懸圃翳玄芝兮若木華雲駟徜徉兮白日暮鞭夸父兮廻曦車良俊歌竟坐客起去僮隸霑洽壽母燕喜咸曰願我太夫人康寧客亦歲至子孫萬年引之勿替

秋夜慧山作

振策晞雲衢弭節淹江臯薄騁區中觀遂叶靈山要是月秋向佳清夜鬱迢遙微雨屏游氛素節傾陽翹東嶺發瑤光遠林起商飈耳聆清澗流玄景何寥寥伊余秉淵尚夙昔羨英標俯化情已深縱目理自超旣陳東山駕行赴南宮招騰身紫琳堂朗發秋風謔

酌第二泉同舍弟叔皮

陸生不我遲奄與大化遷千年有真契貽我清泠淵余行自杪秋况值望舒圓望舒揚廣庭灑灑弄潺湲潺湲有清響余懷亦振蕩芳氣鬱芊綿水碧紛搖漾試以滌煩襟果得玄談暢嵇公渺難攀喜共清河賞叶非子誰爲同泠然發高唱

送徐伯臣爲奉化令二首

芳飈播長林湛露被豐草晨興理衣裳送子涉遠道弱齡綜羣籍相期共探討祕典散幽滯華辭掇菁藻子行適王路分符越江徼製錦戒勿傷牧馬去其擾出宰古



所珍慎之須在早

戴星豈不勤未若彈琴逸清淨亦何爲漢代歌寧一世  
道多流遁人情好更革老聃存悶悶何武去赫赫婁子  
黃虞前無爲近事迫

包大侍御冬日過余城館見貽十四韻率爾奉酬一

首

弱年慕大隱中歲棲附郭心源了無取誼寂同至樂近  
偃辟疆園遐情寄濛濛試以愜微尚兼用諧勝托窮巷  
屏紛雜荒榛翳叢薄環堵有舊營山楹無改鑿高樹列  
偃蹇羣峯羅岸嶽輕颺披葯房微雨灑園閣新竹漸紫

苞繁花吐芳萼春歸競敷榮秋至同瓠落林卧閱代謝  
天遊恣寥廓遺形偶斥鷃混迹隨屈蠖豈無寰市喧幸  
免纓組縛晏仲喜湫隘揚生甘寂寞畢歲矢勿諉中懷  
諒無忤包子臺中彥風期眇丘壑雅志鬱瓊敷華辭紛  
綺錯旣登雲衢龍却顧蓬山鶴暇日訪衡茅投我遊園  
作妙響振林樾晶光映丹雘委曲陶令言纏綿尚平約  
丈夫貴得意乘時展明略禮樂想夔龍韜鈴思衛霍勉  
終天上期庶果林中諾

七夕詠牛女效齊梁體

雲路飄金氣星橋渡綵旂華粧應促節隆愛逐奔流桂

殿香氛合綃帷黛色浮情隨此夜盡恩是隔年留靈匹  
匏瓜繫芳娥赤電迺來歡藉雕鵲歸恨劇華軸欲識相  
思處龍梭時見投

春日奉同府公槐野先生遊燕子磯次王司馬韻二  
首舍弟叔皮祠部同賦

江山閱人代千載若旦暮偶紆塵外軫頗極寰中趣登  
頓豁壯眸初陽褰宿霧隱約吳甸雲依微淮浦樹時來  
千里風曄曄吹芳杜冲想屬寥天非公孰與晤矯翮希  
遠圖弱羽倦長路片帆雲際來匹鳥烟中去去來亦何  
常榮落驚電露故人誰至今今人修成故嗤彼塵昏子

戚促營竹素

蹉跎守微官斯計已太錯近悟損益理遠追尚平約誓  
匠感芳辰攜登江上閣泛泛波際航茲焉得棲泊窮覽  
意不極延賞景已落回看帝城小仰睇諸天濶先民昔  
歎逝睠此如可作頓令一身輕轉覺萬慮薄閒調洞口  
猿或跨山頭鶴永於毒濁屏不使混沌鑿寄謝當塗人  
偃仰從所樂

奉贈府公槐野先生應召北上

大江西南來東流會蓬瀛奔騰一萬里吐納揚光晶神  
都宅其區先聖昔所營鴻構模紫微列署羅兩楹東

壁掌圖書妙選屬羣英我公應昌運西嶽降元精摛文  
象緯布吐論懸河傾許身伊與周管晏羞同稱佇竢國  
釣秉行看泰階平二年滯此都今作升天行南中富川  
原草木被光榮弱植譬女蘿引蔓固有憑大匠無棄材  
百物荷陶成自慚翰墨場居然冒華纓周旋稟嚴訓冷  
泠瑤與瓊誓結綢繆歡忽聽驪駒聲是月夏正中赤日  
熿華旌高柳垂密蔭好鳥鳴嚶嚶物類感必乎中懷惕  
以驚佇聆金玉章庶慰饑渴情

春日思歸

用白傅體簡舊遊諸君清森閣在東海上  
何子宴息處也

憶在江南住年時重行樂二月氣微和天晴雲翳薄新

水拍湖堤垂楊蔭郊郭夷猶白版舫搖颺青油幕左右  
列圖史中間置杯杓同心四五人有酒共斟酌彼此皆  
莫逆歡遊恣談謔放歌隨所適偃卧至日落自從受官  
來斯意久寂寞方慚職業曠敢計祿養薄清晨騎馬出  
狀貌殊醜惡去住總由人何異遭牽縛後首對新知覩  
顏出然諾轉背已茫然心寄將誰託嗟哉身世改咄矣  
性靈錯何時解天伐逍遙任寥廓還君白玉堂坐我清  
森閣

九日與盛仲交文學靈應觀登高

屈子感三秋殷生傷九井端居夙鮮歡沉憂日耿耿嘉

此重九名尚颺急暮景覽眺得良儔羈思聊一騁爽籟  
肅幽宮古木羅高嶺坐愛虛亭敞俯對重潭靜况有筆  
硯樂焚香薦嘉茗領城事出遊此意孰能領臨風奏長  
謠承貺靈僊境

浩歌行贈江大夫

請君舞如意聽我擊唾壺唾壺聲不揚慷慨發浩歌浩  
歌亦何爲請陳江大夫大夫殊特達云是千里駒三十  
登青雲四十中朝趨清穆敬皇猷嶮巖悲世途不羨列  
戟貴翻耻得車多毀容避蛾眉齟舌讓懸河舉手謝世  
賢乞身來舊都輕去禮樂司願言守兵符止水置坐隅

汪汪澹無波長懷去國心戀主仍踟躕後也落魄生弱  
冠講孫吳志期試一割庶以効區區諺點翰墨林嗟哉  
昧始圖自從甲寅來海上滿干戈師老竟無功死者如  
刈荼長策棄不收吞聲且柰何罷官已一年曳尾在泥  
塗寄食旅京塵未得返烟蘿時尋屠狗輩或邀賣漿徒  
朝吹伍員簫夜飲卓氏壚客久黃金盡卒歲聊自娛憶  
昨始邂逅感子意故殊誓結綢繆歡乖別在湏臾敢云  
附三益執手獻忠謨積薪忘後來重載誠疾驅子今上  
峻坂安行且徐徐克終古所難慎勿喪其初余掛狂生  
籍子爲國士模丹素各有營並以垂不磨

春日寓懷三首

在謝山田舍作

駕言適莽蒼一往遂經旬頗愛野興長拂去城市塵天  
氣偶微和花柳散繽紛壺榼旋自營畚鍤亦隨身遊郭  
多青山敷坐綠草茵四顧無與徒好友得清醇一酌萬  
慮盡暗覺形神親再酌吾喪我盜然天地春飲酒未必  
樂所貴全其真

東方雖大隱終是漢庭臣如何敢恣肆嘲哂萬乘尊武  
帝本愛才寵賜亦殊倫百金買少婦終歲輟易人侍從  
匪孤遠諷說恒見親當時非不過傲兀竟何因我今六  
尺軀頭白久沉淪始圖佐明時一官終爲貧比肩休儒

笑爭食雞鶩嗔放身鹿豕場終勝金馬門若非速謝去  
孤意何由申

仲尼崇世教老聃守谷神又聞天竺國曾有古聖人毀  
形標出世子處示滅親三乘演妙覺萬法歸轉輪揭竿  
求亡子總爲末俗陳魯酒旣已漓誰能使之醇玄珠遺  
赤水寶鏡蝕垢塵罔象竟得之拂去還復新華藏本各  
足安用語諄諄琅函五千卷學子徒賓賓終然爲法縛  
莊氏得其真

風木末感詩爲康礪峯作

邈矣白華詠悲哉蓼莪唱誠絜苟不渝何異千鐘享我

公申甫流致身夔龍上移忠道已尊資敬業彌廣鳳羽  
儀清朝龍章貴幽壤長風山木號終夜發深想嗟嗟罔  
極恩欲報心已爽雖窮負米歡不逮天厨養純孝感深  
衷至德非外獎令模世所希薄俗庶共仰

壽近溪項公八十

南服有奧區秀水清若空中有度世人靈異夙所鍾玉  
幹表修形碧眼湛方瞳槎蘗和長輿照灼王安豐神遊  
寄物表妙契本環中昨夜鶴書來云自容成公授以長  
生訣導以淳古風芳辰啓壽筵熙陽布玄冬庭前三珠  
樹秀色摩蒼穹遐算方未央福澤綿無窮

朱文石司成坐上分得鳴字在坐有文文水吳射陽  
張王屋黃質山諸君是日招朱射陂駕部以事不赴  
微風振芳樹爽氣流前楹鬢宮赫弘敞廣宴羅羣英觴  
酌旣交馳文辨何縱橫善降大將幢解帶盡平生風義  
夙所敦頓令一坐傾我本高陽徒落魄竟無成申脰忽  
受羈牢落滯江城卒歲莫與言不若且吞聲今日是何  
日偶與知愛并觸目盡球琅便覺雙眼明借君白玉觴  
聊以澆不平爲歡須及時無待蟪蛄鳴

離合詩

天桃始含萼未足兆春陽好色世共希艷女非所當獻

策不見收束之返故鄉聖讒昧始圖樂土潛自將河西  
有名謳一水詎能航收聽和天倪至人本深藏

賦贈何白嶽侍御

欽州齊雲巖別名白嶽侍御有草堂在焉

披日覽圖經逍遙恣閒適絢維齊雲勝靈異傳自昔鴻  
寶闕玄宮鳥道縈石壁隱淪數游盤真僊多窟宅霞峯  
萬疊青霧嶂千尋白探討富幽踪攬結饒秀色秦華稱  
雄混嵩高標峻極茲峯信奇峭或乃其亞匹彼取由名  
都此棄緣遐僻貞期叶休運褒寵何赫奕高玄吐玉符  
內使傳金冊何子臺中彥夙抱煙霞癖舊有草堂幽寄  
在巖之側未是還山人徒作懷山客琅函記赤文乳竇

一爲贈齊雲元相許誅姦酬夙志殺人報知己無令委  
空匣棄置徒如此

題菰川圃圖爲華補菴賦

威鳳奮赤霄神虬樂深淵飛沉貴自適冥心古所賢斯  
世喜附麗筐篋走戈戈箕穎若有聞千歲如比肩我公  
澹蕩人拂衣凌紫煙棲托好自佳築圃在菰川開軒望  
綠蕪良苗滿春田高柳蔭長堤翠篠夾清漣賓筵溢文  
儒琴酒日留連觴行荀氏龍真風動星躔何意喧競時  
幸覩羲農前伊余本同調披圖意條然願依仲長光共  
醉桑榆年

中江宅賞菊作

無美斯晨紛披幾叢菊清觴泛寒英密坐聞幽馥繁  
霜浦以厲貞幹華更綠願結歲寒期慷慨申此曲

金陵篇送許石城膳部北上

金陵自昔繁華里三月春風競桃李遶城綠水帶郊渠  
出郭青山映羅綺晉帝樓臺江上開吳王宮闕天中起  
風搖寶鐸夜琅琅月照金波秋瀾瀾金鋪寶鐸儼猶存  
霸業雄圖詎可論紫燕巧窺清暑殿黃鸝閒弄上陽門  
別有豪華稱貴族年年結伴相馳逐謝尚琵琶大市頭  
王郎彈射東城曲冶游終日倦紅塵清言徹夜燃華燭

風日欺天墮棟崩鮮花碧深謀謂作百年期一朝宛是  
他人室眼見如此凡幾家覆轍相追行復即顧公廉吏  
誰後空數椽古屋愁秋風子孫相承已四世詩書清白  
無窮亦有雙桓名贊憲伊誰作之端毅公年深傾圮  
黃侯忽捧天書至脫手牛刀纔一試風猷髮鬢  
感漢餘科條棄置常人事文舉新開通德門任公遠紹  
延陵祀侯言此坊勸墜存崇修亦是懷賢義飭材捐俸  
昨趨功不日巍我聳瞻視邑中冠蓋紛成列應念豪家  
易消歇勿窮壯麗侈華觀但傳卑隘貽來葉豈無賢令



似我侯存看雲仍保先業

姑蘇王夢轍避寇來都將歸迎家作歌送之

西風十月吹舊都芙蓉摧折楊柳枯鍾山黯黯日欲  
九衢冠蓋爭奔驅嗟余本是江海客騎馬逐逐胡爲  
憶昔髫年學章句有時抵掌談孫吳誰知龍曆二十載  
壯心死盡餘頭顱去年仗劍入燕市想見當時屠狗徒  
追求數月無所遇低徊巷陌空踟躕勉從一官來此地  
忝竊清禁真慚吾東壁圖書屬妙選 聖祖締情垂  
模一自 文皇北定鼎石渠天祿皆秦燕職業全無但  
坐嘯歲糜廩餼非英圖近來海上多強寇伺農直欲窺

全吳已聞鯨鯢走茂苑詎使荆棘生姑蘇 聖主宵衣  
攬羣策財䟽內帑分兵符大將亦是房次律廟勝夫豈  
無良謨一朝地利失形便數千勁卒成泥塗嗟哉王郎  
奔避遠至此對我欲言涕淚俱君住閭門世業文直置  
自是名家駒喜談時事每扼腕鬚髮皆張烈大夫便欲  
頻呼白下酒與爾共醉黃公壚側身南望腸欲斷夜半  
起坐歌烏烏寧爲韞上鷹不作水中鳧請纓志莫遂裹  
革計匪迂男兒會須南摧猾虜西擊強胡安能局促老  
牖下但與婦女爭朝舖

黎陽豪士歌贈盧次梗

黎陽豪士世所稀二十攻文名已馳一朝忽負曾參謗  
十年徒切冶長悲獄中四賦更殊特學士見之皆失色  
百身願贖國之良文深網密嗟何及陸侯造化補天工  
歲盡能回幽谷律飛章急爲扣天闈盡洗冤誣始得釋  
歸來頭白已無家壯心都盡空皮骨去冬伏劔來江滌  
與余相遇金陵市余方避地子客游共是飄零不得意  
終然老驥異凡才伏櫪長懷千里志吐膽欣同游俠兒  
低眉懶揖風塵吏清霜滿地月在天買酒與君謀一醉  
只今甲第滿都闈紛紛薄俗詎堪論共設豐羞邀上客  
誰分斗粟濟貧人三旬九食本吾事懸鶉百結聞先民  
勿因饑凍輕干謁但留顏色見交親

傲園雜興五首

園在清溪

結宇依曾曲脩然離垢氛渚花含宿雨苑樹鬱春雲濁  
酒鶯歌勸幽襟蕙氣薰此生成獨往何日反人羣  
小艇乘川漲輕鳧散野塘放歌春溜滿歌卧夕林長酒  
約嵇公載帆因謝客揚會心何必遠得趣即亡羊  
一丘青嶂遶三徑綠蘿紛不見求羊輩空隨鷗鷺羣松  
關踈雨氣竹院淨霞文人境都聞寂泠泠天籟聞  
樹暗斜通徑村深迴帶渠青枝忽度鳥碧藻欲藏魚晏  
坐時參佛高眠斷著書獨餘常聞寂得似子雲居

爲臺高十尺靜嘯俯人寰園內有嘯臺伊鬱風煙狀棲遲江  
海顏鸞音清晝發鶴使杪秋還自有仙源接寧容俗駕  
攀

靈谷寺呈浩公

支遶幽棲處房櫳俯帝臺虬松千尺偃鸞嶺百重開  
妙語芳蓮吐經文貝葉裁三車應有托不負許詢來

送龔鳳泉還高郵

歲晚江湖遠鄉關悵獨行雪深揚子渡人過廣陵城挾  
冊年猶少羈遊志未平干戈滿西北何日請長纓  
中秋無月代少婦一首

少婦深閨坐歎息此芳時寶鏡沉菱彩虛輪掩桂枝無  
復金波駛那堪玉漏遲唯應煎淚燭托以照相思

卜築時避寇南都

卜築清溪上春來樂事多小桃紅著朶新水綠生波晉  
代餘文雅吳宮舊綺羅蕭條唯故國愁絕滿干戈

獨坐對竹

歲晏交知絕相看獨此君貞姿初犯雪靈榦亦捎雲密  
色閒中得踈聲靜裏聞條然有真契我已謝人羣

送別王十嶽

忽漫相逢地因君生遠愁好尋江令宅莫上庾公樓夜

雨雙蓬鬢秋風一弊裘懷中和氏璧歲晚莫輕投

毛青城儀部招飲東麓亭與黃淳父周公瑕盛仲交  
諸秀才同集

旬休迴俗駕選勝命同歡僊苑白雲合江城落木寒臨  
風多玉樹竟坐有芳蘭此地堪乘興佳山盡日看

懷張壺梁

白下逢張協風期本暗親江臯一爲別庭樹再經春永  
夜頻通夢芳時倍損神南來鴈行急遲子瑤華音

和董紫岡移居二首

董生初學道嚴叟久逃名但得門如水何妨家近城肘

忘新變柳心感舊啼鶯望盡浮雲去知君無世情

終年常寂寂知是子雲居門外無深轍篋中唯故書同  
人俱遠達將子獨何如帶索猶堪樂無煩羨得車

王箕泉大理觴客于高座寺同集者薛方山督學朱  
射陂主客許石城太常以秋飲黃花酒爲韻得花字

二首

出郭情已好登臺興益賒林端明遠水峯外掛殘霞涼  
颼動輕袂鮮露滋晚花日斜戀幽賞誰爲返曦車

仲宣邀客處秋色在山家地勝因高座神閒即孟嘉臺  
空來遠岫逕寂吐幽花歸騎忽侵夜官城散暮鴉

十七夜皇甫司勳宅觀燈家姬出舞賦贈二首

華館夜留賓芳筵應早春好將燈作月况以玉爲人

日甲夜尚舞出前溪艷歌傳白雪新主人自製舞曲陳王擅詞

賦知是洛川神

絕世有芳容欣逢此夕同輕裾疑轉雪長袖欲從風  
冉來天上盈盈落掌中宋家自有此元不在牆東

奉酬皇甫司勳病中見懷之作用韻

慕蘭由來舊親仁幸自今愁聞卧虛室喜得奉嘉音  
但欲調狂象何須戲五禽長卿時病渴莫不爲琴心

齋居述懷用百泉司勳韻

今不歸往昔不復想來今又矣逃空谷猶然畏足音  
澄潭止水集掌有幽禽自聽維摩法唯持不二心

寓吳城送姜玉華還搖城

歲晚征車歇幽人返澗阿挾書成獨往帶索自行歌  
雲盡波容淨天寒山翠多城中日塵滓君去定如何

三月十九日與百泉司勳相遇於虎丘別後以詩見

始用韻賦答

勝會真難數名山不易逢何期值芳月復得偶僊蹤  
托意杯中月冥心花外鏡自慚非子季何以共周顛

陳台錫北上春官賦此以壯其行

美爾龍頭士雲帆江上開  
崔巍白玉陛璀璨黃金臺  
挾策終童去說詩匡鼎來  
休言風雪苦天子正求才  
庚戌秋日王子十嶽過雲間  
相與晤對山館俄而小子  
歸卧海上十嶽遂西將買田  
謝公山率爾賦贈  
虛館肅秋陰朋知喜盍簪  
踈峯圍合沓叢竹映蕭森  
邈矣高文麗幽哉玄義深  
清風同把臂朗月各披襟  
共歎身名阻俱傷年鬢侵  
君浮揚子棹將偃謝公岑  
歡讌豈能屢離懷徒愴今歲  
晏倘相憶願寄瑤華音

夏日園亭對雨

月浦興徂暑飛甘散早涼  
以茲塵事少况乃碧林長  
乍見輕絲舉俄驚巨溜張  
濯枝繙翠帶潤葉動朱光  
飲酒推河朔作賦盛沮漳  
玉李沉縹實冰蓮折紫房  
觴詠旣已洽形骸亦漸忘  
三農應望歲還共樂時康

觀郊呈大司成馬西玄先生

鸞旂拂道曉風鮮  
法駕當空赤日懸  
備禮正逢周武日  
元釐重卜漢皇年  
瑤壇積氣浮長落  
玉鬯高禋逼上玄  
最是馬卿常侍從  
早時抽筆奏甘泉

薊門望家懷舍弟

吳地繁雲望不稀  
薊門斜日愴清暉  
松關竹迳無消息  
金馬銅駝有是非  
浪迹未隨江漢遠  
歸心先傍鵲鳩飛

雖逢漢武求賢切自是相如與世違

歲暮齋居有懷包蒙泉侍御

遙憐萬里投荒客此夕歸心折  
天力忍見寒雲迷絕塞  
愁聞落木下臨洮謀身共歎陳  
蕃拙經國誰明賈誼勞  
歲晏思君情最切西風無奈  
鬢蕭條

水邊行吟率爾有詠

遠屋荒榛蔓綠蘿水邊斜日  
獨行歌人言阮籍唯踈誕  
自信嵇康不媿媿老去欲尋  
鴻寶集饑來願飽玉山禾  
安期只隔清泠水何得乘風  
試一過

望平原村有懷再用湖字呈中江督學太冲比部

平原勝業久榛蕪獨有青山  
枕碧湖水滿野塘花自發  
雲迷別浦鶴相呼喜逢茂苑  
雙辭客猶記高陽一酒徒  
惆悵茲遊應不數歸程侵晚  
更停艫

賦得賓桂一首次邢雉山太史韻

小庭幽寂露華涼吹送天風  
萬斛香只許淨名窺妙相  
不隨艷質眩新粧紛披月殿  
元稱異搖落山阿亦自芳  
正值淮南招隱地下鄰我已  
傍江鄉

二十日集諸公於四友齋得嵐字

寒齋忽枉文章客攜得新詩  
象外叅館闢鳴箏同謝傳  
坐留談麈似瞿曇牕間展卷  
明殘日燭下傳杯帶夕嵐

有酒與君須盡醉相逢難得在江南

集市隱園得霞字

大市南頭一逕斜蕭然門巷靜無譁扶疎竹樹籠寒日  
浩淼湖陂逗晚霞天外喜逢江海客寒宵同醉隱淪家  
老梅亦似含情待故傍山楹著數花

上巳日同朱射陂主客集楊鷗海宅時微雨初晴繁  
花映戶徙宴曲室侵夜而歸人賦七言近體一章以  
紀遊會席上得清字

桃花三月滿都城開到君家分外清拂坐繁枝明甲夜  
入簾斜影報初晴芳尊不盡山公興高詠難忘謝客情

莫謂茲游非曲水栢臺勝賞倍光榮

余伯祥秀才讀書永興寺胡秋宇太史相約出郊訪  
之壁間有許石城朱射陂二詩余輩嗣響分得高字  
喜陪僊吏訪時髦三月村墟見野桃滯義君於禪坐析  
塵緣我向佛筵逃山迴 帝里春光早寺抱江城秋氣  
高鄉曲推賢應不負煩君解贈呂虔刀

送董約山赴尋甸太守次彭山太常韻

五馬翩翩懷壯游即看五褲動歌謳百年滇楚蠻烟淨  
十月昆明煖氣浮問俗巡游頻攬轡行春眺賞一登樓  
策勳自古多邊徼莫爲鄉關起暮愁



盧冠巖比部觴客於鳳凰臺薛方山督學許石城奉  
常同集以杯中字爲韻得荷字

三月廿六好風日可憐春色九分過鳳凰臺上盧敖酒  
白石山前甯戚歌已見畫梁將乳燕忽驚綠水出新荷  
人生到此不行樂欲俟河清柰老何

贈史游擊周鳳南水部索賦

幾年戎馬亂紛紜最是東南不可聞黎庶比閭皆赤族  
鯨鯢白日動成羣漢家數拜樓船將海上誰收銅柱勳  
聞說摧鋒曾一戰至今人憶史將軍

許石城宅賞牡丹

是日石城誕辰

看名花淺白殷紅映晚晴  
太真艷差能比飛燕  
酒懶教尤物勸一年一度  
戊午春良俊乞休得請奉  
年送余赴官詩韻先後賦贈  
盡付烈火謀歸無家棲泊留都遂作韻勉成二  
寫羈懷

三年騎馬客南京解組歸來夢亦清豈有文章留玉署  
但將杯酒寄閒情臨春閣廢銷餘柳玄武湖荒闕不  
昨夜梅花破幽寂爲傳春信到江城

從來大隱在神京  
割肉分柑避獨清  
公江傲誕敢誇許  
掾富才情遐思每逐天  
遊真取聽樞外  
鶯無柰氛侵暗南國  
夜深呼酒被愁城

荅贈李景鶴川二先  
用元韻

保釐專寄重留京  
贏得人稱似水清  
化被恩深心懸極  
北子牟情憐才不棄  
溝中斷求文德  
慚愧巴人猶屬詠  
七言今日有長城

與張玄湖夜飲醉歸用韻一首

總爲繁華任舊京  
尊前花朵照人清  
楊枝照水喚人行  
桃葉傳歌慣有情  
閱世堪悲唯逝水  
喚人行

莫辭酌酹歸來晚  
殘月依依下石城

送張玄超秋暮還山

千林木落水微波  
此日因君感慨多  
鳳游臺高數眺望  
雀羅門靜日經過  
羈懷尚自牽江郭  
歸夢先應繞澗阿  
戎馬未平恩未報  
莫將年鬢易蹉跎

次韻許石城符卿除夕元旦感懷

造物籠人芴四三  
此中顛倒孰能參  
蝸爭角上虛言左  
蟻化柯中不記南  
兀坐自知真喪我  
遠游何必待婚男  
嵇公謾說難諧俗  
我較嵇公轉不堪

送潘苧鄉南還

吳門悵別動經年一度思君一黯然昔日歌鍾成逝水  
舊游池館蕩飛煙春風白髮期同醉夜雨青燈憶共眠  
最是欲留留不住歸心相逐下平川

壽姚秋澗母

小山偃蹇杜枝繁秋至分香撲壽尊揚子江深連弱水  
金陵地迴接花源輕風隔坐僊音繞晴日當階綵袖翻  
帝里家園俱絕勝潘郎早已駕輕軒

春日花前聽李節筆歌作張王屋黃質山每誇余以  
歌館之樂書此貽之并要和篇

瘦鶴支離病客身黃鶯嬌小帝城春花前莫遣清尊歇

上應添白髮新縱飲已忘身外事當歌且惜  
秦淮花月如天上幾欲乘槎一問津

送人之望江主簿

作吏金陵歲已深悠悠誰識抱關心春朝岸憤潮生浦  
秋晚銜杯月墮林漫說簿書勞劇縣佇看棠樹滿江濤  
旗亭把酒重回首同是他鄉思不禁

送朱小泉南歸兼懷顧小川昆玉張王屋董紫岡朱  
象岡諸君

望中江水白沄沄無柰清秋此送君長路尚淹騏驎足  
空山又向鹿麋羣涼生定憶秦淮月春至能忘鍾阜雲

好共故園諸勝士酒杯茗碗趁斜曛

壽武橙墩六十

昔日屈平曾頌橘今時武子獨知橙數株聊可娛情興  
五斗那堪混姓名晝靜叔卿來共奕月明子晉與吹笙  
金陵况是繁華地歲歲酣歌荅 聖明

春日牛首山作

遠披翠巘禮空王傳是融師古道場曲磴穿雲天闕迴  
寒泉拂樹梵源長年深不記銜花鹿地遠猶存化石羊  
無奈浮生多爾歎暫來此處得清涼

人日集朱子侷草堂壁間懸楊升菴像先是郭次甫

從金山來攜中泠水至遂煮茗作供集者金子坤文  
德承黃淳父郭次甫盛仲交顧孝符與余賓主共八  
人各賦近體一篇寄升菴得思字

草堂坐對高人像正是梅花欲放時新月一庭留氣色  
好山千里共襟期烹茶此夜聊修供載酒何年得問奇  
四海賢豪淪落盡獨因瀘水托相思

息園夜賞杏花分得舒字

辟疆園裏花無數吹遍東風二月初芳氣微聞簾底度  
殷紅旋向燭前舒輕衫縱適春偏好文酒留連夜不虛  
記得尚書觴客處風流全似昔年餘

從泖上還都姑蘇諸公會餞於虎丘別後袁吳門周  
幼海以詩見寄次韻奉荅

歸途喜並木蘭舟五月深松盡日留地以探幽稱勝集  
人逢莫逆是佳游不能浪跡淹長夏無奈相思值早秋  
曾約金陵同醉月爲君貫酒作遨頭

送胡秋宇編修北上

二月春生杜若洲星郎畫舸去夷猶行看玉局承新命  
更喜僊班愜舊游坐上賓朋誇句法禁中宣使索辭頭  
故人江外勞相憶魂夢無緣到帝州

許石城太常樓成有作次韻

喜公清嘯有樓居我亦清溪近結廬俯仰百年同嗜酒  
相將兩地各披書風光冉冉天邊至雲物重重望裏舒  
近市炎歎無可奈高寒偏愛夜牕虛

皇甫司勳宅觀舞余賦五言律二首司勳以長句見  
酬用韻一首

飄紅束素巧粧成急赴徐迴趨曲聲靜從教誇色麗  
小蠻空自說身輕當筵寶月燈猶妬拂座香風客盡傾  
白傅風流到江左肯容洛下獨傳名

送梁浮山中舍還廣南

僊郎曉發綵舟輕十月南風促去程數載聲華留祕省

一時文藻動江城，  
泖湖秋水浮空遠。  
吳苑寒雲入望平，  
最是別離無可柰。  
願隨明月伴君行。

題善權僧畫雲林小景

孤嶼媚清漣，  
疎林帶華薄。  
亭空人不歸，  
夜雨幽花落。

題薔薇白燕扇回

學得霓裳舞，  
承恩入漢宮。  
春來無意緒，  
盡日戲芳叢。

白馬湖爲思唐令賦

白馬去已久，  
此湖無古今。  
澄波一萬頃，  
能照使君心。

題畫綠萼梅和朱射陂韻

微綠含香度，  
早春水邊會。  
一見還憶意中人。

朱射陂主客宅夜集同賦蘭影二首

同心四五人，  
秉燭陶芳夕。  
誰將幽谷姿，  
印在郎官壁。

金陵弔古四首

漢季平分三國孫，  
吳元占東方。  
華笑當時王，  
濬與人間管興亡。

風物元推晉宋，  
江山又屬齊梁。  
今夜奕棋收局，  
明朝傀儡登場。

周處臺前草長，  
莫愁湖上雲深。  
不惜英雄代謝，  
獨憐紅粉消沉。

卜望時無閒泰謝安日有絃歌同是芳名在世獨含瓦  
石如何

放言四首

長卿不羞滌器幼輿偏喜投梭叔子自復佳耳安石終  
柰樂何

已拚千日千場寧辭一飲一石 天子放我還家主人  
留臣送客

近午薰籠火煖凌晨紫陌霜寒雙手抱來羅帳幾人擁  
去雕鞍

欲貲千金買宅只將兩事相煩一須焦革隣舍二要秦

青對門

無題三首

髻上猩紅斜約眉間薄翠輕安不要衾中送款只消盞  
內留殘

乍訝迎風芍藥俄驚出水芙蓉不信巫山夢見強如洛  
浦親逢

四座歌喉繚繞三更醉眼摩挲元與僊凰接翼不央靈  
鵲填河

二妹聳書來數問南京消息戲書答之

非是樂拋家業只因苦被時艱燒却雕簷千尺造成草

閣三間暫去歌樓打譚每來僧院偷閒依舊好風涼月  
只多紅袖青山

題顧東橋送許攝泉松江秋穫詩卷三首

許邁平生愛遠游長康辭賦絕時流秋風蒲把瑤華贈  
玉舄飄然下石頭

惠山迢遙凌紫烟中有名泉天下傳爾去定依支遁榻  
夜呼桑苧一談玄

江南秔稻說吳淞生計君應傍老農謾煮青精迴日馭  
細餐玉粒長秋容

題自畫竹石寄陸五湖

西風吹動闔閭城海上蕭疎竹樹鳴爲愛君家庭宇靜  
試分碧榦助秋聲

余得趙松雪小楷大洞玉經珍愛殊絕湯生自姑蘇  
來爲余裝池完整書一絕爲謝

高謝人羣不受呼米顛之後有倪迂百年此意真寥落  
歲晏逢君一歎吁

題自畫竹枝

幽齋靜掩墨生香階下新篁八尺強昨夜月明閒起坐  
一枝清影正橫窓

題自畫竹石



清溪宅裏逕全荒一月春陰不下堂最是幽懷無可柰  
閒將淡墨寫篔簹

題陸叔平畫茉莉秋海棠扇面

風吹露洗物華新粉蝶翩翩意自親恠底終朝不飛去  
此中芳豔最撩人

題種松圖壽許石城奉常次陳海樵韻

種松看成百尺林清秋拂石坐調琴虬枝不作明堂用  
獨有蒙莊會此心

吳江令楊次泉殲賊歌二首

海上頻年數喪師生靈百萬盡瘡痍策勲賴有樓船將

揚僕從來不顧私

長日東南只閉城羽書絡繹動神京不聞大將能傳檄  
賴有終軍爲請纓

乙卯八月余觴客青溪之上坐有李節鳴篳質山詠  
以二絕因次其韻

虛館鳴篳秋正清停絃掩抑最關情當年愛殺桓司馬  
賞會由來是此聲

哀音裊裊出重幃羈客僊僊思欲飛絃滑酒香花正好  
不辭零露夜沾衣

研山中翰許歌者李生以名香久不見至書此戲之

新聲宛轉動梁塵歌罷誰云不斷魂一片好香消不得  
明珠十斛爲何人

聽李節彈箏和文文水韻

汨汨寒泉瀉玉箏泠泠標格映清冰愁中爲鼓秋風曲  
不負移家住秣陵

題文石山房圖

磊砢崔巍寄此懷竒姿秀色映深階公家勝事應難比  
最憶蘇公雪浪齋

題洞庭圖贈張九夏文學

八月層波帶雨寒文章汗漫應如此

試讀南華秋水篇

焦山霽公以衲衣贈郭次甫游泰山諸公賦贈衲詩  
衲衣縫處趁斜曛線脚分明五嶽紋珍重山僧親解贈  
袖中攜得岱宗雲

白下春游曲四首

撲翠蛾兒稱意勻杏紅衫子逐時新裝梳莫訝朝來別  
無奈桃花解妬人

萬片天桃迎笑靨千條弱柳關纖腰潘妃死後芳魂在  
散作城南一段嬌

鬢眉如黛髮如雲背立踟躕避使君忽覺香風來陌上

回身微動石榴裙

結子成陰積漸多春光一去再來無明朝更欲城南去  
自掣金釵付酒胡

春日皇甫司勳見過余出小鬟以箏琶侑觴司勳爲  
賦三絕句率爾奉答戲酬來意不復用韻

燈下曾觀舞麗華小庭亦復沸箏琶近來此樂無人解  
獨有牛家與白家

白傳集有與牛竒章妓池上合樂之作

歌珠歷落本清圓更遣流泉亂拂絃好取使君留一顧  
故將誤曲唱當筵

簾同夏竄真成陋牀類楊褒亦太寒不是窈娘容絕世

何妨日日借人看

夏竄性節儉有友妻數十人無被服姿容客至常唱燕笑樂時呼爲

夏侯伎衣揚褒家貧然好音樂家畜琴伎數人故陽公贈之詩有三脚木牀坐調曲之句

賦贈周寶陽二首寶陽無錫人好方技能爲黃白劉  
心湖索贈漫爲賦此

真陽鼎上三花聚大藥鑪中九轉成四海征求深到骨  
刀圭莫惜濟羣生

茅公壇上白雲封千載君還躡舊蹤第二泉爲煉丹井  
九龍山是積金峯

何翰目集終



國家圖書館, NATIONAL CENTRAL LIBRARY, TAIWAN, R.O.C.

卷之二

目錄

盛明百家詩 王督撫集

三邊督撫鑑川王公子舊同署秋官未聞其嗜詩也  
別且三十年亦未聞其嗜詩也一日華存叔自金臺  
回貽予公餘漫稿二冊讀之乃公作也喜甚亟入明  
詩後編稿名公餘而又曰漫興公之用心可槩見矣  
名崇古字學甫山西蒲州人嘉靖辛丑進士嘗爲蘇  
松兵憲禦倭有勞績隆慶己巳夏太湖七十二峰長  
醉老漁前湖南湖北諸道觀察使是堂俞允識  
送吳霽寰歸江南二首

鴻鴈思南國翱翔返故林徘徊戀舊侶向風長哀吟况

我同心友別離忽商參蘭芳一分携零淚沾衣襟之子  
遡大江越鳥多好音望望不可見悠然隔山岑恨無凌  
風翼何以慰我心

悠悠春已暮長風吹遠天河橋楊柳色與子暫留連別  
酒莫辭醉去去即言旋念我平生親三五隔風烟豈無  
長相思遠道不可傳願君重令德相期以百年

中秋十九夜同紀山曹侍御省寮張弘齋王敬所造  
松菴上人慈仁寺松下對月分得露字

秋色佳有餘令節倏已度愛爾禪關月共坐空山暮暝  
色在西林浮光生海樹河漢湛碧波關山開紫霧婆娑

落桂英杳忽缺蟾兔鈴閣響清風蒼松凝玉露  
前除蕭然豁幽趣聚散渾未期晦明豈常數荆門子建  
歸 帝里張華賦子猷逸興多遠公忘去住與子各參  
商良娛應難屢興盡欲忘言彷彿有真悟

### 初渡淮

我本河中人來向淮南渡河淮今同歸人生豈異路丈  
夫志四方遊子悲鄉故去住情亦殊聚散紛世務莊生  
戾濠梁尼父厄淮寓聖賢自有真窮達安所遇去去欲  
忘言虛舟渺何處

### 贈雁蕩山人歸永嘉

海上有名山天台共清絕靈泉泄龍湫奇峰擁旌節中  
有耽幽人結廬在岩穴著書滿荆筍行吟卧松雪披褐  
入上國賦就揚雲蜺厭作長安遊甘爲沮溺潔烟霞尋  
舊侶泛舟歸湖浙秋風吹布袍飄飄空百結望望不可  
攀惆悵難爲別

送橫泉雷丈還衡州二首

長安有岐路夙昔傷離別岐路多傾仄離別紛往轍達  
人一笑輕良朋百縷結與歸偕所適惜去懷明哲心期  
如可同百歲瞻高節

車馬春明門春暮送人別春風吹楊柳柔絲正堪折

楊夾古道南望江楚絕江南多桂種麻姑正耆耄

雷君有老

母歸客遂相從組綬良不屑行行遵廣路楊花白於雪

大河吟西夏作

大河西南來源海泄星宿伏見經胡天蕃夷界河右湧  
入積石關濟濤幾回渡一曲下臯蘭再曲轉北顧環帶  
朔方軍胡馬滋飲漱南旋下壺口五曲經雷首予本龍  
門裔家世河中路幼懷望洋心夙負臨淵惧早歲訪河  
汾世業思馳鷺中說有遺編丘隴無餘寶及壯渡孟津  
獻策青雲附分符過延津皖汝曳黃綬遡流下江淮入  
海嗟非故返棹浮吕梁徐沛鯨波怒歸沿大行顛首陽

返故步奮起越蒲津十載經三輔涇渭每窮源漚灞時  
馮渡遠遊濟靈武夾河戒烽堠胡營據河灣駝馬牧山  
後惜哉禹跡熄有美唐功厚開渠引餘波千家資耕耨  
鑿冰列凍垣胡騎絕馳驟澆沃夏國田壅泄蘭山秀逝  
者今古同經涉紛所遇何當陟崑崙直探銀河注一挽  
浮海情頓謝乘槎繆千載頌河清永絕河邊戍

金陵客行送陳玉泉赴江臬

金陵有客陳伯玉二十聲名世共傳文章不作六朝語  
詞賦還期屈賈前三十挾策入長安玉堂金馬俟傳宣  
不堪世路多傾側鳳羽誰憐棲枳棘宛北漳南滯使車





中黃帝傳玄旨鬪湖蒼龍去不還獨留玄鶴翔人間  
茫十萬八千載直從扶桑析木恣翩躚我來謁帝橋  
宮聞說仙人張三丰日落題詩帝座側月明跨鶴遊崆  
峒仙踪不可攀仙路尚可躡努力訪名山來扣長生訣  
問道宮遺澗水濱廣成洞鎖香山岑丹梯直上天門近  
玉宇高懸摩斗參開闔千峰指顧間飛湍仙籟隔塵寰  
王母迴山綵雲近老子高臺紫氣連天風吹人毛骨清  
聳身飛墮出瑤京坐邀赤松子訂我碧山盟群仙去兮  
渺難見玄鶴忽來如飛電蒼精凝背玉爲腹龜紋繞足  
丹砂弁穩趨青冥恰御仙旋向空亭如有綠石髓松脂

看乳子乘雲服氣羨長年須臾日落千山暝洞口鶴歸  
烟霞迥長揖山靈帶月歸夢魂飛度中峰頂

八溝寺遇北津汪一

甲辰季春同諸友遊西山紀事  
六首二見七言

燕臺春欲暮結駟一追尋忽向林泉裡依微出磬音鳥  
鳴如有待僧定自無心本是悠悠者相逢暫解簪

望湖亭

振袂躡丹丘山亭共一遊湖光天際徹野色望中浮龍  
起餘仙洞雲開見帝州休時容吏隱既醉暫淹留  
得友人瓊州書

萬里投荒客三秋雁北來書傳疑是夢愁結若爲裁瀚

海波濤儼瓊山瘴厲開愁知明聖世應許逐臣回

中元十四夜同諸友都門宴月

萬里清秋月高城此共有輪光晴尚缺顥氣夜仍寒渺  
渺關河迥依依宮漏殘懸知玉壇上燈火未應闌

別同鄉諸同年

十載看花侶年來半去留江城憐我別霄漢羨  
暗旗亭道花明禁苑樓征途從此始瞻望不

庚戌九月將赴金陵夜泊廬陽陸亭聞虜犯

感

江上初收雨嚴霜已渡河漢兵聞出塞胡騎竟

陣凌秋盡笳聲入暮多武陵遺曲在慷慨不成歌

壬子初度避居山寺識感

十里南山寺三生暫爾逃水聲凌亂近山色翠微高客  
至拂雲榻僧來獻雪桃中峰兀坐處萬里一鴻毛

憶昔吟奉別環溪狄寅丈赴南都司馬

憶昔逢君日長安春正芳宮花沾御墨榻帶襲天香分  
省同雲署明刑共汝陽不堪成再別離思益倉皇

乙卯除日青村軍中識感

歲暮常爲客韶華謾自憐驚心聞海角努力泛樓船未  
遂平蠻略深慚棄組年椒花思獻壽瞻望五雲天

丁巳初度避居山寺識感

梵宇倚青蓮三花散法筵諸天真有覺萬劫豈空傳香  
散曇光靜燈懸塔影圓我生思避世就此定心禪

秋日宿裴介谷山庄聞雷

裴相原多興招携綠野堂兒孫隨杖屨野老共壺觴客  
至酒初熟詩成夜未央風雷應解意隔水送新涼

秋日宿友人鄰山書屋

愛爾鄰山屋幽懷寄薜蘿白雲擁戶近綠樹入簾多雨  
過千峰色風回萬籟歌夜深秋意靜渺渺見銀河

聽雨

鳴雨過前山輕雷度遠天水從別澗落雲向近峰還  
倏忽陰晴變差池秋夏遷乾坤真有造著意望豐年

望高平寄懷往川趙諫議

瑣闥曩稱直青山早結廬謝名焚諫草避俗著農書  
棄置誰憐子驅馳獨笑予年來無限意空望白雲居

秋日延川曉發

朔氣凝秋霧山程曉未開懸泉噴飛瀑奔澗激喧雷  
伐鼓前旌進鳴笳後隊催壯遊歌出塞應斬郅支回

已未九月邀董嘉嶺中丞蕭南峰總戎登延州嘉嶺

臺二首

工者死瘞屍城中范郎懼焉姜至塞覓夫已死統  
城大慟城傾骸見乃刺血試獲郎骨負以歸次宜  
君山麓渴甚一哭泉湧飲水復行三十里秦兵追  
之不及自度力竭不能歸遲回漆水山谷間乃囓  
石工甃石爲洞瘞郎骨尋坐而甃留金釵石隙中  
時復隱見吁亦奇矣土人即洞立祠祀其夫婦今  
制有司歲時致祭如鄉賢儀嗚呼秦築長城七國  
遺黎懷貞抱藝駢首受戮者蓋億萬計姜一女子  
獨間關數千里百死不回卒能死夫難獲同瘞室  
秦兵莫害焉遺跡遍南北古今不磨豈天故庇之

以顯烈婦耶抑示後世君天下者戒耶稽之扶蘇  
蒙恬負忠孝節咸死塞上說者爲天道好還足報  
萬夫之冤信哉亡秦已矣爲人臣子而不知忠孝  
大義者視姜女何如耶事詳祠記可以觀矣歲乙  
卯兩河地大震哭泉祠就圮王子按宜君過而傷  
之命有司葺飾并脩其夫祀如回山祠儀敬賦二  
章以慰幽貞

姜女來千里荒祠隔萬山哭泉疑楚淚刺竹擬湘斑遺  
骨悲難返貞魂苦未還涇川與江水流恨日潺潺  
澹崖傳手跡回嶺貯金棺遺化應憐節山川解護名塞

垣今蕩析祠宇古崢嶸愈信扶蘇事天教報女貞

庚申初度北郡城樓賦謝王槐溪李乾齋二鄉丈

北地驚初度南風已報薰舜城勞遠夢漢闕渺重雲肺  
病思消渴心憂欲解紛同袍聊共醉潦倒慰離群

春日同李藩叅登靈武臺

吊古登高臺春風拂面來山川連夏國城闕有唐灰李  
郭名猶在興亡運幾催蕭關聊極目沙磧半荒苔

初度示二子

汝父忽白髮吾兒正朱顏驅馳力已倦燕翼業仍艱憶  
祖歌陟岵廸兒書訂頑分陰應自惜慰我賦燕山

暮春靈武見杏花

長安桃李歇塞上杏初華西極寒恒急東皇澤未涯香  
原分上苑色擬散流霞結實知應晚花神莫浪嗟

庚申九日再邀董中丞蕭總戎登嘉嶺雨不克赴時  
驕虜內侵早霜頌禾詩以識感

客歲登高侶重來並健時莫博尋舊約風雨妬前期霜  
落郊園瘁胡來羽檄馳淒其無限意不是爲秋悲

庚申午日再寓北地憂旱

佳節何匆劇更年再此過懷人傷往事憂旱忍商歌陽  
道恒微僭溫風蒙故多遐方日枯槁無計挽天河

華亭山行遇雨見六盤積雪關山晚照即事

雲濕欲墮石磴路行難風送輕雷度日烘踈雨殘六  
盤雪擁白萬壑霞流丹極目關山外應憐征戍寒

磻溪雷雨

遵嶺尋真境沿溪問釣臺忽從熊飛處烈烈動風雷尚  
父丹書古丘仙鶴駕廻溪上未春宮丘  
真人修煉處山川餘瑞氣應

兆渭濱才

丁卯中秋侍軍門霍翁長城關對月

愛爾清秋月長城此共看邊聲傳大漠朔氣動臯蘭已  
照沙塲骨猶懸拜將壇壯猷瞻霍騎乘月靖呼韓

秋日諸公再吊河中書院故址識感上韻

漢代股肱郡河山拱舜城憑高開藝苑列館授諸生濟  
濟人文會悠悠弦誦聲人亡澤未熄劫至地爲傾搖落  
啼山鬼陸沉失舊京薰風還自至華月爲誰明郡有薰風  
詘月  
二臺故址翰墨惟秋草宮墻起暮螢感時思振袂吊古  
欲沾纓陵谷成今古桑田識變更何當回景運再頌濁  
河清

山行遇風晚宿湖村張一山庄

今日何日雲霏霏山風吹沙暗夕暉歸馬未須尋故道  
石人空自掩柴扉奔騰萬壑聞龍吼搖落千山見鳥歸

無奈天涯春色暮忍看飛絮落征衣

甲辰重陽同陳羽伯劉伯鄰吳峻伯俞樹德王新甫  
登宣武城樓分得樓字

重陽爲客憐三度此日高城共一筵青鬢每驚羈旅變  
黃花無奈歲時鮮九天宮闕秋光裡萬戶烟花落照邊  
喜有高朋看並健盛遊還擬十更年

九日送齊鷹山歸金陵

頻年九日多蕭瑟况復今年送客回衰柳忍將霜葉贈  
黃花愁對別筵開秋江鱸膾他時興漢殿茱萸此日杯  
世路未占攜手處天涯踪跡總堪哀



九日得俞樹德姑蘇書寄懷吳峻伯

登高還憶隔年遊，綠酒黃花醉鳳樓。  
萬里交遊那在眼，一天風雨不禁秋。  
慰我喜逢歸鴈早，懷人空望斷雲浮。  
姑蘇城外吳興路，燕樹江楓總繫愁。

秋日送馬孟河乞養南歸

匹馬城南送客舟，蕭蕭落木點征裘。  
十年未遂滄洲願，萬里愁看綵鷁浮。  
去國有懷瞻寶婺，還家應憶賦瓊樓。  
他年五岳如相問，冀北淮南許並遊。

泛湖

湖上芳湖一望平，扁舟搖曳九愁輕。  
晴天倒浸南山色，午夜低垂北斗明。  
進艇漫隨鷗鷺侶，鳴榔偏稱芰荷情。  
凌虛忽憶十年事，老大空慚未請纓。

慈仁寺夢王新甫

憶昔空山共扣禪，白蓮結社絕塵緣。  
重來妙偈誰堪語，覺處真機有夢還。  
癡我多愁無住着，思君好事賸流傳。  
多情惟有都城月，猶向松窓照獨眠。

許三海都閩副守與都詩以贈別兼訊紀山曹侍御  
年丈

汝水相逢共歲寒，湖陽促駕忽春闌。  
寒帷已樹淮西碣，分閩還登帝里壇。  
千騎彪營環廟寢，萬年龍氣護江

千行行寄語鳴驄客好爲蒼生草袖彈

雪夜侍宴周海庄齋臺次韻

高館凝寒鎖暮雲霜臺風淨絕囂氛乍看縹緲簷前舞  
忽見輝煌燭下分鹽散齋池銀作陣驄嘶玉勒驥空群  
高懷更有陽春調欲和瓊瑤愧不文

冬日景明李氏山莊即事

爲愛名山愜壯觀玉龍百丈掛晴瀾千峰瑞雪開銀障  
萬壑冰橋跨玉欄松巖月明堪舞鶴竹樓風過聽鳴鸞  
逢人莫問炎暄景惟有清流共歲寒

次高平挽張望峰侍御

早歲聯轡聽鹿鳴幾將金石結芳盟君揮繡斧清江左  
我奉兵符衛舊京豈有奇功清海甸漫勞飛捷 奏承  
明淒其往事堪垂涕目斷孤墳擁素旌

七夕阻雨羈溫泉郵亭觀漲次鐘山前韻

彌節荒亭雨滿山洪濤百丈湧奇觀滂沱疑瀉鵲橋瀾  
蕭洒應分玉宇寒天上有綠歡會好人間無奈別離難  
遙思兒女蘭閨夜巧勝燈前帶月看

即日登鐘山戍樓

危樓高結跨飛虹古塔峻嶒對梵宮北去關河連塞上  
西來風物自秦中洞門暗向前山轉石井深連幽澗通

山有范公扼險應期追范老不堪搖落成烟空  
井運糧洞

秋日中丞嘉嶺董翁召過草堂宴菊即席賦謝

廿年遼海勲庸舊二徑延山興味真司馬豈貪獨樂社  
淵明應愛旣歸身青山繞屋開仙掌碧水浮塔長綠蘋  
棋局有緣隨杖屨紉蘭餐菊共頤神

中部道中春雪

金鎖雄關雪陣屯凝華積素失山村乍聞羌笛落梅調  
疑是春風度玉門

白雲洞

古洞欽岑駕石梁飛泉香浥注龍漿幽人時卧白雲裡

在無心歲月長

觀音閣

佛閣岩堯嵌翠岑曇花開處雪華深懸燈影落澄潭水  
總是靈光清道心

士賢撫集終

盛明百家詩 李青霞集

李君名時行字少借廣東番禺人嘗舉嘉靖辛丑進士出宰嘉興晉南京兵部主事以事已官遂不復有歸志徧遊吳越齊魯諸名山所至寄情詩酒蓋落落世故若無所嬰于中者因自號青霞居士隆慶改元嘗從白下渡江向同舟人問予起居予是以知其詳云刻有詩文各一卷名曰李駕部集文翰詔徵明叙其首是歲長夏是堂散人俞憲識

詠懷二首

涉世寡所諧雅志在丘壑投簪歸青山守拙甘寂寞稍

擬漢陰釣還尋鹿門樂當春理東會及秋事躬獲暇日  
呼友朋煙蘿成野酌巨觥交勸酬清謳聞諧譁忘形  
幾聞矯首同飛躍黃鶴摩青霄陋彼燕與雀未結逍遙  
遊已矣謝羈縛

皇虞道已遠班馬競馳驚賈董揚頽波揚枚逞芳度茲  
乘日云沒新聲混韶護商鼎與周彝所貴在真素雕飾  
豈不華本實惜先靈蹇予事鉛槧謬希作者路穎弘寄  
餘閒聊以展幽趣所憂在駑駘恐失天馬步

遠遊篇

束髮事遠遊遠遊抵燕趙發軔越水湄弭節匡山嶠天

目暫夷猶句曲恣登眺南瞻泰岱崇北涉黃河渺太行  
正鬱紆濟源深窈窕遺風想悲歌舊俗多質躡舞雩趾  
尚存望海踪未杳城古有開元柱在知華表馳驅歷名  
竒自覺寰區小終作神霄遊超然謝羈縛

宿湖南淨寺

攬勝投名山信迹遵玄境興隨覺路遙心與空門靜雲  
樹澹蕭疎水月相輝映天寒夕梵微木落霜鐘應倦鳥  
下松林歸僧掩蘿徑景眺遐想舒物討幽懷罄揮琴鶴  
共娛講法龍爭聽祇樹鳴山風雨花落湖鏡於焉結芳  
柱聊以祛塵病睠此碧巘棲因之定吾性

遊東林寺度虎溪橋竟諸峰登覽止宿遠公房  
飛甍敞雲際朝攀鬱玲瓏瀑泉噴石瀨驚飈回遠空嵐  
光隱雙樹霽色澄千峰湛湛竹間露泠泠松下風白蓮  
尋舊社紫閣聽鳴鐘入谷窺鶴室穿林步虎蹤玄覽八  
極隘達觀萬化從神陶願自恊慮澹道彌通留憇空壇  
夕焚香懷遠公

貽雲間高士吳次一朱克溫兄弟

習習條風生吹我嘉樹林嘉樹何菁葱上有諧鳴禽嚶  
嚶願求友惻惻傷我心單居慕儔侶契濶若飛沉良晨  
渺難借會晤邈無因珉珉貴礪磳百煉成兼金麗澤  
無從虛此年歲侵已矣伯生嘆千載有遺音

贈田豫陽先生

神龍矯雲穹澍霖沛中野纖纖衆草姿濯濯受沾灑靡  
靡掇遺芳熒熒照光冶豈惟矜昏聩將以開來者羣流  
趨廣洋黃潦無廢捨願言策疲馬遊戲山泉下會景吐  
奇葩臨流命清管逸武敢追攀所愧知音寡邀此瓊瑤  
報沉秉用申寫

雲間留別諸同志

祇役出郊圻怒馬傷離抱馬知懷苦辛念我同心好相  
携未洽旬睽違一何早人生聚散期宛如浮萍草忽復

因風會湏臾各遠道征車何彭彭綠楊何裊裊春氣正  
鬱葱况茲間關鳥川塗限南北恒慮音徽少共勉令德  
圖崇修以爲寶

俠客行

長安俠少年結束事行邊珠嬰絡戰馬白羽控飛弦流  
盼萬人靡光彩何翩翩暮宿歸燕市朝遊出甘泉個儻  
負竒氣談笑兵圍間所懽在知己軀命乃易捐

彭城道中

秣馬肅徒侶晨征越郊邑林莽何蕭條颯颯陰風集云  
是古戰場殺氣餘慘惻伊昔楚漢交兩雄正相厄

捲旌麾摩空耀戈戟朱火赫以飛白龍自奔匿恃力亦  
何爲鬪智終靡益英雄等物化勞勞竟陳迹空嗟耕隴  
間黃沙亂白骨

情詩

曖曖雲間月圓缺自有時翩翩梁上燕猶傍故巢歸如  
何遠遊子去去無返期別時春葩芳今見秋葉飛洞房  
夜凄其寂歷生塵絲流螢入孤幔蟋蟀鳴坐隅精誠感  
宵夢會晤空斯湏寧作清流源不作濁水泥冰霜諒自  
保茲懷君詎知

姑蘇曲

三月三江口垂楊復垂柳朝看燕引雛暮聽鶯求友此  
時花鳥競妖妍此際風光正可憐錦轡分飛爭道路朱  
輪合沓出郊廛千門簫管聲如沸公子豪華多意氣時  
軟雲凝故相家玉闌花覆將軍第春衣製紫絨劍珮地  
徑紅氈醉專諸宅還宿館娃宮館娃宮裏飛花滿姑蘇  
臺上游絲軟吳姬二八笑當壚能向春風歌宛轉宛轉  
歌正微朱顏世復稀分明不是陽臺路只愁化作彩雲  
飛

贈王郎

王郎膽氣欲吞海縱酒高陽三十載千金不惜贈荆

雙壁持將結朱亥去年烽火警榆州慷慨辭家赴遠  
倒捲黃沙擒羯虜輕飛白羽落旄頭縱橫豪氣誰能  
自戰功高不收籍貂裘盡還復來却向秦樓夜吹簫  
我勸王郎休嘆嗟應知人世有張華吳鈞本是連城價  
莫使光芒蝕土華

贈梁山人歸羅浮山

昔在羅浮兩石樓逢君身著紫雲裘憑虛共對烟霞酌  
握手相期訪十洲一從歸臥丹丘裏滄桑幾度更寒暑  
碧山昨日事遨遊豈知復值同心侶見說青霞舊洞天  
藥欄丹井尚依然稚川遙寄食芝訣鮑靚蕪傳紫誥篇